

DIDZA' DXI'A BUZÚAJË' MATEO

*Yugu' xuz xinë'e gudödi queë' Jesús
(Lc. 3:23-38)*

¹ Ni ruzúaja' lágaquië' xuz xinë'e gudödi queë' Jesucristo. Nabábagaquië' David, enca' Abraham xuz gudödi queë'.

² Abraham gúquië' xuzë' Isaac.

Isaac gúquië' xuzë' Jacob.

Jacob gúquië' xúzgaquië' Judá, en yugu' bönni' bõchë'ë.

³ Judá gúquië' xúzgaquië' Fares, en Zara, ate' Tamar gúcanu xiná'agaquië'.

Fares gúquië' xuzë' Esrom.

Esrom gúquië' xuzë' Aram.

⁴ Aram gúquië' xuzë' Aminadab.

Aminadab gúquië' xuzë' Naasón.

Naasón gúquië' xuzë' Salmón.

⁵ Salmón gúquië' xuzë' Booz, ate' Rahab gúcanu xinë'ë.

Booz gúquië' xuzë' Obed, ate' Rut gúcanu xinë'ë.

Obed gúquië' xuzë' Isaí.

⁶ Isaí gúquië' xuzë' David.

David na' gunná bé'enë' bönachi Israel, ate' but-saga ná'alënë'-nu nigula na' gúcanu zí'alö nigula queë' Urías, ate' David, en nigula ni guláquië' xuz xinë'ë Salomón.

⁷ Salomón gúquië' xuzë' Roboam.

Roboam gúquië' xuzë' Abías.

Abías gúquië' xuzë' Asa.

⁸ Asa gúquië' xuzë' Josafat.
 Josafat gúquië' xuzë' Joram.
 Joram gúquië' xuzë' Uzías.

⁹ Uzías gúquië' xuzë' Jotam.
 Jotam gúquië' xuzë' Acaz.
 Acaz gúquië' xuzë' Ezequías.

¹⁰ Ezequías gúquië' xuzë' Manasés.
 Manasés gúquië' xuzë' Amón.
 Amón gúquië' xuzë' Josías.

¹¹ Josías gúquië' xúzgaquië' Jeconías, en yugu' bönni'
 böchë'ë.

Yugu' bönni' ni gula'cu'ë dza ni' cate' yugu' bönni'
 Babilonia gula'chë'ë bönachi Israel nadzúngaca lu
 xiyúgaquië'.

¹² Jeconías gúquië' xuzë' Salatiel.
 Salatiel gúquië' xuzë' Zorobabel.

¹³ Zorobabel gúquië' xuzë' Abiud.
 Abiud gúquië' xuzë' Eliaquim.
 Eliaquim gúquië' xuzë' Azor.

¹⁴ Azor gúquië' xuzë' Sadoc.
 Sadoc gúquië' xuzë' Aquim.
 Aquim gúquië' xuzë' Eliud.

¹⁵ Eliud gúquië' xuzë' Eleazar.
 Eleazar gúquië' xuzë' Matán.
 Matán gúquië' xuzë' Jacob.

¹⁶ Jacob gúquië' xuzë' José.

José ni gúquië' bönni' queënu María, ate' María ni
 gúcanu xinë'ë Jesús, lë' ca' Cristo, Bönni' na' tun löza
 bönachi judío guidë' idinná bé'enë' légaquië'.

¹⁷ Caní naca, gulaca chidá' cö' di'a dza ga gusí
 lo zoë' Abraham ga bidxintë zoë' David, ate' gu-
 laca ca' ia'chidá' cö' di'a dza ga gusí lo zoë' David
 ga bidxintë dza yugu' bönni' Babilonia gula'chë'ë

bönachi Israel nadzúngaca, ate' gulaca ca' ia'chidá' cö' di'a dza ga gusí lo dza ni' gula'chë'ë léguequi ga bidxintë dza guljë' Cristo.

Yugu' le guca cate' guljë' Jesucristo

(Lc. 2:1-7)

¹⁸ Caní guca cate' guljë' Jesucristo. Cate' ni' chinazí' lu ná'abi' María, xinë'ë Jesucristo utsaga ná'aleni' José, en zí'atëlö cate' si' utsaga ná'aleni'-bi', en cabí ne sóaleni'-bi', guyú'ubi' tubi' bí'ido' lé'ëbi' María na'. Guca caní ni'a que yöl-la' huáca queë' Dios Bö' Lá'ayi.

¹⁹ Náquië' José na', bönni' queëbi' María, bönni' tsahui', pero bití' gú'unnë' uzéguië'-bi' didza' lógaca bönachi. Gú'unnë' ulá'aleni'-bi' bagáchi'sö.

²⁰ Tsanni ni' rizá' ládxe'ë José ca na' gunë', bulufí' lahuë' gubáz lá'ayi queë' Xanru' lahuë' José lu yëla bëchigal, en gudxë' lë':

—José, zxi'ini zxi'sóë' David. Biti' gádxinu' si'u-bi' María, para gácabi' nigula quiu', tu' yú'ubi' bi'i bönni'do' lé'ëbi' ni'a que yöl-la' huáca queë' Dios Bö' Lá'ayi.

²¹ Gáljabi' tubi' bi'i bönni'do' queëbi', ate' gu'u labi' Jesús, tu' usölábi' bönachi queëbi' lu dul-la' nabága'gaca.

²² Caní guca yúgu'të lë ni para gaca lë na' gunné' Xanru' lu ru'ë bönni' bë'ë didza' uláz queë' Dios, gunné':

²³ Buli'yútsöca', tu nigula ra'bando',

tsú'ubi' bí'ido' lé'ëbi',

ate' gáljabi' tubi' bi'i bönni'do',

ate' ilu'ë labi' Emanuel.

Emanuel naca tu didza' hebreo le rnna: Len rë'u Dios.

24 Cate' bubanë' José lu yëla bëchigal, benë' ca na' gudxë' gubáz lá'ayi queë' Xanru' lë', ate' guzxi'ë-bi' María, ate' gúcabi' nigula queë'.

25 Biti' guzóalenë'-bi' cate' bidxinrö dza chigúlajbi' bi'i bönni'do' queëbi', bi'i zí'alö queëbi', ate' gulu'ë labi' Jesús.

2

Bönni' ta'yéajni'inë' ridiyúgaquië' bí'ido' Jesús

1 Cate' gúljabi' Jesús lu yödzö Belén, luyú Judea, rinná bë'ë Herodes luyú ni', ate' bila'dxinë' bönni' ta'yéajni'inë' Jerusalén, narúajgaquië' tu yödzö dë saca' ga rilén gubidza.

2 Gula'nabë' bönni' ni, ta'nnë':

—¿Gazxi zóabi' bí'ido' na' ral-la' inná bé'ebi' bönachi judío, bí'ido' na' si' gúljabi'? Cate' ni' zóatu' ga rilén gubidza bilé'etu'-ba' bölaj bení' naca bë' chigúlajbi', ate' za'tu' ni para tseaj ládxi'tu'-bi'.

3 Cate' gúquibe'enë' Herodes, bönni' rinná bë'ë, lë ni, gurö'ödë' böniga, en lësca' caní gula'bö' böniga yúgu'të bönachi nacuá' Jerusalén.

4 Ní'irö Herodes na' bulidzë' yúgu'të bixúz unná bë', len bönni' yudo' tu'sédinë', ate' gunábinë' légaquië' gazxi ral-la' galjë' Cristo, bönni' na' tunë' löza bönni' judío ilá' lahuë' para inná bé'enë' légaquië'.

5 Të' lë':

—Lu yödzö Belén luyú Judea. Caní naca tu' buzúajë' tu bönni' bë'ë didza' uláz queë' Dios le rnna caní:

6 Biti' nácarö cá'asö yödzö Belén luyú Judá lahuë' Dios

ca nácaḡaca yödzo gapa nacua' nupa ta'nná bē' luyú
ni,

tu' irúajē' tu bönni' yödzo Belén, en gáquiē' lo,
bönni' na' gun chi'ē bönachi Israel quia'.

⁷ Ní'irō Herodes bulidzē' bagáchi'sō bönni'
ta'yéajni'inē' na', en gunábinē' légaquiē' para
inózinē' dxi'a gáca'xte chiguca bulu'i lahui bölaj
na' bila'lé'enē'.

⁸ Ní'irō gusól-lē'ē légaquiē' tsöjáquiē' Belén. Rē'
légaquiē':

—Guli'tséaj ni', en guli'tsöjnaba dxi'a nacxi
naca queēbi' bí'ido' na'. Cate' chibidzölili'-bi',
ididíxjöi'ili' neda', para tseja' ca' neda', tseaj
ládxa'a-bi'.

⁹ Gudödi bila'yönnē' didza' bē'ē Herodes na',
söjáquiē' bönni' ta'yéajni'inē' na', ate' bölaj na'
bila'lé'enē' cate' ni' nacu'ē lądzagaquiē' söjnöruba'
lógaquiē' ga bidxintē yöjsóa ga na' dēbi' bí'ido' na'.

¹⁰ Cate' bila'lé'enē' bölaj na', bulu'dzėjade'enē'.

¹¹ Cate' gula'yáziē' yu'u, bila'lé'enē'-bi' bi'i
bönni'do' na', zóalenbi'-nu María, xiná'abi'.
Bulu'zóa zxíbigaquiē' lobi', en gula'yéaj
ládxi'gaquiē'-bi'. Gudödi na' gula'saljē' yugu' yöxaj
quégaquiē', ate' bulu'nödzejē' queēbi' oro, en yalaj,
en nörido' rilá' zxixi que yaga mirra.

¹² Tu' chibuzéajni'inē' Dios légaquiē' lu yēla
béchigal para cabí tsöjhuójquiē' ga zoē' Herodes
na', que lē ni na' yöjhuójquiē' lądzagaquiē' nöza
yúbölö.

José, en María, ta'chē'ē-bi' Jesús luyú Egipto

13 Gudödi bulu'zë'ë yugu' bönni' ta'yéajni'inë' ni', bulu'í lahuë' tuë' gubáz lá'ayi queë' Xanru' lu yëla bëchigal, ga na' dë' José, en rë' lë':

—Guyaschi. Guchë'-bi' bí'ido' ni, enca' xiná'abi', ate' buzzunnaj ni. Guyéaj luyú Egipto, ate' ugá'anu' ni' cate' guiëra' lí' ia'tú. Caní gunu' tu' uguiljë' Herodes bí'ido' ni para gútië'-bi'.

14 Ní'irö guyasë' José, en ni' naca chi'i dzö'ölö, guchë''ë-bi' bí'ido' na', enca' xiná'abi', ate' yöjáquië' luyú Egipto.

15 Bulu'gá'anë' ni' cate' gútirë' Herodes. Caní guca para gaca lë na' gunnë' Xanru' Dios lu ru'ë tu bönni' bë'ë didza' uláz queë', gunnë': "Ga naca luyú Egipto bulidza' Zxí'ina'."

Risöl-lë'ë Herodes bönni' ilútië'-bi' bi'i huë'ënido' nacué'abi' yödzö Belén

16 Cate' gúquibe'enë' Herodes biti' gulunë' bönni' ta'yéajni'inë' ca rnnë', gulénë', ate' gunná bé'enë' bönni' tsöjáquië' ni' para ilútië'-bi' yúgu'tëbi' bi'i bönni'do' nacué'abi' yödzö Belén, en idú gásibi'ilö ga dë Belén na', yugu' bí'ido' chiyú'ugacabi' chopa iz, en bí'ido' nahuë'ë'nigacaröbi'. Caní benë' ca busáquië' queë' Herodes na', tsca chiguca dza bulí'i lahui böläj na', dza na' bulu'z'éajni'inë' bönni' ta'yéajni'inë' na' lë'.

17 Caní guca, bidxín lë na' gunnë' Jeremías, bönni' bë'ë didza' uláz queë' Dios, gunnë':

18 Lu yödzö Ramá riyön chí'igaca

nupa ta'bödxi, en nupa ta'bödxi yechi'.

Raquel ribödxinu ni'a quégacabi' zxí'ininu.

Biti' gaca nu huë tsahui' lënu, tu' chinátigacabi'.

¹⁹ Gudödi gútië' Herodes na', ní'irö buluí'i lahuë' gubáz lá'ayi na' queë' Xanru' lu yëla bëchigal lahuë' José ga ni' zoë' luyú Egipto, ate' rë' lë':

²⁰ –Guyasa. Guchë'-bi' bi'i bönni'do' ni, enca' xiná'abi', ate' böaj luyú Israel, tu' chigulátië' bönni' ni' gulë'ënnë' ilútië'-bi' bi'i bönni'do' ni.

²¹ Ní'irö guyasë' José, ate' guchë'-bi' bi'i bönni'do' na', enca' xiná'abi', ate' yöhuójquië' luyú Israel.

²² Cate' gúquibe'enë' José rinná bë'ë Arquelao luyú Judea tu' chigútië' Herodes, xuzë' Arquelao na', que lë ni na' gúdxinë' José huöjë' ni'. Cate' buzéajni'inë' Dios lë' lu yëla bëchigal, guyijë' luyú Galilea.

²³ Cate' bidxinë' ni', yöjsóë' lu yödzö Nazaret. Caní guca para gaca lë na' gula'nnë' yugu' bönni' gulu'ë didza' uláz queë' Dios ca ral-la' gaca queë' Jesús, si' Lë', Bönni' Nazaret.

3

Juan, bönni' ruquilë' bönachi nisa runë' libán lu lataj cá'asö

(Mr. 1:1-8; Lc. 3:1-9, 15-17; Jn. 1:19-28)

¹ Yugu' lu dza ni' buluí'i lahuë' Juan, bönni' na' buquilë' bönachi nisa, en runë' libán lu lataj cá'asö luyú Judea.

² Juan na' rnnë':

–Buli'bí'i láchxi'li', tu' chizóa idxín dza idinná bë' Nu na' zoa yehua' yubá luyú ni.

³ Ca naca queë' Juan na', buzúajë' Isaías, bönni' bë'ë didza' uláz queë' Dios dza ni'të, le rnna caní: Riyön chi'ë bönni' rulidzë' lu lataj cá'asö, rnnë':

“Buli’pá’a nōza para idxín Xanru’ ga zóali’.

Guli’béaj li yugu’ nōza lasi tödë’ lu icja láchido’oli’.”

⁴ Nácuë’ zxë’ Juan lari’ néquini lítsa’ba’ böa’, ate’ núguë’ë lë’ë le néquini guídi. Rahuë’-ba’ böchi’zu, en re’jë’ bidxindo’ que buzdo’.

⁵ Yugu’ bönni’ yödz Jerusalén len bönachi narúajgaca idú luyú Judea, en idú gásibi’ilö ga dë yegu Jordán bila’dxinë’ ga zoë’ Juan na’.

⁶ Cate’ gula’xóalëpë’ dul-la’ nabága’gaquië’, Juan na’ buquilé’ légaquië’ nisa lu yegu Jordán na’.

⁷ Cate’ bilé’enë’ Juan ta’dxinë’ zían bönni’ yudo’ fariseo len yugu’ bönni’ yudo’ saduceo ga zoë’ para ila’dilé’ nisa, gudxë’ légaquië’:

—Libi’ili’, di’a dza quégacaba’ bëla sína’. ¿Zoa nu buzéajni’i libí’ili’ para izxúnnajli’ yöl-la’ rusiúdxina’ si’ gaca quégaca bönachi?

⁸ Guli’gún le gaca bë’ chibubí’i láchixi’li’.

⁹ Biti’ cuéqui ícjali’, biti’ innali’ nácali’ tsahui’ tu’ naca Abraham xuz gudödi queéli’. Rea’ libí’ili’, huáca gunë’ Dios ga ulu’huóaca yugu’ guiöj naca’ ni di’a dza queë’ Abraham.

¹⁰ Chizóa riböza guíë huága para ichugu yugu’ yaga le ruluí’i ca gaca queéli’. Yúgu’të yaga biti’ ta’bía le naca dxí’a, irúgugaca, ate’ ila’gu’ë léguequi lu guí’.

¹¹ Le nácatë neda’ ruquila’ libí’ili’ nisa lu nisa, nülöli’ chibubí’i láchixi’li’, pero Bönni’ na’ ral-la’ guídë’ cate’ tödi quia’ neda’, Lë’ gunë’ le ruluí’isö yöl-la’ ridila nisa ni, uchízië’ libí’ili’ Dios Bö’ Lá’ayi len guí’ queë’. Bönni’ ni nácatë’ lo ca neda’, ate’ neda’ biti’ naca’ lesaca’ ilecja’ xiráchuë’ nudë’ë.

12 Zönë' lu në'ë böcö' queë', le ulúbinë' ga ridxi'a zxoá' xtila queë'. Cu'ë zxoá' xtila queë' lu yu'u ga ni' gun chi'ë le, pero uzéguí'ë bëbu que lu guí', até guí' na' bití' ca' ulu.

Ridile' nisa Jesús

(Mr. 1:9-11; Lc. 3:21-22)

13 Ní'irö buzë'ë Jesús luyú Galilea, até bidxinë' ra' yegu Jordán ga na' zoë' Juan, para idilë' nisa lu në'ë Juan na'.

14 Juan buzáguë'ë xinözë', en rë' Jesús:

—Neda' ral-la' idila' nisa lu no'o Li'. ¿Za'tso' Li' quia' neda'?

15 Bubi'ë didza' Jesús, rë' lë':

—Benna lataj na'a, tu' caní ral-la' gunru' idútë le naca tsahuí'.

Ní'irö Juan bë'ë Lë' lataj.

16 Cate' chinadilë' Jesús nisa, la' burúajtë' lu nisa. Ní'irö gualaj lúzxiba lahuë' Jesús, até bilé'enë' ruhuötjë' Dios Bö' Lá'ayi, en bidxinë' ga na' zoë', rinë'ë ca riná'aba' gu'dódo'.

17 Ní'irö biyön chi'i nu rufi didza' yehua' yubá, rnna:

—Bönni' ni náquië' Zxí'ina'. Nadxí'ida' Lë', en raza ládxa'a Lë'.

4

Rë'ëni Satanás tu' xihuí' ibaga' Jesús dul-la'

(Mr. 1:12-13; Lc. 4:1-13)

1 Ní'irö la' guchë'të' Dios Bö' Lá'ayi Jesús lu lataj cá'asó para gata' lataj si' bë' Satanás tu' xihuí' Lë'.

2 Idú choá' dza choá' yëla bití' bi gudahuë' Jesús, até gudödi ni' ridunë'.

³ Ní'irö tu' xihui', nu na' run ga tá'baga' bönachi dul-la', bidxín ga zoë' Jesús, en rë Lë':

—Channö nacu' idú Zxí'inë' Dios, gunná na'a ulu'huöáca guiöj nacuá' ni yöta xtila.

⁴ Bubi'ë didza' Jesús, rë' le:

—Nazúaj lu guichi lá'ayi le rnna: “Calëgasö yöta xtila nabánigaca bönachi, pero lësca' yúgu'të didza' ru'ë Dios nabánigaca bönachi.”

⁵ Ní'irö tu' xihui' guchë' Jesús lu yödzö lá'ayi Jerusalén, ate' budxía Lë' ga naca xitsá' ícjo'olö yudo'.

⁶ Ní'irö tu' xihui' rë Lë', rnna:

—Channö nacu' Li' idú Zxí'inë' Dios, busuladzu' cuinu' ni, tu' nazúaj lu guichi lá'ayi le rnna: Dios isöl-lë'ë gubáz lá'ayi queë' para ilún chi'ë Li', ate' ulu'chisë' Li' lu ná'agaquië', para cabí tsöjchëgu'u guiöj, en cabí gunu' zi' ni'u.

⁷ Bubi'ë didza' Jesús, rë' le:

—Ia'stú nazúaj lu guichi lá'ayi, le rë bönachi, rnna: “Biti' ugunu' dxin Xanu' Dios.”

⁸ Ní'irö tu' xihui' guchë' Jesús ga naca tu lu guí'a sibi, ate' ni' buluí'i Lë' yúgu'të yödzö nacuá' yödzölió ni, en yúgu'të yöl-la' tsahui' quéguequi.

⁹ Ní'irö rë Lë':

—Yúgu'të lë ni udöda' lu no'o channö uzóa zxibu' lahua', en gunu' neda' zxön.

¹⁰ Jesús rë' le:

—Böaj quiu' li', Satanás tu' xihui', tu' nazúaj lu guichi lá'ayi le rë netu', rnna: “Xanu' Dios tseaj ládXu'u, en udödi cuinu' lu na' tuzë' Lë'.”

¹¹ Ní'irö buzá' Satanás tu' xihui' ga na' zoë' Jesús, ate' gubáz lá'ayi queë' Dios bila'dxinë' ga zoë', en gulácalenë' Lë', en gula'gu'ë le gudahuë'.

Risí lahuë' Jesús runë' libán luyú Galilea

(Mr. 1:14-15; Lc. 4:14-15)

¹² Cate' biyönnë' Jesús nadzunë' Juan lidxi guïë, guyijë' luyú Galilea.

¹³ Buzë'ë yödzö Nazaret, ate' yöjsóë' lu yödzö Capernaum ga naca ra' nísado', lu buzá' quégaca bönachi Zabolón, en bönachi Neftalí.

¹⁴ Caní guca, bidxín lë na' gunnë' Isaías, bönni' bë'ë didza' uláz queë' Dios, gunnë':

¹⁵ Luyú Zabolón, en luyú Neftalí, la' nöza ra' nísado' ia'tsölá'a yegu Jordán saca' ga rilén gubidza.

Luyú Galilea, ga nacua' bönachi biti' nácagaca judío.

¹⁶ Bönachi chul-la niti ni' bila'lé'e bení', ate' bönni' ni' nácagaquië' ca nupa chinátigaca, gulén quégaquië' bení'.

¹⁷ Cate' ní'irö gusi lahuë' Jesús runë' libán, en rë' bönachi ní':

—Bulí'bí'i láchxi'li', tu' chizóa idxín dza idinná bë' Nu na' zoa yehua' yubá luyú ni.

Jesús rulidzë' tapë' bönni' uzxön böla para tsöjtá'gaquië' Lë'

(Mr. 1:16-20; Lc. 5:1-11)

¹⁸ Cate' gudë' Jesús ra' nísado' que Galilea, bilé'enë' chopë' bönni'. Tuë' lë' Simón, en zoa ia'tú lë' Pedro, ate' dzáguië' Andrés, bönni' böchë'ë, lë'. Chopë' ni ta'chiljë' yöxaj böla quégaquië' lu nísado' na' tu' nácagaquië' uzxön böla.

¹⁹ Jesús rë' légaquië':

—Gulí'dutá' neda', ate' guna' ga ichë'ëli' bönachi quia', gunli' ca runli' rizönli'-ba' böla.

²⁰ Chopë' ni la' bulu'cá'anatë' yugu' yöxaj böla quégaquië', ate' sōjácalenë' Jesús.

21 Cate' gudödë' Jesús ia'lati' ní'ilö, bilé'enë' ia'chopë' bönni'. Tuë' lë' Jacobo, ate' dzáguië' Juan, bönni' böchë'ë lë'. Nácagaquië' xzí'inë' Zebedeo. Nacu'ë lë'e bárcodo' dzágagaquië' Zebedeo, xúzgaquië', en tu'únë' yöxaj böla quégaquië'. Ní'irö Jesús bulidzë' chopë' ni para tsöjtá'gaquië' Lë'.

22 La' bulu'cá'anatë' bárcodo' na', enca' xúzgaquië', ate' söjácalenë' Jesús.

Jesús rusédinë' bönachi zían

(Lc. 6:17-19)

23 Gudë' Jesús idú luyú Galilea, rusédinë' bönachi gapa naca lu yu'u ga tu'dubë' bönni' judío, en tu'sëdë' queë' Dios. Benë' libán ni' que didza' dxi'a ca sí' idinná bë'ë Dios luyú ni', en bunë' yúgu'të nupa te'e tsca naca yödzöhuë' té'eguequi.

24 Guzë' didza' que yöl-la' huáca queë' Jesús, ate' bila'yöni bönachi idú luyú Siria, ate' dujuá'gaquië' yúgu'të bönni' té'enë' zían yödzöhuë' que queëgaquië', en ta'guí'i ta'zaquië', ga zoë' Jesús. Dujuá'gaquië' ca' yugu' bönni' yú'ugaquië' bö' xihui', en yugu' bönni' té'enë' huë' xjote', en yugu' bönni' nacú'unigaquië' bin ni'a ná'agaquië', ate' Jesús bunë' yúgu'të bönni' na'.

25 Bönachi zían bila'rúajgaca luyú Galilea, en yugu' yödzö Decápolis, en yödzö Jerusalén, enca' luyú Judea, en yugu' yödzö nacúa' ia'tsölá'alö yegu Jordán saca' ga rilén gubidza, ate' röjácalen Jesús.

5

Libán benë' Jesús ga naca lu guí'ado'

(Lc. 6:20-23)

¹ Cate' bilé'enë' Jesús bönachi zían sōjácálen Lë', ní'irō gurenë' tu lu guí'ado' ga naca xitsá'alō, ate' gurō'ë lu guí'a ní'. Ní'irō bulu'dubë' bönni' usëda queë' ga zoë'.

² Gusí lahuë' rusédinë' légaquië', rnnë':

³ –Bica' ba yugu' bönni' téquibe'enë' ta'yádzjanë' le naca queë' Dios, tu' nadéli'gaquië' lataj ga rinná bē'ë Bönni' na' zoë' yehua' yubá.

⁴ 'Bica' ba yugu' bönni' tu'huí'ini ládxi'gaquië' tu' nabága'gaquië' dul-la', tu' huë tsahuë'ë Dios caz légaquië'.

⁵ 'Bica' ba yugu' bönni' nácagaquië' nōxaj ladxi' lahuë' Dios, tu' gata' quégaquië' luyú ni.

⁶ 'Bica' ba yugu' bönni' ta'zë ládxi'gaquië' le naca tsahui' lahuë' Dios, ate' raca quégaquië' ca raca quégaca nupa ta'dún, en ta'bidxi nisa, tu' gunë' Dios ga ulu'zi'ë xibé lë na' ta'zë ládxi'gaquië'.

⁷ 'Bica' ba yugu' bönni' tu'huechi' ládxi'gaquië' luzá'agaquië', tu' huéchi' ládxi'ë Dios légaquië'.

⁸ 'Bica' ba yugu' bönni' naca tsahui' icja ládxi'do'gaquië', en biti' bi dul-la' nabága'gaquië', tu' ila'lé'enë' Dios.

⁹ 'Bica' ba yugu' bönni' ta'bequi dxíë' didza' bizxaj, tu' ila'zí' lágaquië' zxí'ini cazë' Dios.

¹⁰ 'Bica' ba yugu' bönni' ta'zaca' ta'gui'ë lu le ta'bía ládxi'gaca bönachi légaquië' cate' tunë' le naca tsahui', tu' dë lataj quégaquië' ga rinná bē'ë Bönni' na' zoë' yehua' yubá.

¹¹ 'Bica' ba libí'ili' cate' tu'lidza bönachi libí'ili' zi', en ta'bía ládxi'gaquië' libí'ili', ate' lu yöl-la' rizí' yë' ta'nnë' queëli' le xihui' tu' dá'ali' neda'.

¹² Buli'dzeja, en guli'chaza ládxi'li', tu' uzí'da'ali' xibé yehua' yubá. Ca raca queëli', guca quégaquië'

bönni' gulu'ë didza' uláz queë' Dios, en gula'cu'ë zí'atëlö ca libí'ili', tu' gula'bía ládxi'gaca ca' bönachi légaquië'.

*Bönachi dá'gaca Cristo ilaca ca zödi', en ca bení'
(Mr. 9:50; Lc. 14:34-35)*

¹³ Gunnë' ca' Jesús:

—Libí'ili' nácali' ca zödi' luyú ni, pero channö initi zödi' na' yöl-la' siná'a que, bití' gaca gunru' ga huöáca siná'a. Bítí'rö naca lesaca', pero chinaca tu le chú'unaru', ate' ulu'libi bönachi le.

¹⁴ Libí'ili' nácali' ca bení' yödzölió ni para ulu'ili' lahui le naca queë' Dios. Ral-la' gácali' ca tu yödzö rö'ö tu lu guí'a, tu' cabí' gaca igachi' yödzö na'.

¹⁵ Cate' ruquéla'ru' guí', bití' rigú'uru' le tu zxan guí'ina, pero ruzóaru' le ga liná' para uzení' yúgu'të nupa nacué' lu yu'u.

¹⁶ Ca na' run bení', ral-la' gunli' ca' libí'ili', güí'ili' lataj gaca bë' le nácali' lógaca yúgu'të bönachi, para cate' ila'lé'e le naca tsahui' runli', ila'gú'u-në' Xúzili' Dios zoë' yehua' yubá yöl-la' ba.

*Rusédinë' Jesús que le gunná bë'ë Dios lu në'ë
Moisés*

¹⁷ Gunnë' ca' Jesús:

—Bití' guéquili' bida' para usunítia' yugu' le gunná bë'ë Moisés, o xibá na' bulu'sédinë' bönni' gulu'ë didza' uláz queë' Dios. Bida', calëga para usunítia' yugu' lë na', pero para ulu'a lahui idútë le tu'sedi lë na'.

¹⁸ Le nácatë rea' libí'ili'. Tsanni nacué' lúzxiba, en yödzölió ni, bití' tödi cá'asö nitú dídza'do', en nitú le rinná bë' xibá na', cate' gácarö yúgu'të le ral-la' gaca.

19 Que lë ni na', núti'tës bönni' quitsjë' tu xibá cuídi'do'os le zoa lu xibá na', en usédinë' bönachi para ilún caní, bönni' ni gácatërë' cuídi'do'os ca yúgu'të nupa ila'cuá' ga rinná bë' Bönni' na' zoë' yehua' yubá, pero núti'tës bönni' gunë' ca rinná bë' xibá na', en usédinë' bönachi para ilún ca' caní, bönni' ni tsëpisëtërë' ga rinná bë' Nu na' zoa yehua' yubá.

20 Rea' ca' libí'ili': Channö cabí gunli' le nácatërö tsahui' ca le tunë' bönni' yudo' usedi, enca' ca tunë' bönni' yudo' fariseo, bití' ca' tsú'uli' ga rinná bë'ë Dios yehua' yubá.

Rusédinë' Jesús ca naca que nu rilé luzë'e
(Lc. 12:57-59)

21 Gunnë' ca' Jesús:

—Chibiyónili' ca gula'nnë' bönni' guta' lu ná'agaquië' le gulë' xuz xtó'oli': “Bití' gútili' bönachi. Nu bönni' gútië' bönachi, nabáguë'ë xíguia', ate' huadxinë' ga uchi'a usöröë' Dios lë'.”

22 Na'a, neda' rea' libí'ili': Nu bönni' rilenë' böchi' luzë'ë, nabáguë'ë xíguia' huadxinë' ga uchi'a usöröë' Dios lë'. Lësca' caní, nu bönni' innë' zi'ë queë' böchi' luzë'ë nabáguë'ë xíguia' ulu'chi'a ulu'söröë' bönni' lo tu'chi'a tu'söröë' lë', ate' nu bönni' guié' luzë'ë: “¡Böa' canöz!” nabáguë'ë xíguia' tsöjtsu'ë lu guí' gabila.

23 'Caní naca, channö chizóa cu'u tu le unödzu' lu bucugu lá'ayi, ate' tsöjnenu' ni' zoa bizx que rilenë' böchi' luzó'o li',

24 bucá'ana lë na' unödzu' lu bucugu ni', en böaj lidxu'. Zí'alö yöjca'ana tsahui' le benu' queë' böchi' luzó'o, ate' ní'irö gudá unödzu' lë na' nu'u.

25 'Channö zoa nu bönni' rinábinë' li' bi ubi'u queë', en iché'ë li' ga uchi'a usöröë' tu bönni' li', budzágatë tsahui' bönni' na' tsanni ni' yú'ulenu' lë' nōza, para cabí udödë' li' lahuë' bönni' ruchi'a rusöröë', ate' bönni' ni udödë' li' lu në'ë bönni' rusayjë' lidxi guié, ate' lë' cu'ë li' lidxi guié na'.

26 Le nácatë rea' li', biti' ca' uruju' ni' cate' idxinrö dza quizzju' ga buitë le ral-lu'u.

Rusédinë' Jesús ca naca que nu riguitsaj xibá que yöl-la' nutsaga na'

27 Gunnë' ca' Jesús:

—Chibiyönili' ca na' gula'nnë': “Biti' gunu' dul-la' le riguitsaj xibá que yöl-la' nutsaga na'.”

28 Na'a, neda' rea' libí'ili': Núti'tës bönni' ruyüë' tu nigula len yöl-la' rizé ladxi' le ruá' dö', chibenë' dul-la' len lënu lu icja ládxi'da'ahuë'.

29 'Que lë ni na', channö guiöj lo' ibëla gun ga gunu' dul-la', guléaj le, en gurú'una le. Gácarö dxi'a quiu' unítü' tu guiöj lo', en calëga idúteo' tsöjtsú'u lu guí' gabila.

30 Channö no'o ibëla gun ga gunu' dul-la', guchugu le, en gurú'una le. Gácarö dxi'a quiu' unítü' tu no'o, en calëga idúteo' tsöjtsú'u lu guí' gabila.

Rusédinë' Jesús ca naca que nu bönni' rulá'alenë' nigula queë'

(Mt. 19:9; Mr. 10:11-12; Lc. 16:18)

31 Gunnë' ca' Jesús:

—Lësca' gula'nnë': “Núti'tës bönni' rusanë'-nu nigula queë', ral-la' unödziejë' queënu tu guichi le rna rulá'alenë'-nu.”

³² Na'a, neda' rea' libí'ili', channö zoë' nu bönni' rusanë'-nu nigula queë', en biti' zoa le ruá' dö runnu, gunë' bönni' na' ga gunnu dul-la' le riguitsaj xibá que yöl-la' nutsaga na' channö ut-saga ná'lennu bönni' yúbölö, ate' bönni' na' si'ë-nu nigula na', lësca' gunë' dul-la' le riguitsaj xibá que yöl-la' nutsaga na'.

Rusédinë' Jesús ca naca que nu ruzötaj La la'ayi queë' Dios

³³ Gunnë' ca' Jesús:

—Lësca' biyónili' ca yugu' bönni' guta' lu ná'agaquië' gulé' xuz xtó'oli', gula'nnë': “Biti' si' yë'u cate' run tsutsu xtídzu'u ni'a queë' Dios, en ral-la' gunu' lahuë' Xanru' Dios idútë lë na' run tsutsu xtídzu'u ni'a queë' Lë.”

³⁴ Na'a, neda' rea' libí'ili', biti' ca' gun tsutsu xtídza'li'. Biti' gun tsutsu xtídza'li' ni'a que yehua' yubá, tu' naca ga rö'ë rinná bë'ë Dios.

³⁵ Biti' gun tsutsu xtídza'li' ni'a que luyú ni, tu' naca luyú ni ca xilibi ni'ë Dios, en calëga ni'a que Jerusalén, tu' naca ladzë' Bönni' nayëpisëtërë rinná bë'ë.

³⁶ Biti' gun tsutsu xtídzu'u ni'a que icju', tu' cabi gaca gunu' ga huöáca chiguichi o gasaj nitú guitsa' icju'.

³⁷ Ral-la' innásili': “Ön”, o innásili': “Biti’”, tu' naca que tu' xihui' le nadödi bë' ca nácagaca didza' ni.

Rusédinë' Jesús ca naca que nu ruzí' lëbi luzë'e (Lc. 6:29-30)

³⁸ Gunnë' ca' Jesús:

—Chibiyónili' ca naca le gunná bè'ë Moisés, gunné': "Nu bi run que guiøj lahui luzě'e, ubí'i ca' que, enca' nu bi run que layi' luzě'e, ubí'i ca' que."

³⁹ Na'a, neda' rea' libí'ili': Biti' tá'baga'li' nu guá' dö' queéli', ate' channö nu capa' xagu' ibëla, bë' lataj capa' ca' ia'tú xagu' yögöla.

⁴⁰ Channö zoa nu gun ga uchi'a usöröë' tu bönni' li', en cué' xzo', bë' ca' queë' lari' rixóa cúdz'u.

⁴¹ Channö zoa nu gun bayudxi gu'u yua' que tu chi'i, guyéajlen nu na' chopa chi'i.

⁴² Nu bi rinábini li', bunödzej que, en nu bi guě'ëni gunnu' que tu chi'i, bití' tá'bagu'u lë na' inabi li'.

Rusédinë Jesús ca ral-la' idxí'iru' nupa bití' ta'lé'e rë'u dxi'a

(Lc. 6:27-28, 32-36)

⁴³ Gunnë' ca' Jesús:

—Lësca' caní biyónili' lë na' gula'nnë': "Ral-la' idxí'inu' nu nadxí'i li', en udí'inu' nu bití' rilé'e li' dxi'a."

⁴⁴ Na'a, neda' rea' libí'ili', guli'dxi'i nupa bití' ta'lé'e libí'ili' dxi'a. Guli'nábinë' Dios gácalenë' nupa tu'lidza libí'ili' zi'. Guli'gún le naca tsahui' quégaca nupa tu'dí'i libí'ili', en buli'lidzë' Dios inábili'-në' gunë' ga gaca dxi'a quégaca nupa ta'nnë' queéli', en tuá' dö' queéli'.

⁴⁵ Channö gunli' caní, gácali' zxí'ini cazë' Xúziru' Dios, zoë' yehua' yubá, tu' runë' Lë' ga ruzení' gubidza queë' ga nacua' bönachi tuá' dö', enca' ga nacua' bönachi tsahui'. Risöl-lë'ë tu nisa guiøj lu yu quégaca bönachi tsahui', enca' lu yu quégaca bönachi bití' nácagaca tsahui'.

46 Channö nadxí'isili' bönni' nadxí'iguequinë libí'ili', ¿nuzxi caz cu'u libí'ili' yöl-la' ba? Lësca' caní tunë' bönni' biti' nácgaca tsahui' na', bönni' tu'quizxjë' uláz que yödzo zi'tu', nadxí'iguequinë luzá'agaquië'.

47 Channö rugápali' Dios tuzë' böchi' luzá'ali', ¿bizxi caz runli' le nácatëro dxi'a? Lësca' caní tunë' bönni' biti' núnbë'gaquië' Dios.

48 Pero libí'ili', guli'gaca idú tsahui', ca na' náquië' Xúziru' Dios, zoë' yehua' yubá, náquië' idú tsahui'.

6

Rusédinë Jesús ca ral-la' gácalenru' bönachi

1 Gunnë' ca' Jesús:

—Guli'güí' ladxí'li' gaca idú ca reaj ladxí'li'-në' Dios. Biti' gúnsili' lë ni lógaca bönachi para ila'lé'e ca na' runli'. Channö runli' caní, biti' bi gunnë' Xúziru' Dios zoë' yehua' yubá queéli'.

2 Cate' bi unödzu' que nu bi riyadzaj, biti' gunu' ga ilá' lahui lë na' runu' ca tunë' bönni' tu'luí'sö tsahui' cuíngaquië' ga naca lu yu'u ga tu'dubë' bönni' judío, en tu'sédë' queë' Dios, enca' ga naca lu yë'ëyi. Caní tunë' para ila'gú'u bönachi légaquië' yöl-la' ba. Le nácatë rea' libí'ili', cá'asö naca yöl-la' ba gata' quégaquië'.

3 Pero li', cate' bi unödzu' que nu bi riyadzaj, biti' ca' gu'u lataj nu inözi.

4 Na'a, lë na' unödzu', bagáchi'sö ral-la' unödzu', ate' Xúziru' Dios, Nu rilé'e ca na' runu' bagáchi'sö, Lë' ubi'ë quiu'.

*Rusédinë Jesús ca ral-la' ulídzaru'-në' Dios
(Lc. 11:2-4)*

⁵ Gunnë' ca' Jesús:

–Cate' ulídzali'-në' Dios, biti' gunli' ca tunë' bönni' tu'luí'sö tsahui' cuíngaquië', tu' ta'yaza ládxi'gaquië' ta'zuínë' tu'lidzë' Dios gapa naca lu yu'u ga tu'dubë' tu'sëdë' bönni' judío queë' Dios, en gapa naca lu yé'ëyi para ila'lé'e bönachi légaquië'. Le nácatë rea' libí'ili', cá'asö naca yöl-la' ba gata' quégaquië'.

⁶ Pero libí'ili', cate' ulídzali'-në' Dios guli'tsaza lídxili', en buli'sayaj yu'u. Buli'lidzë' Dios inábili'-në' Xúziru' Dios, zóalenë' libí'ili' ga na' zóali' queézili', ate' Xúziru' Dios, Nu rilé'e ca runli' bagáchi'sö, Lë' ubi'ë' queëli'.

⁷ 'Cate' ulídzali'-në' Dios biti' gunli' la' yé'ëyi la' lez ca na' tunë' bönni' biti' núnbë'gaquië' Dios, tu' téquinë' huayönnë' Dios légaquië' tu' tu'lidzë' la' yé'ëyi la' lez.

⁸ Biti' gunli' ca na' tunë' légaquië'. Xúziru' Dios, zí'atëlö cate' si' inábali'-në', chinöz quézinë' le riyadzaj queëli'.

⁹ Que lë ni na', ral-la' ulídzali'-në' Dios innali' caní:

Xuz netu', zu' yehua' yubá, gaca zxön Lo'.

¹⁰ Gudá inná bë'u luyú ni.

Ben ga gaca luyú ni ca raza ládxi'u Li' ca na' raca yehua' yubá.

¹¹ Benna le gágutu' na'a dza.

¹² Buniti lo netu' le huiá' dö' bentu' Lo' Li' ca runtu' netu', runiti lotu' nupa bi tun queëtu'.

¹³ Biti' gu'u lataj si' bë' tu' xihui' netu', pero busölá netu' lu na' nu ruá' dö'.

Nequi quiu' ga rinná bē'u, en yöl-la' unná bē', en yöl-la' ba.

Caní ré'ënitú' gácatíca'sö. ¡Ca' gaca!

¹⁴ 'Channö uniti loli' luzá'ali', nupa tuá' dö' queéli', uniti lahuë' Xúziru' Dios, zoë' yehua' yubá, libí'ili'.

¹⁵ Channö cabí uniti loli' luzá'ali', bití' uniti lahuë' Xúziru' Dios libí'ili' ca naca dul-la' nabága'li'.

Rusédinë' Jesús ca ral-la' gunru' gubasa

¹⁶ Gunnë' ca' Jesús:

—Cate' gunlí' gubasa, bití' gunlí' bayechi' loli' ca tunë' bönni' tu'lu'isö tsahui' cuíngaquië', tu' tunë' bayechi' lógaquië' para iléquibe'e bönachi tunë' gubasa. Le nácatë rea' libí'ili', cá'asö naca yöl-la' ba gata' quégaquië'.

¹⁷ Libí'ili', cate' gunlí' gubasa, buli'pá'a ícjali', en guli'quibi loli',

¹⁸ para cabí iléquibe'e bönachi runlí' gubasa. Bagáchi'sö ral-la' gunlí' gubasa, ate' Xúziru' Dios, zóalenë' libí'ili' ga na' zóali' queézili', Lë' ubi'ë queéli'.

Yehua' yubá ral-la' utúbiru' yöl-la' tsahui' queëru' (Lc. 12:33-34)

¹⁹ Gunnë' ca' Jesús:

—Bití' utúbili' yöl-la' tsahui' luyú ni, ga ni bēlado' que tu'töba' le, ate' raca ditaj, en ga ni ta'yaza gubán, ta'banë'.

²⁰ Buli'tubi yöl-la' tsahui' yehua' yubá, ga ni bēlado' que bití' ulu'töba' le, en bití' gaca ditaj, en ga ni' bití' ila'yázië' bönni' gubán, en bití' ila'banë'.

²¹ Ga ni' dë yöl-la' tsahui' queéli', ni' gü'í ládxi'li' idxinli'.

Le rigú'u bení' icja ládxi'do'oru'
(Lc. 11:34-36)

²² Gunně' ca' Jesús:

—Guiöj loru' naca ca tu le rigú'u bení' icja ládxi'do'oru'. Que læ ni na', channö guiöj loli' naca tsahui', idútëli' tsépili' yösa bení'.

²³ Channö guiöj loli' biti' naca tsahui', idútëli' nachúl-lali'. Que læ ni na', channö bení' zóalen libí'ili' nuhuöáca le naca chul-la, yénni'tërö nachúl-lali'.

Dios, en dumí
(Lc. 16:13)

²⁴ Gunně' ca' Jesús:

—Cuntu nu bönni' gaca guně' xichíngaquiě' chopa xaně', tu' uzóe' tuě' tsólá'alö, ate' ia'túe' na' idxí'ině', o ugá'analene' tuě', ate' ia'túe' na' usán ládxe'ë. Biti' gaca gunli' xichine' Dios, enca' dumí.

Dios rapa chi'ë nupa néquiquequi queë'
(Lc. 12:22-31)

²⁵ Gunně' ca' Jesús:

—Ia'stú rea' libí'ili': Biti' ubi uguí'ili' ni'a que le gáguli' o ni'a que le guí'jali', yugu' le nabánili', o ni'a que lari' gáculi'. Nazáca'tërö yöl-la' na'bán queéli' ca le gáguli', ate' nácatërö lesaca' le nácali' ca lari' gáculi'.

²⁶ Buli'yú ca raca quégacaba' biguínido' ta'daba' lúzxiba. Biti' bi taz tu'zóaba', en biti' tu'lápaba', en biti' tu'túbiba' ga bi ila'gú'uba' quégacaba', pero Xúziru' Dios zoë' yehua' yubá, rugagu cazë' légacaba'. Nazáca'tëröli' libí'ili' ca yugu' biguínido' na'.

27 ¿Nuzxi caz bönni' nútsë'ë ládjali' gaca gunë' ga soë' ibanë' ia'túz dza tu' ruúbi ruguí'inë' para gaca caní queë'?

28 ¿Bizx que ruúbi ruguí'ili' ni'a que le gáculi'? Buli'yútsöca' ca raca quégaca yöjdo' rő'gaca la' guixi' ca ta'zxön. Biti' tun dxin, en bití' tun du lari'.

29 Neda' rea' libí'ili', Salomón, bönni' ni' gunná bē'ë, sal-la' gúta'da' yöl-la' tsahui' queë', lari' gúcuë' bití' gunná'tërö lachi ca rinná'gaca yöjdo' na'.

30 Dios caz runë' lachi yöj guíxi'do', le rő'gaca la' guixi', le nacua' na'a dza, ate' cuxö huidzaj ila'yegui lu guí. Channö caní ruí'i ládxi'ë yöj guíxi'do', runë' léguequilachi, gúnda'arë' ca' queëli', sal-la' bití' réajlë'ëli'-në' idú ládxi'li'.

31 Que lë ni na', bití' ubi uguí'ili', en bití' innali': "¿Bizxi gágutsatu?" o "¿Bizxi guí'jatsatu?" o "¿Bizxi lari' gácutsatu?"

32 Bönachi yödžölió ni tu'úbi tu'guí'i ni'a que yúgu'të lë ni, pero zoë' Xúziru' yehua' yubá, ate' Lë' nözínë' naquínili' yúgu'të lë ni.

33 Na'a, guli'güí'irö ládxi'li' inná bé'enë' Dios libí'ili', en gunli' le naca tsahui' lahuë' Lë', ate' Lë' cu'ë xinözali' yúgu'të lë ni.

34 Que lë ni na', bití' ubi uguí'ili' ni'a que le ral-la' gaca cuxö huidzaj, tu' huáca güí'i ládxi'li' cuxö huidzaj le gaca queëli' dza na'. Tu tu dza ilaca le ral-la' güí'i ládxi'li' dza na'.

7

Biti' ral-la' ichugu bē'ëru' böchi' luzá'aru'
(Lc. 6:37-38, 41-42)

¹ Gunnë' ca' Jesús:

—Biti' ichugu bë'ëli' böchi' luzá'ali', para cabí ichugu bë'ë Dios queéli',

² tu' ichugu bë'ë Lë' queéli' la' leze ca na' richugu bë'ëli' queë' böchi' luzá'ali', ate' ca na' rurixi rudödili' que luzá'ali', la' cá'asö urixi udödë' Dios queéli'.

³ ¿Bizx que ruyú' bëbudo' yu'u guiöj lahuë' böchi' luzó'o, en biti' réquibe'enu' yu'u le zxöntëro guiöj lo' li'?

⁴ ¿Guiëtso' böchi' luzó'o: “Gulöz, cueja' bëbudo' yu'u guiöj lo'”, ate' li', le zxöntëro ca' yu'u guiöj lo' li'?

⁵ Li', bönni' ruluí'isö tsahui' cuinu'. Guléaj zí'alö le zxön yu'u guiöj lo' li', ate' ní'irö ilé'enu' tsáhu'ido' para gaca cueju' bëbudo' yu'u guiöj lahuë' böchi' luzó'o.

⁶ Biti' güí'ili' quégacaba' bö'cu' le naca lá'ayi, para cabí ulu'huécjaba', en iláguya'aba' libí'ili', en biti' chú'unali' le naca lesaca' queéli' láhuigacaba' cuchi, para cabí ulu'zadi' ní'aba'le.

Guli'naba, guli'guilaj, en buli'lidza ra' yu'u

(Lc. 11:9-13; 6:31)

⁷ Gunnë' ca' Jesús:

—Guli'naba, ate' Dios gunnë' queéli'. Guli'guilaj, ate' gunnë' lataj idzöli queéli'. Buli'lidza ra' yu'u, ate' Lë' isaljë' queéli'.

⁸ Núti'tës bönni' rinabë', ridéli'në', ate' bönni' riguiljë', ridzöli queë', ate' bönni' rulidzë' ra' yu'u, ralaj queë'.

⁹ Channö zoë' nu bönni' ladjali' libí'ili', ate' zóabi' bi'i queë', channö inábibi' lë' yöta xtila, ¿naru' unödzejë'-bi' guiöj?

10 Channö inábibi' lë' tuba' böla, ¿naru' unödzjé'-bi' bëla?

11 Libí'ili' nácali' huiá' dö', pero nözili' unödzjali' xzi'inili' le naca tsahui'. Nácatërö löza, Xúzili' zoë' yehua' yubá unödzjé' nupa ta'nábini Lë' le naca dxi'a.

12 'Que lë ni na', ca na' rë'ënili' ilún bönachi queëli', lësca' caní guli'gún quegaquië'. Lë ni naca le rinná bë' xibá queë' Moisés, enca' le gula'nnë' bönni' gulu'ë didza' uláz queë' Dios.

Tu ga ral-la' tsú'uru' le naca tsúpi'do'

(Lc. 13:24)

13 Gunnë' ca' Jesús:

—Guli'tsáz ga nu riyaza le naca tsúpi'do'. Blaga' naca ga nu riyaza, en yalaj naca nöza le röjácalenë' bönni' ga ni' ila'nítië', ate' ta'yázië' bönni' zían ni'.

14 Tsúpi'do' naca ga nu riyaza, en lásido'os naca nöza le röjácalen bönachi ga ni' ila'deli' yöl-la' na'bán idú, ate' nabábasö nupa ta'dzöli le.

Le runru' naca bë' le nácaru'

(Lc. 6:43-45)

15 Gunnë' ca' Jesús:

—Guli'gún chi'i cuinli' para cabí ila'zí' yé'enë' bönni' ta'zí' yë'ë libí'ili', ta'nnë' tu'ë didza' uláz queë' Dios. Ila'dxinë' bönni' caní ga zóali', en ulu'lu'i' cuíngaquië' nöxaj ládxi'do' ca nácagacaba' bö'cu' xzíla'do', pero lu icja ládxi'do'gaquië' nácagaquië' ca bö'cu' guí'a sínia'.

16 Yugu' le tunë' ilaca bë' le nácagaquië'. Biti' ruchíbiru' le ribía lubá uva lu yaga yötsi', en bití' ruchíbiru' le ribía yaga higo lu guixi' legui lásido'.

17 Caní naca, yúgu'të yaga dxi'a ta'bía le naca dxi'a, ate' tu yaga cabí naca dxi'a ribía le cabí naca dxi'a.

18 Yaga dxi'a na' biti' gaca cuía le cabí naca dxi'a, ate' yaga na' biti' naca dxi'a biti' gaca cuía le naca dxi'a.

19 Yúgu'të yaga biti' ta'bía le naca dxi'a ila'ругу, ate' ila'гу'ë léguequi lu guí'.

20 Caní naca, yugu' le tunë' bönni' na' ilaca bë' le nácagaquië'.

*Nupa biti' ila'yázië' ga rinná bë'ë Dios
(Lc. 13:25-27)*

21 Gunnë' ca' Jesús:

–Zian nupa të neda': "Xan, Xan", pero calëga yúgu'të' ila'yázië' ga rinná bë'ë Dios yehua' yubá. Ila'yázasë' ni' bönni' tunë' ca rë'ënë' Xuza' Dios, zoë' yehua' yubá.

22 Cate' idxín dza údxi que yödzülió ni, bönni' zían ilé' neda', ila'nnë': "Xan, Xan, bentu' libán que xtídzë'ë Dios, buguntu' dxin Lo', en buguntu' ca' dxin Lo' para bubéajtu' yugu' bö' xihui', en buguntu' ca' dxin Lo' bentu' zían yöl-la' huáca zxön."

23 Ní'irö neda' guía' légaquië': "Biti' ca' núnbë'a libí'ili'. Guli'cuíta ga zoa', libí'ili' ruá'ali' dö'."

*Chopa ca gaca udxíaru' xilibi zö'ö
(Lc. 6:47-49; Mr. 1:22)*

24 Gunnë' ca' Jesús:

–Ia'stú ca', nu bönni' riyönnë' xtídza'a ni, en gunë' ca' rnna, bönni' ni náquië' ca' tu bönni' réajni'inë', budxíë' lidxë' ga naca lu guiöj.

²⁵ Cate' gulaj guiójsiu', en guzxón yegu gubó'o, en guyecja bö', gudibi nisa cuita yu'u na', pero biti' gubixi, tu' dxía xilibi lu guiöj.

²⁶ Na'a, nu bönni' riyönnë' xtídza'a ni, en biti' runë' ca rnna, bönni' ni náquië' ca tu bönni' biti' réajni'inë', budxië' lidxë' lu yu dzöbi.

²⁷ Cate' gulaj guiójsiu', en guzxón yegu gubó'o, en guyecja bö', ní'irö gudá'a nisa cuita yu'u na', ate' gubíxitë, en tsaz biguinnaj.

²⁸ Cate' Jesús budxi bé'lenë' légaquië' didza' ni, bulu'bani bönachi zían nacuá' ni' ca naca le rusédinë',

²⁹ tu' rusédinë' légaquië' ca tu bönni' dë lu në'ë, en calëga ca tunë' bönni' yudo' usedi quégaquië'.

8

*Ruhuóáquië' tu bönni' ré'enë' huë' nudzu' ruzödi
(Mr. 1:40-45; Lc. 5:12-16)*

¹ Cate' bötjë' Jesús lu guí'a na', söjácalen bönachi zían Lë'.

² Bidxinë' tu bönni' ré'enë' huë' nudzu' ruzödi ga zoë' Jesús, ate' buzóa zxibë' lahuë' Jesús, en rë' Lë':
—Xan, channö ré'ënu', huáca unu' neda'.

³ Ní'irö Jesús la' bulitë në'ë, en gudanë' lë'. Rë' lë':
—Rë'ënda'. Huóácu' dxi'a.

La' bunititë xihuë'ë bönni' huë' na'.

⁴ Ní'irö Jesús gudxë' lë':

—Buyú, cuntu nu guío' caní, pero guyéaj, yöjluí'i cuinu' lahuë' bixúz, ate' yöjnödzej le gunná bë'ë Moisés le uluí'i bönachi chibóácu'.

*Jesús ruúnë' bi'i huen dxin queë' tu bönni' rinná
bë'ë lu gudil-la
(Lc. 7:1-10)*

⁵ Cate' guyázië' Jesús yödzö Capernaum, bidxinë' tu bönni' ga zoë', bönni' rinná bé'enë' tu gáyu'ë bönni' röjáquië' gudil-la, ate' gúta'yuë' lahuë' Jesús, ⁶ en rë' Lë':

—Xan, bi'i huen dxin quia' dëbi' yu'u, ré'ebi' huë' nacú'unibi' bin, ate' riguí'i rizáca'da'abi'.

⁷ Jesús rë' lë':

—Neda' guída' una'-bi'.

⁸ Bubi'ë didza' bönni' na' rinná bé'enë' bönni' röjáquië' gudil-la, en rë' Jesús:

—Xan, biti' naca' zi tsáziu' lidxa', pero tsa innasu' quia', ate' huóacabi' bi'i huen dxin quia'.

⁹ Lësca' neda', zoa nu rinná be'e neda', en nacu'ë ca' bönni' röjáquië' gudil-la rinná bé'egacada'-në'. Cate' rea'-në' tuë': "Guyéaj ni'", rejë'. Cate' rea'-në' ia'túë': "Gudá ni'", ridë'. Cate' rea'-në' bönni' huen dxin quia': "Ben dxin ni'", la' runtë' dxin na'.

¹⁰ Cate' biyönnë' Jesús didza' ni, bubánnë', ate' gudxë' bönni' sőjácalenë' Lë', rnnë':

—Le nácatë rea' libí'ili', ga nacuá' bönachi Israel, cuntu nu bönni' röjxéqui'da'-në' réajlë'ë neda' ca runë' bönni' ni.

¹¹ Ia'stú rea' libí'ili': Ila'rúaj bönachi zían saca' ga rilén gubidza, en saca' ga ribía gubidza, ate' ila'bö'len tsözxön Abraham, en Isaac, en Jacob, yehua' yubá ni' ga rinná bë'ë Dios,

¹² pero yugu' bönni' na' gurö cazë' Dios para ila'yázië' ga na' rinná bë'ë Lë', chú'unë' légaquië' ní'lö ga na' naca chul-la, ate' ni' ila'bödxë', en ulu'til-la láyë'ë lu yöl-la' ruhu'ini quégaquië'.

¹³ Ní'irö Jesús gudxë' bönni' na' rinná bé'enë' bönni' röjáquië' gudil-la, rnnë':

—Böaj lidxu'. Ca na' réajlë'u, ca' gaca quiu'.

La' ná'asö böácatëbi' bi'i huen dxin queë' na'.

Jesús ruúnë' xiná'anu nigula queë' Pedro

(Mr. 1:29-31; Lc. 4:38-39)

¹⁴ Bidxinë' Jesús lidxë' Pedro, ate' ni' bilé'enë'-nu xiná'anu nigula queë', dënu lu da'a, en yú'unu tu xilá.

¹⁵ Gudanë' Jesús ná'anu, ate' la' burúajtë xilá na' yú'unu. Ní'irö böásanu, en bunödžjanu le gu-lahuë'.

Jesús ruúnë' zían nupa te'e

(Mr. 1:32-34; Lc. 4:40-41)

¹⁶ Cate' chiridzö' dza na', dujuá'agaquië' zían bönni' yú'ugaca bö' xihui' légaquië' ga zoë' Jesús, ate' len yöl-la' rinnësö queë' bubéajë' yugu' bö' xihui' na', en bunë' ca' yúgu'të nupa te'e.

¹⁷ Caní guca para gaca ca na' gunné' Isaías, bönni' bë'ë didza' uláz queë' Dios, gunné': "Lë' bu'ë yugu' le rizáca'ru', en bu'ë ca' yugu' yödžöhuë' queëru'."

Nupa gulë'ëni tsöjácálen Jesús

(Lc. 9:57-62)

¹⁸ Cate' bilé'enë' Jesús nacua' bönachi zían gásibi'ilë', gunná bé'enë' yugu' bönni' usëda queë' ila'dödë' ia'tsölá'a nísado' ni'.

¹⁹ Bidxinë' tu bönni' yudo' usedi ga na' zoë' Jesús, en rë' Lë':

—Bönni' Usedi, sá'lëna' Li' gáti'tës ga tseju'.

²⁰ Jesús rë' lë':

—Yugu' böza' nacua' zzan guiöj quégacaba', ate' yugu' biguínido', nudxiágacaba' xicá'agacaba', pero neda', Bönni' Guljë' Bönachi, biti' dë ga quíxaj icja'.

21 Ia'túë' bönni', náquië' bönni' usëda queë' Jesús, gudxë' Lë':

—Xan, benna neda' lataj huöja' ga idxinrö dza chibucácha'a-në' xuza'.

22 Jesús gudxë' lë':

—Gudá' neda'. Bë' lataj yugu' bönni' tati cazë' ulu'cáché'ë nupa ilátigaca quégaquië'.

Jesús ribequi dxíë' bö' budunu'

(Mr. 4:35-41; Lc. 8:22-25)

23 Gurenë' Jesús lë'e bárcodo', ate' dzágagaquië' Lë' bönni' usëda queë'.

24 Ní'irö guyecja bö' budunu' lu nísado' na', ate' riyasa ridxiáda' nísado' na' ga bidxintë riyaza nisa lë'e bárcodo' na'. Dë' rásië' Jesús lë'e barco na'.

25 Ní'irö bila'dxinë' bönni' usëda queë' Jesús ga na' zoë', ate' bulu'subanë' Lë', en të' Lë':

—Xan, busölá netu'. Chirigáchi'ru' lu nisa.

26 Bubi'ë didza' Jesús, en rë' légaquië':

—¿Bizx que rádxili'? Láti'do'os réajlë'ëli'-në' Dios.

Ní'irö guyasë' Jesús, en bulidzë' bö' na' recja, en nísado' na', ate' la' gurö'ötë dxi.

27 Bulu'bánninë' bönni' na', ta'nnë':

—¿Nuzxi caz bönni' ni? Ru'isë' didza', ate' bö' recja, en nísado' tun ca rnnë'.

Yugu' bönni' Gadara yú'ugaca bö' xihui' légaquië'

(Mr. 5:1-20; Lc. 8:26-39)

28 Cate' bidxinë' Jesús ia'tsölá'a nísado' ga na' naca lu xiyú yödzo Gadara, bila'rúajë' chopë' bönni' ga nacua' ba quégaca nupa nátigaca, dutságagaquië' Jesús. Nácagaquië' sínia', ate' cuntú nu gaca tödi la' nöza ni'.

29 La' gulu'itë' zidzaj didza' chopë' ni, ta'nnë':

—¿Bizxi ral-la'tu' quiu', Jesús, Zxí'inē' Dios? ¿Naru' bidxintso' ni dusaca' zi'u netu' zí'alö ca idxín dza queētu'?

³⁰ Ga ni' nacu'ë nacuá'aba' cuchi zián ta'daba' táguba', nacuá'aba' láti'do' ga naca zi'tu'.

³¹ Gula'naba yechi' bö' xihui' na' Jesús, en të Lë':
—Channö ubéaju' netu', benna lataj tsöjtsú'ugacatu'-ba' cuchi zián ni'.

³² Ní'irö Jesús gudxë' léguequi:

—Guli'tséaj.

La' bila'rúajtë bö' xihui', en yöjcházagaca cuchi zián ni'.

Ní'irö yúgu'tëba' cuchi zián na' yöjbíxitëgacaba' ga naca lë'e guiöj, en yöjcházagacaba' lu nísado', ga ni' gula'yépiä' nisa, en gulátiba'.

³³ Guládxinë' bönni' tu'yüé'-ba' cuchi na', ate' bulu'zxúnnajë'. Cate' bila'dxinë' lu yödzö, gula'guíxjö'ë yúgu'të lë na' guca quégaquië' bönni' ni' gula'yú'u bö' xihui' légaquië'.

³⁴ Ní'irö bila'rúaj bönachi lu yödzö ni', yöjtságagaquië' Jesús. Cate' bila'lé'enë' Lë', guláta'yüé' lahuë' uzé'ë lu xiyúgaquië' na'.

9

Jesús ruúnë' tu bönni' nacú'unië' bin (Mr. 2:1-12; Lc. 5:17-26)

¹ Ní'irö bubenë' Jesús lë'e bárcodo', en gudödë' ia'tsölá'a nísado' ni', ate' budxinë' ga naca ladzë'.

² Ni' dujuá'gaquië' tu bönni' nacú'unië' bin ga zoë' Jesús, zxoë' lu da'a yaga. Cate' bilé'enë' Jesús ca na' ta'yéajlë'ë bönni' ni Lë', gudxë' bönni' na' nacú'unië' bin, rnnë':

—Butipa ládxi'u, zxi'ina'do'. Chibuníti lahua' dul-la' nabágu'u.

³ Nacu'ë ca' bönni' yudo' tu'sédinë' ni', ate' ta'nnë' lu icja ládxi'do'gaquië', ta'nnë': “Didza' ru'ë bönni' ni ruzóa Dios tsölá'alö.”

⁴ Cate' réquibe'enë' Jesús le ta'zá' ládxi'gaquië', rë légaquië':

—¿Bizx que rizá' ládxi'li' caní le cabí naca tsahui'?

⁵ Biti' naca böniga nu guiësö bönni' ni: “Yugu' dul-la' nabágu'u chibuníti lahua'”, pero naca böniga nu gun ga huöásë', en uzé'enë'.

⁶ Na'a, uluí'ida' libí'ili' neda', Bönni' Guljë' Bönachi, dë lu na'a yöl-la' unná bë' uniti lahua' dul-la' luyú ni.

Ní'irö Jesús gudxë' bönni' na' nacú'unië' bin, rnnë':

—Guyása. Buchisa da'a yaga quiu', en böaj lidxu'.

⁷ Ní'irö la' guyásatë' bönni' na' nacú'unië' bin, en böajë' lidxë'.

⁸ Cate' bila'lé'enë' bönni' nacu'ë ni' lë ni, bulu'bánninë', ate' gula'gu'ë Dios yöl-la' ba tu' bunödziejë' yöl-la' huáca caní quégaca bönachi.

Jesús rulidzë' Mateo

(Mr. 2:13-17; Lc. 5:27-32)

⁹ Cate' buzë'ë Jesús ni', bilé'enë' bönni' lë' Mateo, rö'ë ga na' ruquíxjë' uláz que yödzo zitu', ate' Jesús gudxë' lë':

—Gudá' neda'.

Ní'irö la' guyásatë' Mateo na', ate' sa'yéajlenë' Jesús.

¹⁰ Ia'tú le guca, cate' ni' rö'ë Jesús rahuë' ga naca lidxë' Mateo, zían bönni' tu'quíxjë', en yugu' bönni'

cá'asö bila'dxinë' ga zoë', ate' gula'bõ'lenë' Jesús tsözxõn len yugu' bönni' usëda queë'.

11 Cate' bönni' yudo' fariseo bila'lë'enë' lë ni, gula'nábinë' yugu' bönni' usëda queë' Jesús, ta'nnë':

—¿Naru' bönni' rusédinë' libí'ili' rágulentsë' tsözxõn bönni' tu'quíxjë', en iá'zica'rë' bönni' dul-la'?

12 Cate' biyönnë' Jesús lë ni, rë' légaquië':

—Biti' naquíniguequinë' bönni' nácagaquië' dxi'a nu un bönachi, pero bönni' té'enë' naquíniguequinë' nu un bönachi.

13 Guli'tséaj, en buli'sëda le rnna lë na' nazúaj lu guichi lá'ayi, le rnna caní: “Rë'ënda' ulu'huéchi' ládxi'gaquië' bönni' luzá'agaquië', en calëga ilútië'-ba' bõa' bëdxi lu bucugu lá'ayi quia'.” Bida' ni, calëga para ulídzagaca'-në' bönni' tsahui', pero bida' para ulídzagaca'-në' bönni' dul-la' para ulu'bí' ládxi'gaquië'.

Rusédinë' Jesús ca ral-la' gunru' gubasa

(Mr. 2:18-22; Lc. 5:33-39)

14 Ní'irõ bönni' dá'gaquië' Juan, bönni' na' buquilé' bönachi nisa, bila'dxinë' ga zoë' Jesús, ate' gula'nábinë' Lë', ta'nnë':

—¿Bixx que na' netu', enca' yugu' bönni' yudo' fariseo, zían luzuí runtu' gubasa, pero yugu' bönni' usëda quiu' Li' biti' tunë' gubasa?

15 Bubi'ë didza' Jesús, en rë' légaquië':

—¿Naru' huácatsö ila'sëbi ládxi'gaca nupa nacuá' laní que yöl-la' rutsaga na' tsanni ni' bönni' rutsaga në'ë zóalenë' légaquië'? Za' dza cate' idúë' bönni' na' rutsaga në'ë ga nacu'ë. Dza ní'irõ ilunë' gubasa.

16 Bucúdzü'ë didza' Jesús, rnnë':

—Cuntu nu un tu lari' tēbi len lari' cubi, tu uxú'uni lari' cubi na' nugu'ē lari' tēbi na', ate' ichōza'rō lari' tēbi na'.

¹⁷ Lēasca' caní, cuntu nu bönni' riguē'ēnē' xisi uva cubi tu lu buzudi guídi gula, tu' galaj ilēbi xisi uva cubi na', en uzxuzxaj buzudi guídi gula na', ate' gaca ditaj xisi uva na', ate' initi ca' buzudi guídi na'. Rigá'aru' xisi uva cubi tu lu buzudi guídi cubi, ate' irópatē taca chí'i.

Rubanbi' bi'i nigula queë' Jairo, en ruhuóácanu tu nigula gudannu lari' nácuë' Jesús

(Mr. 5:21-43; Lc. 8:40-56)

¹⁸ Tsanni ni' Jesús ruí'ilenē' légaquiē' didza' ni, tu bönni' rinná bé'enē' bönachi judío bidxinē' ga zoë', ate' buzóa zxi'bē' lahuē' Jesús, en rē' Lē':

—Bi'i nigúlado' quia' la' gútitēbi'. Gudá ixóa no'o lēbi', ate' ubanbi'.

¹⁹ La' guzuítenē' Jesús, en sa'yéajlenē' lē'. Dzágagaquiē' bönni' usēda queë' Lē'.

²⁰ Ní'irō bidxinnu tu nigula zaca' cúdzu'lē' Jesús, chiguca chinnu iz ré'enu, biti' ruhuí'i rön queēnu que huē' quégaca cázanu nigula, ate' gudannu lari' nácuë' Jesús.

²¹ Caní bennu tu' rizá' ládxi'nu, rnnanu: Channö cansa' zxē', huóáca'.

²² Ní'irō buécjē' Jesús, en ruyúē' lēnu, ate' rē'ē-nu:

—Butipa ládxi'u, zxi'ina'do'. Chibóácateu' tu' réajlē'u neda'.

La' ná'asö böácatēnu.

²³ Cate' bidxinē' Jesús lidxē' bönni' unná bē' na', bilé'enē' nacu'ē ni' bönni' tu'cödxē' gui, en nupa ta'bödxí yechi'.

²⁴ Jesús rē' légaquiē':

—Guli'cuita ni, tu' cabí nátibi' bi'i nigúlado' ni. Rásisibi' na'.

Ní'irö nupa nacuá' ni' bulu'titaj Lë'.

²⁵ Cate' chinubéajë' Jesús bönachi na' ní'ilo, guyázië', en gudélé'ë ná'abi' bi'i nigula na', ate' la' guyásatëbi'.

²⁶ Guzë didza' ca guca lë ni, ate' bila'yöni bönachi nacuá' idútë luyú na'.

Jesús ruúnë' bönni' nachul-la guiöj lógaquië'

²⁷ Cate' Jesús burúajë' ni', chopë' bönni' nachul-la guiöj lógaquië' sôjácalenë' Lë'. Tu'ë zidzaj didza', ta'nnë':

—Zxí'ini xi'sóë' David, buéchi' ladxi' netu'.

²⁸ Cate' bidxinë' Jesús ga naca lu yu'u, bila'dxinë' chopë' bönni' na' nachul-la guiöj lógaquië' ga zoë'. Jesús gunábinë' légaquië', rnnë':

—¿Ba réajlë'ëli' neda', huáca una' libí'ili'?

Légaquië' ta'nnë':

—Ön, Xan.

²⁹ Ní'irö Jesús gudanë' guiöj lógaquië', ate' rnnë':

—Ca réajlë'ëli', ca' gaca queëli'.

³⁰ La' böáljatë guiöj lógaquië'. Ní'irö Jesús buzenë' bach légaquië', rnnë':

—Guli'gü'itica'sô ládxi'li' cuntu nu inözi lë ni.

³¹ Cate' bulu'rúajë' ni', la' bulu'zëtë' didza' idútë luyú ni' ca naca lë na' benë' Jesús.

Jesús ruúnë' tu bönni' biti' ru'ë didza'

³² Cate' Jesús, en yugu' bönni' usëda queë' bulu'rúajë' tu lu yu'u, bila'dxinë' bönni' ga zoë' Jesús nachë'gaquië' lahuë' tu bönni' biti' ru'ë didza', tu' yu'u lë' bö' xihui'.

³³ Cate' bubéajë' Jesús bö' xihui' na', la' gunnë'të bönni' na' biti' guca gu'ë didza'. Bulu'bánninë' bönni' nacu'ë ni', ta'nnë':

—Catu caz rilé'etu' le caní ladaj bönachi Israel.

³⁴ Ní'irö bönni' yudo' fariseo gula'nnë' queë' Jesús, ta'nnë':

—Bönni' ni rubéajë' yugu' bö' xihui', rugunë' dxin yöl-la' unná bë' que xángaca bö' xihui' na'.

Jesús ruhuéchi' ládxë'ë bönachi zían

³⁵ Gudë' Jesús idú gásibi'ilö gapa nacuá' yödzö zxön, en gapa nacuá' yödzödo', ate' gapa naca lu yu'u ga tu'dubë' tu'sëdë' bönni' judío queë' Dios. Rusédinë' Jesús bönachi nacuá' ni', en runë' libán que didza' dxi'a ca rinná bë'ë Dios. Bunë' yúgu'të nupa bi ta'guí'i ta'zaca' yugu' lu yödzö na'.

³⁶ Cate' Jesús bilé'enë' bönni' zían ni', buéchi' ládxë'ë légaquië', tu' ta'guí'i ta'záquië', en nudú ládxi'gaquië' ca raca quégacaba' bö'cu' zxila' biti' zoa nu ruyú légaacaba'.

³⁷ Ní'irö Jesús rë' yugu' bönni' usëda queë', rnnë':

—Le nácatë dëda' yöla, pero nabábasö nupa tu'lapa.

³⁸ Que lë ni na', guli'gáta'yu lahuë' Dios, náquië' Xan yöla na', inábili'-në' isöl-lë'ë bönni' huen dxin ulu'lapë' yöla queë'.

10

Jesús riböë' bönni' ilácagaquië' gubáz queë'

(Mr. 3:13-19; Lc. 6:12-16)

¹ Ní'irö bulidzë' Jesús idxínnutë' bönni' usëda queë', en budödë' lu ná'agaquië' yöl-la' unná bë' para ulu'béajë' bö' xihui' yú'ugaca bönachi, en

ulu'únë' yúgu'të nupa te'e, en yúgu'të nupa bi ta'gu'í ta'zaca'.

² Caní naca lágaquië' idxínnutë' gubáz na' nasöl-lë'ë Jesús:

Simón, (lë' ca' Pedro),
Andrés, (böchë'ë Simón na'),
Jacobo, (zxí'inë' Zebedeo),
Juan, (böchë'ë Jacobo na'),

³ Felipe, Bartolomé, Tomás,
Mateo, (bönni' uquízxaj),
Jacobo, (zxí'inë' Alfeo),

Lebeo, (lë' ca' Tadeo),

⁴ Simón, (bönni' ru'í ládxe'ë yödzo queë'),
Judas Iscariote, (bönni' udödë' Jesús lu ná'agaquië' bönni' ilútië' Lë').

*Jesús risöl-lë'ë gubáz queë' tsöjéngaquië' libán
(Mr. 6:7-13; Lc. 9:1-6)*

⁵ Ní'irö Jesús gusöl-lë'ë idxínnutë' bönni' ni tsöjéngaquië' libán, ate' gunná bé'enë' légaquië', rnnë':

—Biti' tséajli' ga nacua' bönachi bití' nácagaca judío, en bití' tsú'uli' ládzagaca bönachi nacua' luyú Samaria.

⁶ Guli'tséaj ga nacua' bönachi Israel, nácagaquië' ca bö'cu' zxíla'do' nanítigacaba'.

⁷ Guli'tsöjén libán, innali': "Chibidxín gala' dza Dios, Nu na' zoa yehua' yubá, inná bë'ë luyú ni."

⁸ Buli'ún nupa te'e. Buli'ún dxi'a nupa te'e huë' nudzu' ruzödi. Buli'subán nupa chinátigaca. Buli'béaj bö' xihui' yú'ugaca bönachi. Bénnasa' queëli' yöl-la' unná bë' ni. Buli'gún dxin le, en bití' bi uquízxjali'.

9 'Biti' bi guá'ali' lu buzudi queéli', calëga dumí oro, en calëga dumí plata, en calëga dumí lásido'.

10 Biti' guá'ali' yöxaj yöta queéli' le gáguli' la' nöza. Tuz lari' ixóa yenli', en biti' guá'ali' xiráchuli' o xiyaga queéli', tu' idzöli quéziné' bönni' huen dxin le gahuë'.

11 'Gáti'tës yödzo zxön o yödzo do' ga idxinli', guli'naba nuzxi naca idú ladxi' lu yödzo ni', ate' ugá'anali' lidxi nu na' cate' gála'rö dza urúajli' yödzo na'.

12 Cate' tsú'uli' tu lu yu'u, buli'gapa Dios bönachi nacua' lu yu'u na', inábili'-në' Dios unödzejë' quégaquië' le cuéqui dxi icja ládxi'do'gaquië'.

13 Channö bönachi nacua' lu yu'u ni' nácagaca lesaca', ugá'analen le ribequi dxi ladxi' na' léguequi, pero channö bönachi na' cabí nácagaca lesaca', inábali' cabí ugá'ana lë na' ribequi dxi ladxi' len léguequi.

14 Gáti'tës ga idxinli' ga bönachi ni' biti' ilún libí'ili' bal, en biti' ulu'zë nagui xtídza'li', buli'rúaj lu yu'u ni' o yödzo ni', ate' guli'cuíbi bëchtö da' lë'e lábali', le ulu'í' léguequi nabága'gaca xíguia'.

15 Le nácatë rea' libí'ili', cate' idxín dza ichúguië' Dios quégaca bönachi, ila'gu'í' ila'záca'rö bönachi yödzo na' ca ila'gu'í' ila'záca' bönachi gula'cuá' yödzo Sodoma, en yödzo Gomorra, nupa ni' busunítië' Dios.

Nupa biti' ta'yéajlë' ulu'saca' zi' nupa dá'gaca Cristo

16 Gunnë' ca' Jesús:

—Buli'yútsöca', neda' risöl-la'a libí'ili', ate' gácali' ca bö'cu' zxíla'do' ta'daba' ga dzö'öba' bö'cu' gu'ía

sínia'. Guli'gaca sina' ca nácagacaba' sina' bëla sínia', pero guli'gaca ca' nōxaj ladxi' ca nácagacaba' gu'dōdo'.

17 Guli'gún chi'i cuinli' quégaca bōnachi, tu' ulu'dödë' libí'ili' lu ná'agaquië' bōnni' yúlahui', en ila'guiné' libí'ili' gapa naca lu yu'u ga tu'dubë' tu'sëdë' bōnni' judío queë' Dios.

18 Lësca' caní, ila'chë'ë libí'ili' lógaquië' bōnni' lo, en lógaquië' bōnni' ta'nná bë'ë, tu' dá'ali' neda'. Caní gaca para gaca gunli' ba nalí quia' lógaquië' bōnni' ni', en lógaquië' bōnni' biti' nácagaquië' judío.

19 Ní'irō cate' ulu'dödë' libí'ili' lu ná'agaquië' bōnni' unná bë' na', biti' cō'oli' bōniga nacxi innali', tu' ichizë' Dios icja lādxi'do'oli' didza' gü'ili', en ca innali' la' dza ná'asö.

20 Calëga libí'isili' na' innali', pero Dios Bö' Lá'ayi, Nu na' risöl-lë'ë Xúziru' Dios queëli', Lë cazë' sóalenë' libí'ili', en gu'ë didza'.

21 'Ila'cuá' bōnachi ulu'dōdi böchi'guequi lu ná'agaquië' bōnni' ilútië' légaquië', en lësca' caní, bōnni' nácagaquië' xuz ulu'dödë' xzí'inigaquië', ate' ila'cuá'abi' bi'i ila'dá'baga'bi' xúzgacabi', en ilunbi' ga ilátië' xúzgacabi' na'.

22 Yúgu'të bōnachi ulu'zóa libí'ili' tsölá'alö tu' dá'ali' neda', pero nu ugá'ana tsutsu ga idxinrö dza údxi, nu ni ulá.

23 Cate' ulu'saca' zi' bōnachi libí'ili' tu lu yödzo, buli'zxunnaj ni', ate' tséajli' ia'tú yödzo, tu' rea' libí'ili', huöda' neda', Bōnni' Guljë' Bōnachi, zí'alö cate' údxi gunli' libán gapa nacúa' yugu' yödzo quégaca bōnachi Israel.

24 Núti'tës bōnni' náquië' bōnni' usëda biti' nácarë' lo ca nu rusëdi lë', en lësca' caní, nu bōnni' náquië'

huen dxin biti' nácarë' lo ca xanë'.

²⁵ Nu na' naca bönni' usëda ral-la' udzéjanë' channö huadéli'në' gáquië' ca naca nu rusëdi lë', ate' bönni' huen dxin na' ral-la' udzéjanë' channö gáquië' ca naca xanë'. Channö ta'nnë' quia' neda', bönni' xan yu'u, ta'nnë' naca' Belzebú tu' xihui', ila'nnë' zí'irë' quégaca bönachi tá'gaquië' neda'.

Nu ral-la' gádxiru'

(Lc. 12:2-9)

²⁶ Gunnë' ca' Jesús:

—Que lë ni na', biti' gádxili' bönachi. Hualá' lahui yúgu'të le raca bëdxi lándos, ate' huáca bë' yúgu'të le nagachi'.

²⁷ Yugu' didza' ruí'ilena' libí'ili' ga naca chulla, guli'quixjö' ga naca lu bení', ate' le rea' libí'ili' ga nagachi', guli'nnë' zidzaj ga naca lahui' lógaca bönachi.

²⁸ Biti' gádxili' nupa tuti le nácgaca caz bönachi, pero biti' gaca ulu'suniti bö' naca cázaru'. Guli'gadxi Dios, Bönni' na' gaca gútië' idútë le nácali', en chú'unë' bö' naca cázali' lu guí' gabila.

²⁹ 'Ta'dá'uba' chópaba' biguínido' len tu dumí lásido', pero biti' ibíxiba' tuba' lu yu channö cabí ru'ë Xúziru' Dios lataj gaca caní.

³⁰ Lësca' caní, nabábagaca yúgu'të guitsa' ícjali' lahuë' Dios.

³¹ Que lë ni na', biti' gádxili'. Ruí'tërö lándxë'ë Dios libí'ili' ca ruí'i lándxë'ë-ba' zianba' biguínido'.

Yugu' bönni' ta'zí' lu ná'agaquië' Cristo lógaca bönachi

(Lc. 12:8-9)

³² Gunnë' ca' Jesús:

—Nu bönni' si' lu në'ë neda' lógaca bönachi, neda' si' lu na'a bönni' na' lahuë' Xuza' zoë' yehua' yubá.

³³ Bönni' ta'dá'baguë'ë lógaca bönachi, ila'nné' biti' ta'dë'ë neda', lësca' caní neda' tá'baga'a légaquië' lahuë' Xuza' zoë' yehua' yubá.

Jesús náquië' le run ga ila'rúaj choplö bönachi

(Lc. 12:51-53; 14:26-27)

³⁴ Gunnë' ca' Jesús:

—Biti' guéquili' za'a idigu'a le ribequi dxi bönachi yödzölió ni. Biti' za'a idigu'a le ribequi dxi, pero za'a idigu'a le gun ga ila'rúaj choplö bönachi.

³⁵ Za'a ni, ate' guna' ga ila'dá'baga' bönachi xúzguequi, ate' yugu' nigula ila'dá'baga'nu ca' xiná'agacanu. Lësca' caní, yugu' nigula zxoá' lídxigacanu ila'dá'baga'nu xto' xzí'ininu.

³⁶ Caní gaca, la' di'a dzasö quégaca bönachi ulu'saca' zi' luzé'eguequi.

³⁷ Nu nadxí'irö xuz xinë'e ca nadxí'i neda', biti' naca bachi nu na' ta' neda', ate' nu nadxí'irö bi'i bönni' que o bi'i nigula que ca nadxí'i neda', biti' naca bachi nu na' ta' neda'.

³⁸ Nu biti' si' lu në'e gaca ca tu bönni' söjtë'ë lë'e yaga cruz, en ta' neda', biti' naca bachi guequi quia' neda'.

³⁹ Nu ruí'i ladxi' gun chi'i yöl-la' na'bán que, uniti le, pero nu uniti yöl-la' na'bán que tu' da' neda', ulá nu na'.

Yugu' le ubi'ë Dios queëru'

(Mr. 9:41)

⁴⁰ Gunnë' ca' Jesús:

—Nu gun libí'ili' bal, neda' ca' gun bal, ate' nu na' gun neda' bal, gun bal ca' Dios Xuz nasöl-lë'ë neda'.

41 Nu gun bal tu bönni' ru'ë didza' uláz queë' Dios tu' ru'ë didza' uláz queë' Dios, huadeli' nu na' lu në'ë Dios la' leze na' idéli'në' bönni' ru'ë didza' uláz queë' Dios. Lësca' caní, nu gun bal tu bönni' tsahui' tu' náquië' bönni' tsahui', huadeli' nu na' lu në'ë Dios la' leze na' idéli'në' bönni' tsahui'.

42 Núti'tës nu unödzej queë' tu bönni'do' ni tu zx-ibíndo'os nisa tu' náquië' bönni' usëda quia' neda', le nácatë rea' libí'ili', biti' uniti nu na' le ral-la' si' lu në'ë Dios.

11

Ta'dxinë' bönni' nasöl-lë'ë Juan ga zoë' Jesús (Lc. 7:18-35)

1 Cate' Jesús budxi buzéajni'inë' yugu' bönni' usëda queë', buzë'ë ni', sa'yéajë' röjsédinë' bönachi, en röjenë' libán yugu' lu ládzagaca bönachi na'.

2 Juan, bönni' buquilë' bönachi nisa, ni' yu'ë lidxi guië', ate' biyönnë' ca nácacaca le runë' Jesús. Ní'irö Juan na' gusöl-lë'ë chopë' bönni' dá'gaquië' lë', ate' bila'dxinë' ga na' zoë' Jesús.

3 Chopë' ni gula'nábinë' Jesús, të' Lë':

—¿Nacu' Li' Cristo, Bönni' na' ral-la' idxinë' yödzülió ni, o ral-la' cöztu' dza idxinë' ia'tüë' bönni'?

4 Bubi'ë didza' Jesús, rë' légaquië':

—Guli'tséaj tsöjtíxjöi'ili'-në' Juan lë ni riyönilí', en rilé'eli'.

5 Guli'tsöjödxe' ca raca, tu'lé'enë' bönni' guchul-la guiöj lógaquië', ate' tu'zë'ë bönni' biti' guca ila'dë'. Nuhuöácagaquië' bönni' gü'iguequinë' huë' nudzu' ruzödi, ate' ta'yönnë' bönni' gula'cödzuë'. Nnita' nabángaquië' bönni' gulátië', ate' raca libán que didza' dxi'a lógaca bönachi yechi'.

6 Bica' ba nu bönni' biti' gáquië' chopá ládxe'ë, biti' ubéaj ládxe'ë neda'.

7 Cate' yugu' bönni' na' dá'gaquië' Juan bulu'zë'ë sōjhuōjgaquië', ní'irō gusí lahuë' Jesús ru'ilenë' bōnachi nacuá' ni' didza' ca naca queë' Juan na'. Rë' légaquië':

—¿Bizxi gú'unili' ilé'eli' cate' ni' guyéajli' lu lataj cá'asō? ¿Naru' gú'unili' ilé'eli'-në' tu bönni' náquië' ca tu gui ruzecaj bö' recja le?

8 Channō cabí, ¿bizxi gú'unili' ilé'eli'? ¿Naru' gú'unili' ilé'eli'-në' tu bönni' nácuë' lari' dxí'ado? Nōz quézili' bönni' nácugaquië' lari' dxí'ado' nacu'ë lídxigaquië' bönni' ta'nná bē'ë.

9 Channō cabí, ¿bizxi gú'unili' ilé'eli'? ¿Naru' gú'unili' ilé'eli'-në' tu bönni' ru'ë didza' uláz queë' Dios? Ca' naca, réquida'. Rea' libí'ili', bilé'eli'-në' tu bönni' nácatërë' lo ca ia'zica'rë' bönni' gulu'ë didza' uláz queë' Dios.

10 Caní naca, tu' náquië' Juan bönni' na' ru'í didza' le nazúaj lu guichi lá'ayi ca naca queë', le rnna: Buyú, risöl-la'a bönni' gubáz quia', inōruë' ca Li'. Lë' upë'ë nōza ga tödu'.

11 Le nácatë rea' libí'ili'. Idútë yōdzōlió ni, cuntu nu zoa nácarō lo ca Juan, bönni' ni' buquilë' bōnachi nisa, pero nu naca cuídi'do'os ga rinná bē' Nu na' zoa yehua' yubá nácatërō lo ca Juan na'.

12 'Cate' ni' gusí lahuë' buquilë' Juan bōnachi nisa, ga ridxintë na'a dza, bayudxi túngaca bōnachi para ta'yaza ga rinná bē'ë Bönni' na' zoë' yehua' yubá, ate' nupa tunsō bayudxi ta'deli' le.

13 Ga bidxintë dza na' blë'ë Juan, le rinná bē' xibá queë' Moisés, en le bulu'zúajë' lu guichi

yúgu'tè bönni' gulu'ë didza' uláz queë' Dios gulu'í didza' ca rinná bē'ë Bönni' na' zoë' yehua' yubá.

14 Channö ré'ënili' si' lu ná'ali' lē ni, ral-la' inözili' Juan na' náquiē' Elías, bönni' ni' bē'ë didza' uláz queë' Dios, bönni' na' Dios gunnē' ral-la' ilá' lahuē' leyúbölö dza ni zóaru' na'a.

15 Nu zoa nagui, en riyöni ral-la' uzē nagui.

16' ¿Bizxi ubéqui'tseda' ca nácacaca bönachi nacuá' dza ni zóaru' na'a? Nácacaguiē' ca yugu' bí'ido' ta'bö'öbi' lu yé'ëyi. Zidzaj tu'lídzabi' luzá'agacabi',

17 ta'nabi': "Rucódxitu' queéli' gui. ¿Bizx que bití' ruyá'ali'? Rul-la yéchi'tu' queéli'. ¿Bizx que bití' ribödxí yéchi'li'?"

18 Caní nácali', tu' bidē' Juan, ate' tu' cabí gü'í gudahuē' ca ráguli' libí'ili', gunnēli' queë', gunnali': "Tu' xihui' dzágui lē'."

19 Ní'irö bidxina' neda', Bönni' Guljē' Bönachi, ate' re'aj rahua', ate' rnnēli' quia', rnnali': "Náquiē' bönni' huágulē'ë, en bönni' re'jē'. Náquiē' luzá'agaguiē' bönni' uquízxaj, en ia'zíca'rö huen dul-la'." Yöl-la' réajni'i queë' Dios naca bē' ni'a que le tun nupa ta'zí' lu nē'eguequi le.

*Le gaca que nu bití' run ca rnna xtídzē'ë Dios
(Lc. 10:13-15)*

20 Ní'irö gusí lahuē' Jesús ruzenē' bach bönachi nacuá' yugu' yödzö gapa ni' benē' zían yöl-la' huáca, tu' cabí tu'bí'ini ládxi'guequi.

21 Gudxē' léguequi:

—Bica' bayechi' libí'ili', bönachi Corazín. Bica' bayechi' libí'ili', bönachi Betsaida. La'tu' gulaca lu yödzö Tiro, en lu yödzö Sidón yugu' yöl-la' huáca bena' ga zóali', dza ní'tөлö ulu'bí'í ládxi'gaca bönachi

yödzö Tiro, en yödzö Sidón na', en ilácugaca lari' tëbi, en ulu'dxía dö ícjaguequi, le ulu'luí'i tu'bí'i ládxi'gaca bönachi na'.

²² Na'a, neda' rea' libí'ili', cate' idxín dza ichúguië' Dios quégaca bönachi, quí'i sáca'röli' libí'ili' ca ila'guí'i ila'zaca' bönachi yödzö Tiro, en yödzö Sidón, nupa na' busunítië' Dios.

²³ Libí'ili', bönachi Capernaum, guca queëli' ca bidxíntëli' ga nu riyaza yehua' yubá. Huötjali' lu guí' gabila. La'tu' gulaca yugu' yöl-la' huáca bena' ga zóali' lu yödzö Sodoma, ulu'gá'ana bönachi yödzö ni' ga ridxintë na'a dza.

²⁴ Na'a, neda' rea' libí'ili', cate' idxín dza ichúguië' Dios quégaca bönachi, quí'i sáca'röli' libí'ili' ca ila'guí'i ila'zaca' bönachi Sodoma na'.

*Rnnë' Jesús: "Guli'dá ga zoa', uzí' ládxi'li'"
(Lc. 10:21-22)*

²⁵ Dza na' bë'ë didza' Jesús, rnnë':

—Xuza', nacu' Xani yehua' yubá, en Xani luyú ni. Rigu'a Li' yöl-la' ba, tu' bucáchu'u lë ni, para cabí ila'lé'enë' bönni' ta'yéajni'ide'enë' le, pero bu-luí'inu' nupa náacagaca ca yugu' bí'ido' le.

²⁶ Ca' gaca, Xuza', tu' caní guyaza ládxi'u Li'.

²⁷ Yúgu'të nudödë' Xuza' lu na'a. Cuntu nu nunbë' neda', Zxí'inë' Dios, pero tuzë' Dios Xuz, en cuntu nu nunbë' Dios Xuz, pero tuza' neda', Zxí'inë' Dios, enca' nupa na' rë'ënda' uluí'ida' léguequi Dios Xuz.

²⁸ Guli'dá ga zoa' yúgu'tëli' röjxéqui'li' tu' rúntica'sili' dxin que yöl-la' yudo', en nuá'ali' yua' zí'i quégaca xibá que, ate' neda' guna' ga uzí' ládxi'li'.

²⁹ Lu yöl-la' nöxaj ladxi' queëli' guli'gún xichina', gácali' ca bëdxi ta'zí'iba' yugu' quegacaba'. Guli'sëda lu na'a neda', tu' naca' nöxaj ladxi', en do' ladxi', ate' idzöli yöl-la' ruzí' ladxi' queëli', le cuéqui dxi ládxi'li'.

³⁰ Yugu' na' ugu'a libí'ili', le naca le inná bé'eda' libí'ili', bití' naca böniga, ate' yua' ugu'a libí'ili' le naca le rusédida', dzá'do'os naca.

12

*Ta'lecjè' do bönni' usëda queë' Jesús dza lá'ayi
(Mr. 2:23-28; Lc. 6:1-5)*

¹ Dza ni', le naca dza lá'ayi quégaquië' bönni' judío, gudödë' Jesús gapa dë yöla zxoa' xtila, ate' ta'dunë' bönni' usëda queë', en gusí lógaquië' ta'lecjè' do ga dxía zxoa' xtila, en tahuë' zxoa' xtila na'.

² Cate' bila'lé'enë' bönni' yudo' fariseo lë ni, të Jesús:

—Buyútsöca', tunë' bönni' usëda quiu' le cabí ral-la' gunru' dza lá'ayi.

³ Ní'irö Jesús gudxë' légaquië':

—¿Naru' cabí nulábanili' lu guichi lá'ayi bi benë' David cate' gudunë', ate' gula'dún ca' nupa gula'cuá'len lë'?

⁴ Guyu'ë lu yu'u queë' Dios, en gudahuë' yugu' yöta xtila nagú'ugaquië' lu bucugu lá'ayi, le cabí ral-la' gahuë' lë', en bití' ral-la' ilahuë' bönni' gula'cuá'lenë' lë', pero légacsë' bixúz dë lataj ilahuë' le.

⁵ ¿Naru' cabí nulábanili' le rinná bë' xibá queë' Moisés ca tunë' bixúz yugu' dza lá'ayi? Tunë'

dxin lö'a yudo' yugu' dza lá'ayi, en biti' ta'báguë'ë xíguia'.

⁶ Na'a, neda' rea' libí'ili', zoa' neda' ni, en naca' bönni' nácarë' lo ca yudo'.

⁷ Biti' réajni'ili' lë na' nazúaj lu guichi lá'ayi, le rnna: "Ré'ënda' huéchi' ládxi'li' luzá'ali', en calëga gútigacali'-ba' böa' bédxido' ruzégui'gacali'-ba' lu bucugu lá'ayi quia'." La'tu' réajni'ili' lë ni, biti' ichúguli' quégaca nupa biti' nabága'gaca xíguia'.

⁸ Ca' naca, tu' naca' neda', Bönni' Guljë' Bönachi, Xani dza lá'ayi.

Jesús ruúnë' tu bönni' narequi' në'ë

(Mr. 3:1-6; Lc. 6:6-11)

⁹ Ní'irö buzë'ë Jesús ni', ate' guyu'ë lu yu'u ga tu'dubë' bönni' judío, en tu'sédë' queë' Dios.

¹⁰ Lu yu'u na' zoë' tu bönni' narequi' në'ë, ate' tu' t'ënnë' bönni' judío unná bë' ila'dzölinë' bi ulu'zégui'ë Jesús didza', que lë ni na' gula'nábinë' Lë', ta'nnë':

—¿Naru' dë lataj unru' nu re'e cate' naca dza lá'ayi?

¹¹ Bubi'ë didza' Jesús, rë' légaquië':

—Nu bönni' nútsë'ë ládjali', channö zóaba' tuba' bö'cu' zxila' queë', en channö ibíxiba' lu yeru cate' naca dza lá'ayi, ¿naru' cabí tsöjxönë'-ba', en tsöjléajë'-ba'?

¹² Nazáca'tërë' tu bönni' ca tuba' bö'cu' zxila'. Que lë ni na', dë lataj gunru' le naca dxi'a quégaca bönachi cate' naca dza lá'ayi.

¹³ Ní'irö Jesús gudxë' bönni' huë' na':

—Bulí no'o.

Cate' bulí në'ë, la' böácatë dxi'a ca naca ia'tsölá'a në'ë.

14 Ní'irö bulu'rúajë' bönni' yudo' fariseo na', ate' gulún xtídza'gaquië' para gaca ilútië' Jesús.

Le gunnë' tu bönni' bë'ë didza' uláz queë' Dios ca ral-la' gaca queë' Jesús

15 Cate' réquibe'enë' Jesús lë ni, buzë'ë ni', ate' sōjácalen bōnachi zían Lë'. Jesús bunë' yúgu'të nupa te'e lada'j bōnachi na',

16 en gunná bé'enë' léguequi biti' usiyōnguequi bōnachi Nu náquië'.

17 Caní gunnë', para gaca lë na' gunnë' Isaías, bönni' bë'ë didza' uláz queë' Dios, gunnë':

18 Buli'yútsöca', Bönni' ni náquië' Huen Dxin quia', na' gurō caza' neda' Lë'.

Nadxí'ida' Lë', en raza lādxa'a Lë'.

Ichiza' Lë' Bō' Lá'ayi.

Lë' usiyōnnë' yúgu'të bōnachi ca guna',

uchi'a usōrōa' quéguequi.

19 Cuntu nu tíl-lalenë' didza', en biti' ulidzë' zidzaj.

Cuntu nu yōni chi'ë ga naca zi'tu'.

20 Tu guído' zoa bō biti' quitsjë' le,

ate' guí' chizóa ulu, biti' usúluë' le,

cate' uzóarë' le naca tsahui' queë'.

21 Yúgu'të bōnachi ilún löza Lë'.

Ta'nnë' bönni' judío unná bë': "Dzaga Jesús tu xihui'"

(Mr. 3:19-30; Lc. 11:14-23; 12:10)

22 Ní'irö dujuá'gaquië' tu bönni' ga zoë' Jesús, nachul-la lahuë', en biti' raca gu'ë didza', tu' yu'u bō' xihui' lë', ate' Jesús bunë' bönni' na'. Caní guca, rilé'enë', en ru'ë didza' bönni' na' guchul-la lahuë', en biti' guca gu'ë didza'.

23 Que lë ni na' bulu'bani yúgu'të bönachi nacuá' ni', ta'nná:

—¿Naru' nácatsë' bönni' ni Zxí'ini Xi'sóë' David, Bönni' na' ral-la' guídë'?

24 Cate' bila'yönnë' bönni' yudo' fariseo lë ni, ta'zá' ládxe'ë, ta'nnë': Bönni' ni rubéajë' yugu' bö' xihui' tu' dzaga Beelzebú tu' xihui', xángaca bö' xihui', Lë'.

25 Réquibe'enë' Jesús lë na' ta'zá' ládxi'gaquië', ate' rë' légaquië':

—Gátitës ga ta'nná bë' bönachi, channö bönachi ni' ila'rúaj choplö, en ila'díl-lalen luzë'eguequi, initi yöl-la' unná bë' quëguequi. Lësca' caní, channö ila'rúaj choplö bönachi nacuá' tu yödzö o tu yu'u, en ila'dil-la, bití' gaca ila'día' bönachi nacuá' yödzö na' o yu'u na'.

26 Lësca' caní, channö ubéaj Satanás tu' xihui' la' luzë'esö, ate' yugu' bö' xihui' na' ila'díl-lalen la' léguequisö, ¿naru' idía' yöl-la' unná bë' que tu' xihui'?

27 Rnnali' quia' rubéaja' yugu' bö' xihui' tu' dzaga Beelzebú tu' xihui' neda'. Channö runa' caní, ¿nuzxi dzaga nupa dá'gaca libí'ili' cate' tu'béaj yugu' bö' xihui'? Que lë ni na' le túngaca caz naca bë' nachíxili'.

28 Na'a, channö neda' rubéaja' yugu' bö' xihui' tu' zóalen yöl-la' huáca queë' Dios Bö' Lá'ayi neda', le nácate' chibidxín le rinná bë'ë Dios ga zóali'.

29 '¿Naru' huácatsö nu bönni' tsu'ë lidxë' bönni' nal-la, en cuéajë' yöl-la' tsahui' dzö'ö lidxë' channö cabí gúguë'ë bönni' nal-la na' zí'alö? Ní'irö gaca tsu'ë, en ulatjë' lidxë' bönni' nal-la na'.

³⁰ 'Nu biti' run neda' tsözxön, ridá'baga' neda', en nu biti' rutubi tsözxön len neda', rusilasi nu na'.

³¹ 'Que læ ni na' rea' libí'ili', ca naca yúgu'të dul-la' tun bönachi, en yugu' didza' xihui' ta'nná, uniti lahuë' Dios léguequi, pero nu bönni' innë zi'ë queë' Dios Bö' Lá'ayi, biti' ca' uniti lahuë' Dios læ'.

³² Lësca' caní, nu bönni' innë' quia' neda', Bönni' Guljë' Bönachi, Dios uniti lahuë' læ', pero nu bönni' innë' queë' Dios Bö' Lá'ayi, biti' ca' uniti lahuë' Dios læ'. Biti' uniti lahuë' læ' dza ni zóaru' na'a, en biti' uniti lahuë' læ' dza si' za'.

Le runru' naca bë' le nácaru'
(Mt. 7:15-20; Lc. 6:43-45)

³³ Gunnë' ca' Jesús:

—Channö naca dxi'a tu yaga, cuía le naca dxi'a, pero channö naca cá'asö yaga na', cuía ca' le naca cá'asö. Caní naca, le ribía tu yaga naca bë' yaga na'.

³⁴ Libí'ili' nácali' di'a dza quégacaba' bëla sínia'. ¿Nacxi gaca güí'ili' dxi'a didza', channö cabí nácali' dxi'a? Ca naca le ta'zá' ládxi'gaca bönachi, lësca' caní tuí'i didza'.

³⁵ Tu bönni' tsahui' ru'ë didza' tsahui' tu' yu'u le naca tsahui' icja ládxi'da'ahuë', pero tu bönni' huiá' dö' ru'ë didza' biti' naca tsahui' tu' yu'u le cabí naca tsahui' icja ládxi'da'ahuë'.

³⁶ Que læ ni na' rea' libí'ili', cate' idxín dza ichúguië' Dios quégaca bönachi, uchi'a usöröë' tu tu bönni' ca naca yúgu'të didza' gula'nnazë' ca'.

³⁷ Ca naca didza' ru'u, uchi'a usöröë' li', ate' uruju' tsahui' o ibágu'u xíguia' ni'a que didza' na' bë'u.

Ta'nábinë' Jesús gunë' le gaca bë' nu náquië'
(Mr. 8:12; Lc. 11:29-32)

38 Ní'irō bulu'bi'ë didza' yugu' bönni' yudo' fariseo, en yugu' bönni' yudo' tu'sédinë', en tē Jesús:

—Bönni' Usedi, ré'ënitú' ilé'etu' tu le gunu' le gaca bē' dē lu no'o yöl-la' unná bē'.

39 Bubi'ë didza' Jesús, en rē légaquië':

—Yugu' bönni' tuá' dö' ni, bití' zoa idú lādxi'do'gaquië', ta'nábinē' neda' guna' tu le gaca bē' nu naca'. Bití' bi le gaca bē' ila'lé'enē', pero le naca bē'sō na' ca guca queë' Jonás, bönni' bē'ë didza' uláz queë' Dios.

40 Ca na' guca queë' Jonás na', bugá'anē' lē'ëba' tu böla zxon idú tsonna dza tsonna yēla, lēscá' caní gaca quia' neda', Bönni' Guljē' Bönachi, tsonna dza tsonna yēla ugá'ana' zxan yu.

41 Ila'yasē' bönni' gula'cu'ë yödzö Nínive dza ichúguië' Dios quégaca bönachi cate' uchi'a usöröë' bönachi nacuá' dza ni zóaru' na'a, ate' le gulunē' usubaga' bönachi ni xíguia' tu' bulu'bí'i lādxi'gaquië' bönni' Nínive na' cate' ni' busiyönnē' Jonás légaquië' xtídzē'ë Dios, ate' na'a zoa' ni neda', en nácatēra' lo ca Jonás na'.

42 Lēscá' caní, nigula ni' gunná bé'enu yödzö dē saca' ga ridōdi gubidza beo' ziaga chásanu dza ichúguië' Dios quégaca bönachi cate' uchi'a usöröë' bönachi nacuá' dza ni zóaru' na'a, ate' le bennu usubaga' légaquië' xíguia', tu' birúajnu nigula na' ga nácatērō zi'tu' para yōninu didza' réajni'i bē'ë Salomón, ate' na'a zoa' ni neda', en nácatēra' lo ca Salomón na'.

Cate' rudxín tu bö' xihui' xilataj

(Lc. 11:24-26)

43 Gunnē' ca' Jesús:

—Cate' rirúaj tu bö' xihui' yu'u bönni', ridá gapa nabadxi, riguilaj ga uzi' ladxi'. Channö cabí idzöli ga na' uzi' ladxi',

⁴⁴ ní'irö inná: “Huöja' xilatja' ga ni' birúaja.” Cate' udxín ga ni' birúaj, tsöjxaca' bönni' na', náquië' ca tu yu'u nadachi', en nalúaj, en chinabá'a para nu tsöjsóa ni'.

⁴⁵ Ní'irö tseaj, tsöjzxi' ia'gadxi bö' xihui' nácacatërö xihui' ca le, ate' ila'yaza yúgu'të, en ila'cuá' icja ládxida'ahuë' bönni' na', ate' ga údxi huayáli'tërö ca gaca queë' bönni' na' ca guca queë' zí'alö. Lësca' caní gaca quégaca bönachi tuá' dö' ni.

Xin'ë Jesús, en yugu' bönni' böchë'ë

(Mr. 3:31-35; Lc. 8:19-21)

⁴⁶ Cate' ni' ru'ilenë' Jesús bönachi didza' ni, xin'ë, en yugu' bönni' böchë'ë bila'dxinë' ni'. Gula'cu'ë lö'alö, en gulë'ëniaguequinë' ilu'ilenë' Jesús didza'.

⁴⁷ Ní'irö tu bönni' busiyönnë' Jesús, en rë' Lë':

—Buyútsöca', nacu'ë xinó'o, en yugu' bönni' böchu'u lö'alö, en të'ënnë' ilu'ilenë' Li' didza'.

⁴⁸ Bubi'ë didza' Jesús, en rë' bönni' na' busiyönnë' Lë' caní, rnnë':

—¿Nözili' nuzxi caz xiná'a, en nupxi caz bönni' böcha'a?

⁴⁹ Ní'irö bulí në'ë, en bulu'e yugu' bönni' usëda queë', en rnnë':

—Bulí'yútsöca', bönni' ni nácaquië' ca xiná' caza', en yugu' böchi' caza'.

⁵⁰ Núti'tës nu run ca rë'ëni quézinë' Xuza' zoë' yehua' yubá, nu ni naca bi'i böchi' caza', en bi'i zan caza', en xiná' caza'.

13

*Rucúdzu'ë didza' Jesús ca naca queë' tu bönni' guz
(Mr. 4:1-9; Lc. 8:4-8)*

¹ La' dza ní'sö birúajë' Jesús niu' yu'u, ate' yöjchö'ë ra' nísado'.

² Tu' bila'dxín bönachi zián ga zoë' Jesús, gurenë' tu lë'e bárcodo', en gurö'ë ni', ate' bönachi zián na' gula'cuá' luyú bidxi ra' nísado' na'.

³ Ní'irö Jesús bé'lenë' légaquië' didza', zián le busédinë' légaquië'. Bucúdzu'ë didza', rnnë':

—Buli'yútsöca', birúajë' tu bönni' guz, søjësië' xisedo'.

⁴ Tsanni ni' søjësië', bal-la xisedo' na' gulasi ra' nöza, ate' bila'dxinba' biguínido', en gulé'ajba' xisedo' na'.

⁵ Gulasi ia'zica'rö xisedo' na' luyú ga rö'ö guiöj, ga na' rö'ö láti'sö yu, ate' la' gula'lentë, tu' cabí rö'öda' yu ni'.

⁶ Ní'irö cate' budzá'a gubidza, lë na' bësië' la' gula'cuáditë, en gula'bidxi, tu' cabí dë ga ilún luí.

⁷ Gula'lén ia'zica'rö xisedo' na' ga bulu'lén lubá yötsi', ate' gula'zxön lubá yötsi' na', en bila'röli lë na' bësië', en gulún ditaj le.

⁸ Gulasi ia'zica'rö xisedo' na' ga naca luyú bëbu, ate' bulu'nödzej. Bal-la lë na' bësië' bulu'nödzej ia'tú gayuá'tërö ca'. Ia'zica'rö bulu'nödzej ia'tsónnalalaj ca', ate' ia'zica'rö bulu'nödzej ia'chí uruá' ca'.

⁹ Nu zoa nagui, en riyöni, ral-la' uzë nagui.

*Le t'ëni ilún le bucúdzu'ë Jesús didza'
(Mr. 4:10-12; Lc. 8:9-10)*

10 Ní'irö bila'dxinë' bönni' usëda queë' Jesús ga zoë', en gula'nábinë' Lë', ta'nnë':

—¿Bizx que ru'ilenu' bönachi didza' yugu' le rucúdz'u didza'?

11 Bubi'ë didza' Jesús, en rë' légaquië':

—Dios ru'ë libí'ili' lataj tséajni'ili' le nagachi' ca rinná bë'ë Lë' yehua' yubá, pero bönachi ni bití' tē'ëni ila'yéajni'í.

12 Nu si' xtídzë'ë, Dios unödzejë' que ia'lati', ate' gáta'da'arö que, pero nu bití' si' le, la's dui le dë que udúa.

13 Que lë ni na' ru'ilena' légaquië' didza' yugu' le rucúdz'u'a didza', tu' tu'yúë' pero bití' ta'lé'enë'. Ta'yönnë' pero bití' tu'zë nágagaquië', en bití' ta'yéajni'inë'.

14 Caní raca quégaquië' para gaca ca na' gunnë' Isaías, bönni' bë'ë didza' uláz queë' Dios, gunnë':

Le nácatë yönili' pero bití' tséajni'ili'.

Uyuli' iná'ali' pero bití' ilé'eli'.

15 Caní raca tu' nazidi ládxi'do'gaca bönni' ni, en bití' bi riyaza icja nágagaquië'.

Nadzudi' guiöj lógaquië',

para cabí ila'lé'enë' len guiöj lógaquië' na'.

Bití' ulu'zë nágagaquië',

en bití' ulu'zéajni'í ládxi'gaquië',

en bití' ulu'huóáquië' quia' neda'

para gaca una' légaquië'.

16 'Na'a, bica' ba libí'ili', tu' rilé'e guiöj loli', en riyöni nágali'.

17 Le nácatë rea' libí'ili', zían bönni' gulu'ë didza' uláz queë' Dios en yugu' bönni' tsahui' gulë'ënnë' ila'lé'enë' le rilé'eli' libí'ili' pero bití' bila'lé'enë' le.

Gulë'ënnë' ila'yönnë' le riyönili' libí'ili' pero biti' bila'yönnë' le.

Rigúxjö'ë Jesús le bucúdu'ë didza'
(Mr. 4:13-20; Lc. 8:11-15)

¹⁸ Gunnë' ca' Jesús:

—Buli'zé nágali' ca naca le bucúdu'a didza' que bönni' guz.

¹⁹ Núti'tës nu riyöni didza' ca rinná bë'ë Dios yehua' yubá, en biti' réajni'i le, raca que didza' riyöni nu na' ca guca que xisedo' na' gulasi ra' nöza. La' za'të tu' xihui', en rugúa didza' na' guyú'u icja ládxi'da'ahuë' bönni' na'.

²⁰ Xisedo' na' gulasi luyú ga rö'ö guió'j rulu'i ca raca queë' bönni' riyönnë' didza' na', en la' ruzëtë náguië' lu yöl-la' rudzeja queë',

²¹ pero ca na' biti' ridía' xisedo' na' tu' cabí dë ga gun luí, lësca' caní raca queë' bönni' ni. Cate' idxín tu le usaca' zi' lë', ate' ila'bía' nágaca bönachi lë' tu' nazí' lu në'ë didza' na', la' gácatë chopa ládxe'ë.

²² Xisedo' na' gulasi ga na' bulu'lén lubá yötsi' rulu'i ca raca queë' bönni' na' riyönnë' didza' na', pero ruí'i ládxe'ë yugu' le dë yödzölió ni, ate' nazí' yë'ë bönni' na', tu' ruí'i ládxe'ë yugu' yöl-la' tsahui' que. Yugu' lë ni ta'röli didza' na', en tun ga biti' gun dxin lu icja ládxi'da'ahuë'.

²³ Xisedo' na' gulasi luyú bëbu rulu'i ca raca queë' bönni' riyönnë' didza' na', en réajni'inë' le, ate' run dxin didza' na' lu icja ládxi'da'ahuë'. Nácagaca bal-la bönachi ca xisedo' na' bulu'nödzaj ia'tú gayuá'tërö ca'. Nácagaca ia'zica'rö bönachi ca xisedo' na' bulu'nödzaj ia'tsónnalalaj ca',

ate' nácagaca ia'zíca'rö bönachi ca xisedo' na' bulu'nödzej ia'chí uruá' ca'.

Tu guíxi'do' cané le nalá' ca rilá' yöla zxoá' xtila

²⁴ Ia'tú le bucúdzu'ë didza' Jesús, ate' rë' légaquië':
—Ca gaca cate idxín ni le rinná bē'ë Dios yehua' yubá naca ca guca que xisedo' dxi'a le guzë' tu bönni' ga naca lu xiyüë'.

²⁵ Tsanni na' tasië' bönni' nacu'ë lidxë', bidxín tu nu bití' rilé'e xan yu'u na' dxi'a, ate' yöjza lu xiyüë' xisedo' guíxi'do' cané le nalá' ca naca yöla zxoá' xtila, ate' böaj xilataj.

²⁶ Cate' gulén zxoá' xtila na', en gurö'ö do que, ga na' dxía xui'i, ní'irö gulaca bē' guíxi'do' cané na'.

²⁷ Ní'irö bila'dxinë' bönni' huen dxin ga zoë' bönni' xan la' yöla na', en tē' lē': "Xan, channö guzu' xisedo' dxi'a lu yu quiu', ¿nacxi guca gula'lén guíxi'do' cané na'?"

²⁸ Xan yu na' gudxë' légaquië', rnnë': "Tu bönni' bití' rilé'enë' neda' dxi'a benë' caní." Ní'irö gula'nábinë' huen dxin queë' lē', ta'nnë': "¿Ba rē'ënu' tséajtu' tsöjölajtu' guíxi'do' cané na'?"

²⁹ Xángaquië' rë' légaquië': "¡Bití' ca'! Nadx ca' cate' iládzu'li' guíxi'do' cané na', iládzu'lentëli' ca' yöla zxoá' xtila.

³⁰ Gácarö dxi'a güi'ili' lataj ila'zxöngarö tsözxön cate' idxinrö dza tsöjtúbiru' le, ate' ní'irö guía' nupa ulu'tubi le: Buli'tubi zí'alö guíxi'do' cané na', en guli'guga' tsöjxili huéaj para uzégui'ru' le, ate' ní'irö utúbili' zxoá' xtila lu yu'u quia'."

*Rucúdzu'ë didza' Jesús ca naca que xisé mostaza
(Mr. 4:30-32; Lc. 13:18-19)*

³¹ Ia'tú le bucúdzu'ë didza' Jesús, ate' rë' légaquië':

—Ca gaca ga idxín le rinná bē'ë Dios yehua' yubá, gaca ca raca que tu xisé mostaza, le guzē' tu bönni' ga naca lu xiyúē'.

³² Le nácatē xisé mostaza na' nácatērō cuidi' ca yúgu'tē xisedo' ia'zica'rō, pero cate' chinadúz, rizzöntērō ca yúgu'tē guixi' cuan, en rizzón ca naca tu yaga, ate' ta'dxinba' biguínido', en tunba' xicá'agacaba' lu ni'a nē'e.

*Rucúdu'ë didza' Jesús que cúa zi que yöta xtila
(Lc. 13:20-21)*

³³ Ia'tú le bucúdu'ë didza' Jesús, ate' rē' légaquiē':

—Ca gaca ga idxín le rinná bē'ë Dios yehua' yubá gaca ca le run cúa zi que yöta xtila, le buchíxinu tu nigula len tsonna libixi yöjza zxoá' xtila, ate' guyazxa idútē cúa na'.

*Le rē'ëni gun le rucúdu'ë didza' Jesús
(Mr. 4:33-34)*

³⁴ Yúgu'tē lē ni bucúdu'ë didza' Jesús, le bē'lenē bönachi nacua' ni' didza', en biti' bi didza' bē'lenē légaquiē' le cabí bucúdu'ë didza'.

³⁵ Caní benē' para gaca lē na' buzúajē' lu guichi tu bönni' bē'ë didza' uláz queē' Dios, gunnē': Gu'a didza' yugu' le ucúdu'a didza'. Innía' yugu' le nagachi' cate' ni' gusí lo si' guta' yödzölió.

Riguíxjö'ë Jesús le bucúdu'ë didza' que guíxi'do' cané

³⁶ Ní'irō buzenē' Jesús bönachi nacua' ni' didza', en gusöl-lē'ë légaquiē', ate' guyu'ë yu'u. Ní'irō bila'dxinē' bönni' usēda queē' ga zoē', en tē' Lē':

—Gudíxjöi'i netu' le rě'eni inná lě na' bucúdzu'u didza' que guíxi'do' cané le nalá' ca naca yöla zxoá' xtila.

³⁷ Bubi'ě didza' Jesús, ate' rě' légaquiě':

—Bönni' razě' xisedo' dxi'a naca' neda', Bönni' Guljě' Bönachi.

³⁸ La' yöla na' naca yödzölió ni, ate' xisedo' dxi'a na' tu'luí'i ca nácgaca nupa nabábagaca ga rinná bě'ě Dios. Guíxi'do' cané na' le nalá' ca naca yöla zxoá' xtila tu'luí'i ca nácgaca nupa néquiguequi que tu' xihui'.

³⁹ Nu na' biti' rilé'e dxi'a xan la' yöla na', en yöjöza guíxi'do' cané na', tu' xihui' caz naca. Dza ulu'tubě' na' ruluí'i ca gaca dza údxi que yödzölió ni, ate' nupa na' tu'tubi nácgaca gubáz lá'ayi queě' Dios.

⁴⁰ Ca na' guca, bulu'tubě' guíxi'do' cané na', en bulu'zégui'ě le lu guí', lěsca' caní gaca cate' údxi que yödzölió ni.

⁴¹ Neda', Bönni' Guljě' Bönachi, isöl-la' gaca'-ně' gubáz lá'ayi quia', ate' ulu'béajě' ga rinná bě'ě Dios yúgu'tě nupa tun ga tun dul-la' luzé'eguequi, enca' nupa tuá' dö'.

⁴² Yugu' gubáz lá'ayi na' ila'gu'ě bönni' tuá' dö' na' lu guí' gabila. Ni' ila'bödxě', en ulu'tíl-la láyi'gaquiě'.

⁴³ Ní'irö ila'yěpi yösa bení' bönachi tsahui', en ilácagaquiě' ca gubidza ga ni' rinná bě'ě Dios yehua' yubá. Nu zoa nagui, en riyöni ral-la' uzě' nagui.

Rucúdzu'ě didza' Jesús que tu yöl-la' tsahui' n-gachi'

⁴⁴ Lěsca' caní bucúdzu'ě didza' Jesús, rnně':

—Le rinná bë'ë Dios yehua' yubá naca ca tu yöl-la' tsahui' nagachi' tu la' yëla. Cate' bidzölinë' tu bönni' le, bucächë'ë le leyúbölö ga na' bigachi', ate' lu yöl-la' rudzeja queë' guyijë', yöjëti'ë yúgu'të le dë queë' ate' gú'uë' la' yëla na' para gata' yöl-la' tsahui' na' queë'.

Rucúdzu'ë didza' Jesús que tu bugá le nazáca'da'

⁴⁵ Gunnë' ca' Jesús:

—Ca ral-la' së ládxi'li' le rinná bë'ë Dios yehua' yubá naca ca benë' tu bönni' rá'uë', en ruúti'ë, en riguiljë' bugá nazáca'gaca.

⁴⁶ Cate' bidzölinë' tu bugá le nazáca'da', guyijë', yöjëti'ë yúgu'të le dë queë', ate' gú'uë' bugá na'.

Rucúdzu'ë didza' Jesús que tu yöxaj böla

⁴⁷ Lësca' caní gunnë' Jesús:

—Ca gaca ga ridxín le rinná bë'ë Dios yehua' yubá, gaca ca run tu yöxaj böla le ta'chiljë' bönni' lu nísado', le röjxi' zían böla izá'a.

⁴⁸ Cate' chibidzá' yöxaj na', bulu'béajë' le luyú bidxi ra' nísado' na', ate' gula'bö'ë ni', en gula'gu'ë-ba' yugu' böla dxi'a tu lu ga'böra, pero gula'ru'unë'-ba' yugu' böla cá'asö.

⁴⁹ Lësca' caní gaca cate' údxi que yödzülió ni. Ila'ruájë' gubáz lá'ayi queë' Dios, ate' ulu'béajë' quez yugu' bönachi tsahui', ate' ulu'cuítie' légaquië' ladaj bönachi tuá' dö'.

⁵⁰ 'Ní'irö ila'gu'ë bönachi tuá' dö' na' lu guí gabila. Ni' ila'bödxë', en ulu'tíl-la láyë'ë.

Yöl-la' tsahui' le naca gula, en le naca cubi

⁵¹ Ní'irö Jesús gunábinë' yugu' bönni' usëda queë', rnnë':

—¿Ba réajni'ili' yúgu'të lë ni?

Bulu'bi'ë didza', të' Lë':

—Ön, Xan.

⁵² Jesús gudxë' légaquië':

—Cate' tu bönni' yudo' usedi chinazí' lu në'ë le rinná bë'ë Dios yehua' yubá, náquië' ca tu bönni' xan yu'u, rubéajë' ladaj yöl-la' tsahui' queë' le naca cubi, en le naca gula, le nácagaca tsahui' le ruzi'ë xibé.

Le benë' Jesús lu yödzo Nazaret

(Mr. 6:1-6; Lc. 4:16-30)

⁵³ Cate' budxi bucúdzu'ë Jesús yugu' didza' ni, buzë'ë ni'.

⁵⁴ Cate' budxinë' ladzë', busédinë' bönachi nacuá' lu yu'u ga tu'dubë' bönni' judío, en tu'sëdë' queë' Dios, ate' bulu'báninë, ta'nnë':

—¿Gazxi caz guzëdë' bönni' ni yöl-la' réajni'i ni? ¿Nacxi caz naca, runë' yugu' yöl-la' huáca ni?

⁵⁵ Náquië' bönni' ni xzí'inë' bönni' gubëdxi yaga, ate' xinë'ë lënu María. Náquië' böchi'gaquië' Jacobo, en José, en Simón, en Judas.

⁵⁶ Lëscá' nigula zanë' nacuá'lennu rë'u ni. ¿Gazxi caz guzëdë' yúgu'të lë ni?

⁵⁷ Que lë ni na' gulaca chopa ládxi'gaquië', ate' bulu'cá'anë' Lë'. Ní'irö Jesús gudxë' légaquië':

—Yúgu'të bönachi tun bal tu bönni' ru'ë didza' uláz queë' Dios, pero bönachi uládz queë', en bönachi nacuá' lidxë' biti' tun lë' bal.

⁵⁸ Que lë ni na' biti' benë' Jesús zían yöl-la' huáca ni', tu' cabí ta'yéajlë'ë Lë'.

14

*Ca bêtgaquie' Juan, bönni' buquile' bönachi nisa
(Mr. 6:14-29; Lc. 9:7-9)*

¹ Lu dza ni', biyönnë' Herodes, bönni' rinná bë'ë luyú Galilea, ca nácgaca yugu' yöl-la' huáca runë' Jesús.

² Herodes na' gudxë' yugu' ni'a në'ë, rnnë':

—Bönni' na' Juan, bönni' buquile' bönachi nisa. Chibubanë' lu yöl-la' guti. Que lë ni na' dë lu në'ë yöl-la' huáca zxön na'.

³ Caní gunné' Herodes tu' gusöl-lë'ë lë cazë bönni' gula'zönë' Juan, en gulúgui'ë lë' du guié, ate' gula'gu'ë lë' lidxi guié tu' gú'uninu Herodías ilunë' caní. Herodías na' gúcanu nigula queë' Felipe, böchë'ë Herodes na'.

⁴ Caní benë' Herodes, tu' gudxë' Juan na' lë': "Biti' ral-la' sóalenu'-nu."

⁵ Que lë ni na' gú'unnë' Herodes gútië' Juan, pero gúdxinë' ila'dá'baga' bönachi lu yödzo ni' lë', tu' téquiguequi bönachi náquië' Juan na' tu bönni' ru'ë didza' uláz queë' Dios.

⁶ Ní'irö cate' guca laní que dza guyé'enë' iz Herodes, birúajbi' bi'i nigula queënu Herodías na', en buyá'abi' lógaca nupa nacuá' laní na', ate' guyaza ládxë'ë Herodes le benbi'.

⁷ Guzxí' lu në'ë Herodes, en benë' tsutsu xtídzë'ë unödzejë' queëbi' bíti'tës bi inábibi' lë'.

⁸ Tu' chibusédinu-bi' zí'alö xiná'abi', gúdxibi' lë':

—Benna quia' na'a icjë' Juan, bönni' buquile' bönachi nisa. Gulú'u le tu lu zxiga' zxön.

⁹ Ní'irö bu'innë' Herodes, pero tu' chibenë' tsutsu xtídzë'ë, en tu' bila'yöni nupa te'aj tágulen lë',

que lë ni na' gunná bé'enë' nu tsöjnödzej icjë' Juan na' queëbi'.

¹⁰ Caní guca, gusöl-lë'ë nu tsöjrixí yenë' Juan ga ni' yu'ë lidxi guié.

¹¹ Bönni' na' nasöl-lë'ë bu'ë icjë' Juan na', zxoalu zxiga' zxön, ate' bunödzjë' le queëbi' bi'i nigula na', ate' lëbi' buá'abi' le queënu xiná'abi'.

¹² Ní'irö bila'dxinë' bönni' gula'dë'ë Juan na', ate' bulu'ú'ë lë', en bulu'cáché'ë lë'. Gudödi ni', yöjtíxjöi'iguequinë' Jesús ca gulaca lë ni.

Jesús rugahuë' zianrö ca chi-un gayuá' bönachi
(Mr. 6:30-44; Lc. 9:10-17; Jn. 6:1-14)

¹³ Cate' réquibe'enë' Jesús lë ni, buzë'ë ni', ate' gurenë' tu lë'e bárcodo', en sa'yéajë' la' queëzë' tu lataj cá'asö. Cate' bila'yöni bönachi zéajë' ni', bila'rúaj yugu' yödzö ni', en yöjaca ga ni' idxinë' Jesús, ta'zë'e ní'aguequi.

¹⁴ Cate' burúajë' Jesús lë'e barco, bilé'enë' nacuá' bönachi zian ni', ate' buéchi' ládxe'ë léaguequi, en bunë' nupa te'e, nútsa'gaca ladjaguequi.

¹⁵ Cate' chiridzö' dza na', bila'dxinë' yugu' bönni' usëda queë' Jesús ga zoë', en të' Lë':

—Chiridzö' na'a, ate' cá'asö naca lataj ni. Busöl-la' bönachi ni para tsöjaca gapa dë yödzödo' para gá'ugaca bi ilagu.

¹⁶ Ní'irö Jesús gudxë' légaquië':

—Biti' run bayudxi tsöjáquië'. Buli'nödzaj libí'ili' le ilahuë'.

¹⁷ Ní'irö të' Lë':

—Gáyu'sö yöta xtila dë, en chópasöba' böla dëba' queëtu' ni.

¹⁸ Jesús rë' légaquië':

—Buli'dödi le lu na'a.

¹⁹ Ní'irö Jesús gunná bé'enë' bönachi na' ila'bö' ga yu'u daca'. Gudödi na' gudélë'ë gayu' yöta xtila na', en chópaba' böla na', ate' guchisa lahuë', ruyúë' zaca' yehua' yubá. Gudxë' Dios: "Xclenu'." Ní'irö buzzuzxjë' yöta xtila na', en budödë' le lu ná'agaquië' bönni' usëda queë', ate' légaquië' gula'guisië' le lógaca bönachi zián na'.

²⁰ Gulahuë' yúgu'tëgaquië', en bulu'huöljanë'. Ní'irö bulu'tubë' yugu' bizxaj nagá'anagaca, en bulu'lié' chinnu ga'böra.

²¹ Bönni' ni' gulahuë' guláquië' idú chi-un gáyu'ë, pero cuntú nu bulaba yugu' nigula, en bí'ido'.

Jesús rizë'e ni'ë lu nísado'

(Mr. 6:45-52; Jn. 6:16-21)

²² Ní'irö la' bentë' Jesús ga gula'benë' bönni' usëda queë' lë'e bárcodo', en tsöjáquië', ila'nöruë' lahuë' Lë', para ila'dödë' ia'tsölá'a nísado' ni', tsanni na' uzenë' Lë' bönachi nacuá' ni' didza'.

²³ Cate' chibusól-lë'ë Jesús bönachi na', gurenë' tu lu guí'ado' ga ni' yöjsóë' tuzë'. Ni' bulidzë' Dios. Cate' chigul-la, tuzë' zoë' ni'.

²⁴ Bárcodo' ga na' nacu'ë bönni' usëda queë' ridödi gatsaj láhui'lö nísado' na', ate' riyasa bárcodo' na' tu' riyasa ridxía nísado' na', ate' ruzaga' bö' recja barco na'.

²⁵ Gudödi guluhuëla, gubígui'ë Jesús gala' ga na' nacu'ë, rizë'e ni'ë lu nísado'.

²⁶ Cate' yugu' bönni' usëda queë' bila'lé'enë' Lë', rizë'e ni'ë lu nísado', gula'bö'dë'ë böniga tu' tádxinë'. Gula'bödxí'ë, ta'nnë':

—Tu' ridasö na'.

²⁷ Ní'irö Jesús la' bulidztë' légaquië', rnnë':

—Buli'zxöni ládxi'li'. Neda' ni. Biti' gádxili'.

²⁸ Ní'irö bubí'ë didza' Pedro, rë' Jesús:

—Xan, channö nacu' Li', gunná be'e neda' guída' ga na' zu' lu nisa.

²⁹ Jesús gudxë' lë':

—Gudá.

Ní'irö bötjë' Pedro lë'e bárcodo' na', en guzë'e ni'ë lu nísado', sa'yéajë' ga na' zoë' Jesús.

³⁰ Ní'irö cate' bilé'enë' Pedro ca bö' na' recja rutá nisa, gúdxinë'. Ní'irö gusí lahuë' rötjë' lu nisa, ate' gurödxí'ë. Bulidzë' Jesús, rnnë':

—Xan, busölá neda'.

³¹ Jesús la' bulitë në'ë. Buguélë'ë lë', en rë' lë':

—Látisö réajlë'u neda'. ¿Bizx que guca chopa ládxi'u?

³² Cate' bulu'benë' lë'e bárcodo' na', gurö'ö dxi bö' na' recja.

³³ Ní'irö bönni' nacu'ë lë'e bárcodo' na' gula'yéaj ládxi'gaquië' Jesús, ta'nnë':

—Le nácatë, Zxí'inë' Dios nacu'.

Jesús ruúnë' yugu' bönni' huë' nacu'ë yödzö Genesaret

(Mr. 6:53-56)

³⁴ Cate' chigula'dödë' ia'tsölá'a nísado' na', la' bila'dxintë' lu xiyú yödzö Genesaret.

³⁵ Cate' bulu'únbë'ë bönni' yödzö ni' Jesús, gula'söl-lë'ë didza' idútë luyú ni', ate' dujuá'gaquië' yúgu'të nupa te'e ga na' zoë' Jesús.

³⁶ Guláta'yüë' lahuë' Jesús gu'ë légaquië' lataj ila'gansë' ruí'i lari' nácuë', ate' la' bulu'huöacaté yúgu'të nupa na' bila'gán lari' na'.

15

Le tun ga biti' nácaru' tsahui' lahuë' Dios

(Mr. 7:1-23)

¹ Ní'irö yugu' bönni' yudo' fariseo, en bönni' yudo' tu'sédinë', narúajgaquië' Jerusalén, bila'dxinë' ga zoë' Jesús, ate' të' Lë':

² —¿Bizx que tunë' bönni' usëda quiu' le ridödi bë' ca naca le nulaga loru' runru' ca gulunë' xuz xtó'oru'? Biti' ta'guíbi në'ë ca naca que yudo' cate' si' ilahuë'.

³ Bubi'ë didza' Jesús, en gunábinë' légaquië', rnnë':

—¿Bizx que libí'ili' ca' rucá'anali' cá'asö xibá queë' Dios para gunli' le nulaga loli' runli'?

⁴ Caní raca, tu' gunná bé'enë' Dios libí'ili', gunné': "Ben bal xuz xino'o", en gunné' ca': "Nu innë' zi' que xuz xinë'e, tsaz gati nu na'."

⁵ Pero libí'ili' rnnali': "Channö nu guië' xuz xinë'e: Biti' bi gaca gunna' quiu' tu' chiguzxí' lu na'a gunna' yúgu'të queë' Dios,

⁶ bití'rö bi run bayudxi gun nu na' que xuz xinë'e." Caní runli', rucá'anali' cá'asö le gunná bë'ë Dios, para gunli' le nulaga loli' runli'.

⁷ Libí'ili', bönni' rulu'isö tsahui' cuinli', idú ca nácali' gudíxjö'ë Isaías, bönni' bë'ë didza' uláz queë' Dios, gunné':

⁸ Bönni' ni, len rú'agacsë' tunë' neda' bal, en calëga idú ládxi'gaquië'.

⁹ Nítisö naca le ta'yéaj ládxi'gaquië' neda', tu' tu'sédinë' yugu' le gula'nná bë' bönnachi.

¹⁰ Ní'irö bulidzë' Jesús bönnachi nacua' ni', en rë' léguequi:

—Buli'zë nágali' le guía' libí'ili', en guli'tséajni'i.

11 Calëga le riyaza ru'ë nu bönni' run ga biti' náquië' tsahui' lahuë' Dios, pero le rirúaj ru'ë, lë ni run ga biti' náquië' tsahui' lahuë' Dios.

12 Ní'irö yugu' bönni' usëda queë' Jesús gula'bígui'ë ga zoë', en të' Lë':

—¿Naru' nõztsenu' gula'lenë' yugu' bönni' yudo' fariseo cate' bila'yönnë' didza' ni bë'u?

13 Ní'irö bubi'ë didza' Jesús, en rë' légaquië':

—Yúgu'të le nadúz, le cabí guzë' Xuza' zoë' yehua' yubá, huadúl jagaca idú luí.

14 Buli'cá'ana légaquië'. Chinachúl-la lógaquië', en ta'chë'ë nupa nachul-la lógaca. Channö tu bönni' lo chul-la ichë'ë ia'tué' bönni' lo chul-la, iropë' ila'bixë' tu lu yeru.

15 Ní'irö bubi'ë didza' Pedro, en rë' Jesús:

—Buzéajni'i netu' lë ni rucúdz'u didza'.

16 Jesús rë' légaquië':

—¿Naru' cabí réajni'itseli' ca' libí'ili'?

17 ¿Naru' cabí réajni'itseli' riyaza lë'ëru' yúgu'të le riyaza ruá'aru', atë' rurúaj lë'ëru'?

18 Na'a, le rirúaj rúa'ali', lu icja ládxi'do'oli' za', atë' lë ni run ga biti' nácali' tsahui' lahuë' Dios.

19 Caní raca, tu' ta'lén lu icja ládxi'do'oli' yugu' le rizá' ládxi'li' le ruá' dö', le ilún ga gútili' bönachi, en le ilún ga quítsjali' xibá que yöl-la' nutsaga na', en le ruá' dö' runli', en yugu' le rizë ládxi'li' cuanli', en yugu' le rinnëli' que luzá'ali' le cabí nácate, en yugu' le rinnë xíhui'li'.

20 Yugu' le caní tun ga biti' náquië' tu bönni' tsahui' lahuë' Dios, pero channö cabí nayari në'ë ca naca que yudo' cate' bi gahuë', biti' gun ga biti' náquië' tsahui' lahuë' Dios.

Tu nigula izá'a réajlë'ënu Jesús

(Mr. 7:24-30)

21 Ní'irö buzë'ë Jesús ni', en guyéajë' lu xiyú yödzo Tiro, en yödzo Sidón.

22 Tu nigula nabábanu luyú Canaán birúajnu yödzo ni', ate' bë'ënu zidzaj didza', rënu Jesús:

—Xan, zxí'ini xi'sóë' David, buéchi' ladxi' neda'. Bi'i nigúlado' quia' riguí'i rizáca'da'abi' tu' yu'u bö' xihui' lëbi'.

23 Biti' bi' didza' bubi'ë Jesús. Ní'irö gula'bígú'ë bönni' usëda queë' ga zoë', ate' gulë' Lë', ta'nnë':

—Busöl-la'-nu, tu' zá'anu cúdzuru' ribödxianu.

24 Ní'irö bubi'ë didza' Jesús, ate' rë'ë-nu:

—Dios nasöl-lë'ë neda' gácalena' bönachi Israel, nupa nácacaca ca bö'cu' zxíla'do' nanítigacaba'.

25 Ní'irö gubíga'nu nigula na' ga zoë' Jesús, en guyéaj ládxi'nu Lë', ate' rënu Lë':

—Xan, gúcalen neda'.

26 Bubi'ë didza' Jesús, rnnë':

—Biti' naca dxi'a ugúaru' yöta quégacabi' bí'ido', en chú'unaru' le lógacaba' bö'cu'do'.

27 Ní'irö nigula na' rënu Jesús, rnnanu:

—Ön, Xan, pero táguba' bö'cu'do' na' le bizxaj tu'huóxaj ga tagu xángacaba'.

28 Ní'irö bubi'ë didza' Jesús, rnnë':

—Nigúlado'. Idú naca ca réajlë'u neda'. Gaca quiu' ca rë'ënnu'.

La' ní'isö böácatëbi' bi'i nigúlado' queënu.

Jesús ruúnë' zían nupa te'e

29 Ní'irö buzë'ë Jesús ni', en gudödë' ga naca ra' nísado' que Galilea. Gurenë' tu lu guí'ado', ate' gurö'ë ni'.

³⁰ Bönachi zián dujuá'gaquië' nupa biti' guca ila'zá', en nupa nachul-la guiöj lógaca, en nupa biti' guca ila'nnë, en nupa narugu ni'a në'eguequi, en ia'zica'rö zián nupa te'e, ate' gula'guíxaj léguequi xini'ë Jesús, ate' Lë' bunë' léguequi.

³¹ Bulu'bani bönachi ni' ca naca le benë' Jesús, tu' bila'lé'e tu'nnë nupa biti' guca ila'nnë, ate' nuhuöácagaca nupa gurugu ni'a në'eguequi, ate' tu'zá' nupa biti' guca ila'zá', ate' tu'lé'e nupa guchul-la lógaca. Que lë ni na' gula'gu'ë yöl-la' ba Dios quégaca bönachi Israel.

*Jesús rugahuë' ziánrö ca choá' gayuá' bönachi
(Mr. 8:1-10)*

³² Ní'irö Jesús bulidzë' yugu' bönni' usëda queë', en rë' légaquië':

—Ruhuechi' ládxa'a bönachi zián ni, tu' chiguca tsonna dza zá'lenguequi neda', en biti' bi dë le ilagu. Biti' ré'ënda' usöl-la'gaca-në' tsöjhuöajgaquië' lídxigaquië' ta'dunsë' ca', nadxi ca' udú ládxi'gaquië' la' nöza.

³³ Ní'irö yugu' bönni' usëda queë' të' Lë', ta'nnë':

—¿Gazxi caz idzölitu' yöta xtila zián lu lataj cá'asö ni, le ugágutu' bönachi zián ni?

³⁴ Gunábinë' Jesús légaquië', rnnë':

—¿Bal-laxi yöta xtila dë queëli'?

Bulu'bi'ë didza', ta'nnë':

—Gadxi, ate' nabábasöba' böla cuidi' dëba' queëtu' ni.

³⁵ Ní'irö Jesús gunná bé'enë' bönachi zián na' ila'bö' lu yu.

³⁶ Gudélë'ë gadxi yöta xtila na', en yugu' böla na', ate' gudxë' Dios: "Xclenu'." Ní'irö buzxuzxjë'

iroptë na', en bunödzej' quégaquië' bönni' usëda queë', ate' légaquië' gula'guísië' le lógaca bönachi zían na'.

³⁷ Gulahuë' yúgu'të', en bulu'huöljanë'. Gudödi ni' bulu'tubë' le bizxaj nagá'anagaca, ate' bulu'lié' gadxi ga'böra.

³⁸ Yugu' bönni' na' gulahuë' nácagaquië' choá' gáyu'ë, pero cuntú nu bulaba yugu' nigula, en bí'ido'.

³⁹ Ní'irö busöl-lë'ë Jesús bönachi na' tsöjhuöajgaquië' lídxigaquië', ate' gurenë' lë'e bárcodo' ni', en sa'yéajë' lu xiyú yödzo Magdala.

16

Ta'nábinë' Jesús gunë' tu le gaca bë' nuzxi náquië' (Mr. 8:11-13; Lc. 12:54-56)

¹ Ní'irö yugu' bönni' yudo' fariseo len yugu' bönni' yudo' saduceo bila'dxinë' ga zoë' Jesús para ila'zi' bë'ë Lë', ate' gula'nábinë' Lë' gunë' tu le gaca bë' ga za' yöl-la' unná bë' queë'.

² Bubi'ë didza' Jesús, en rë' légaquië':

—Cate' ridzö', rnnali' caní: “Gun dxi'a cuxö, tu rö'ö böaj xiná lúzxiba.”

³ Cate' naca zílado', rnnali' caní: “Biti' gun dxi'a na'a dza tu' rö'ö böaj xiná, en ruchul-la lúzxiba.” Libí'ili', bönni' rulu'ísö tsahui' cuinli'. Raca innë ya'ali' naca gun lúzxiba, pero biti' gaca tséajni'ili' le tu'sedi le taca dza ni zóaru' na'a.

⁴ Yugu' bönachi tuá' dö' ni, en biti' zoa idú ládxi'gaca ta'nábini neda' guna' tu le gaca bë' Nu naca', pero biti' bi le gaca bë' ila'lé'enë'. Ila'lé'esinë' lë na' guca bë' ca guca queë' Jonás, bönni' bë'ë didza' uláz queë' Dios.

Ní'irö Jesús buca'anë' légaquië', söhuöjë'.

Le tu'sédinë' bönni' yudo' naca ca cúa zi que yöta xtila

(Mr. 8:14-21)

⁵ Cate' bila'dxinë' ia'tsölá'a nísado' ni', guléquiibe'enë' bönni' usëda queë' Jesús gulál-la ládxi'gaquië' ilu'ë le ilahuë'.

⁶ Ní'irö Jesús gudxë' légaquië':

—Buli'yútsöca'. Guli'gún chi'i cuinli' que le naca ca cúa zi que yöta xtila quégaquië' bönni' yudo' fariseo, en quégaquië' bönni' yudo' saduceo.

⁷ Ní'irö la' légacasë' gulún xtídza'gaquië' bönni' usëda queë', ta'nnë':

—Rnnë' caní tu' cabí nuá'aru' yöta xtila.

⁸ Réquiibe'enë' Jesús lë ni, ate' rë' légaquië':

—¿Bizx que run xtídza'li' la' libí'isili' tu' cabí nuá'ali' yöta xtila? Láti'do'os réajlë'ëli' neda'.

⁹ ¿Naru' cabí réajni'itseli', en biti' röjnétseli' ca guca quégaca gayu' yöta xtila ni', lë na' gulahuë' chi-un gáyu'ë bönni', ate' tsca xö ga'böra butúbili'?

¹⁰ ¿Naru' cabí röjnétseli' ca' ca guca quégaca gadxi yöta xtila ni', lë na' gulahuë' choá' gáyu'ë bönni', ate' tsca xö ga'böra butúbili'?

¹¹ ¿Naru' cabí réajni'ili'? Biti' bë'a didza' que yöta xtila cate' gudxa' libí'ili' gun chi'i cuinli' que le naca ca cúa zi que yöta xtila quégaquië' bönni' yudo' fariseo, en quégaquië' bönni' yudo' saduceo.

¹² Ní'irö gula'yéajni'inë' biti' gudxë' Jesús légaquië' ilún chi'i cuíngaquië' que cúa zi que yöta xtila, pero ral-la' ilún chi'i cuíngaquië' que le tu'sédinë' yugu' bönni' yudo' fariseo, en yugu' bönni' yudo' saduceo.

Pedro rnnë' Jesús náquië' Cristo

(Mr. 8:27-30; Lc. 9:18-21)

¹³ Cate' bidxinë' Jesús lu xiyú yödzö Cesarea, ga na' rinná bē'ë Filipo, gunábinë' yugu' bönni' usëda queë', rnnë':

—¿Bizxi ta'nná bönachi nu naca' neda', Bönni' Guljē' Bönachi?

¹⁴ Bulu'bi'ë didza', ta'nnë':

—Bal-lë' ta'nnë': "Juan nacu', bönni' ni' buquilë' bönachi nisa." Ia'zíca'rë' ta'nnë': "Elías nacu', bönni' ni' bē'ë didza' uláz queë' Dios dza ni'te." Ia'zíca'rë' ta'nnë': "Jeremías nacu', o ia'túë' bönni' bē'ë didza' uláz queë' Dios."

¹⁵ Ní'irö Jesús gudxë' légaquië':

—Naru' libí'ili', ¿nuzxi rnnali' naca' neda'?

¹⁶ Bubi'ë didza' Simón Pedro, en rë' Lë':

—Li' nacu' Cristo, Zxí'inë' Dios ban.

¹⁷ Bubi'ë didza' Jesús, rë' lë':

—Bica' xibó' li', Simón, zxí'inë' Jonás, tu' cabí buluí'inë' nu bönni' li' lë'ni. Xuza' zoë' yehua' yubá buluí'inë' li' lë'ni.

¹⁸ Neda' rea' li', li' nacu' Pedro, ate' lu guiöj ni ucuá'a nupa ulu'dubi quia', ate' yöl-la' unná bē' que tu' xihui' bití' sequí' uzaga' xinözgaquië'.

¹⁹ Gunna' quiu' yugu' zxí'ini guië' que lataj ga rinná bē' Nu zoa yehua' yubá. Le inná bē'u luyú ni, chigunná bē' ca' Nu na' zoa yehua' yubá, ate' le gu'u lataj gaca luyú ni, chibë' lataj gaca lë' na' Nu na' zoa yehua' yubá ni'.

²⁰ Ní'irö Jesús gunná bé'enë' yugu' bönni' usëda queë' cuntú nu ilë'ë náquië' Lë' Cristo.

Jesús rigu'xjö'ë ca si' ilútië' Lë'

(Mr. 8:31-9:1; Lc. 9:22-27)

21 La' dza ní'sö gusí lahuë' Jesús rigu'xjöi'inë' yugu' bönni' usëda queë' run bayudxi tsejë' Jerusalén, ga ni' yugu' bixúz unná bë' en bönni' gula tu'zëajni'inë', en bönni' yudo' tu'sëdinë' ulu'saca' zi'ë Lë', ate' ní'irö ilútië' Lë', pero cate' gaca tsonna dza ubanë' lu yöl-la' guti.

22 Ní'irö Pedro guchë'ë Jesús quez, en gusí lahuë' ridil-lë' Lë' didza', rnnë':

—Xan, bití' gu'ë Dios lataj. Bití' ca' gaca quiu' ca rnno'.

23 Ní'irö buécjë' Jesús, en rë' Pedro:

—Gucuita ga zoa'. Runu' ca run Satanás, tu' xihui'. Runu' ga gaca chopa ládxa'a tu' cabí naca le rizá' ládXu'u lí' ca rizá' ládXë'ë Dios, pero ca ta'za'sö ládxi'gaca bönachi.

24 Ní'irö Jesús gudxë' yugu' bönni' usëda queë', rnnë':

—Channö zoë' tu bönni' ré'ënë' të'ë neda', ral-la' uzóë' tsölá'alö yugu' le ré'ëni quézinë', en gáquië' ca tu bönni' sa'yéajë', zeajtë'ë lë'e yaga cruz, ate' ní'irö gaca të'ë neda'.

25 Nu bönni' guë'ënnë' gun chi'ë yöl-la' na'bán queë', unítië' le, pero bönni' unítië' yöl-la' na'bán queë' tu' dë'ë neda', gata' yöl-la' na'bán idú queë'.

26 ¿Naru' uzi'tsë' xibé tu bönni' channö utubë' yúgu'të le dë yödzölió ni pero unítië' yöl-la' na'bán idú queë'? Bití' bi gaca unödzjë' tu bönni' para gata' yöl-la' na'bán idú queë'.

27 Caní rnnía', tu' huöda' neda', Bönni' Guljë' Bönachi, en idzaga yöl-la' unná bë' queë' Xuza' Dios neda', ate' idzágagaquië' gubáz lá'ayi quia' neda'. Ní'irö ubi'a que queë' bönachi tsca naca le núngaca.

28 Le nácatë rea' libí'ili': "Biti' ca' ilátigaca bal-la nupa nacuá' ni cate' ila'lé'erö idinná bē'a neda', Bönni' Guljē' Bönachi."

17

Ridzá' ca nalá' lahuë' Jesús

(Mr. 9:2-13; Lc. 9:28-36)

1 Gudödi xopa dza, Jesús gudélē'ë Pedro len Jacobo, en Juan, böchē'ë Jacobo na', en guchē'ë légaquiē', ate' yöjáquiē' quez tu lu guí'a sibi.

2 Ní' bidzá' ca nalá' lahuë' Jesús lógaquiē'. Guyēpi yösa bení' lahuë' Jesús ca ruzení' gubidza, ate' lari' nácuē' böáca chiguíchido'os ca bení'.

3 Ní'irö bila'lé'enē' bönni' usēda queē' bulu'í' lógaquiē' Moisés, en Elías, ate' tu'ilenē' Jesús didza'.

4 Ní'irö Pedro rē' Jesús:

—Xan, naca dxi'a zóaru' ni. Channö rē'ēnu', guna' ni tsonna yu'u lága'do', tu quiu', ia'tú queē' Moisés, en ia'tú queē' Elías.

5 Tsanni ni' ru'ë Pedro didza' ni, la' gurö'ötē tu böaj bení' le guzxóa légaquiē', ate' lu böaj na' biyön chi'í nu rna:

—Bönni' ni Zxí'ini caza'. Nadxí'ida'-nē', en raza ládxa'a Lē'. Buli'zē nágali' didza' gu'ë.

6 Cate' bila'yönnē' bönni' usēda queē' chi'í na', gula'dzö'ë gusurú'alö, en guladxi bila'dzöbinē'.

7 Ní'irö gubígui'ë Jesús ga na' nacu'ë, ate' gudanē' légaquiē', rnnē':

—Guli'chasa. Biti' gádxili'.

8 Cate' gula'chisa lógaquiē', en bulu'yúē', cúnturö nu bila'lé'enē', pero tuzē' Jesús.

9 Cate' ni' tu'dínniē' lu guí'a na', Jesús gunná bé'enē' légaquiē', rnnē':

—Cuntu nu guiéli' ca guca lë ni bilé'eli' cate' ubanra' lu yöl-la' guti neda', Bönni' Guljê' Bönachi.

¹⁰ Ní'irö yugu' bönni' usëda queë' gula'nábinë' Lë', ta'nnë':

—¿Bizx que ta'nnë' bönni' yudo' usëdi run bayudxi uluí'i lahuë' Elías zí'alö ca uluí'i lahuë' Cristo?

¹¹ Bubi'ë didza' Jesús, rë' légaquië':

—Le nácatë uluí'i lo cazë' zí'alö Elías, en ucá'anë' tsahui' yúgu'të.

¹² Neda' rea' libí'ili': "Chibuluí'i lahuë' Elías na', pero biti' bulu'únbë'ë lë', ate' yúgu'të ca rnnasö quégaquië' gulunë' queë'." Lësca' caní ilunë' quia' neda', Bönni' Guljê' Bönachi, ulu'saca' zi'ë neda'.

¹³ Ní'irö gula'yéajni'inë' bönni' usëda queë', bé'lenë' Jesús légaquië' didza' ca guca queë' Juan, bönni' na' buquilé' bönachi nisa.

*Ruúnë'-bi' Jesús tubi' bi'i bönni' ré'ebi' xjote'
(Mr. 9:14-29; Lc. 9:37-43)*

¹⁴ Cate' bila'dxinë' ga na' nacué' bönachi zían, gubígui'ë tu bönni' ga zoë' Jesús, ate' buzóa zxi'bë' lahuë' Lë',

¹⁵ en rë' Lë':

—Xan, buéchi' ladxi'-bi' bi'i bönni'do' quia', tu ré'ebi' xjote', en riguí'i rizáca'da'abi', ate' zían luzuí ridzö'öbi' lu guí' o lu nisa.

¹⁶ Chidiguá'a-bi' lógaquië' bönni' usëda quiu' pero biti' guca ulu'únë'-bi'.

¹⁷ Bubi'ë didza' Jesús, rnnë':

—Libí'ili', bönachi cabí réajlë'ëli', en biti' nácali' tsahui'. ¿Gáca'xte caz ral-la' sóalena' libí'ili' para tséajlë'ëli' neda'? ¿Gáca'xte caz ral-la' guá' ilena' queë'li'? Guli'diguá'-bi' quia' ni.

18 Ní'irö Jesús buzenë' le bach bö' xihui' na' yu'u läbi', ate' la' burúajtë läbi', ate' la' ná'asö böácatëbi' bi'i bönni'do' na'.

19 Ní'irö, yugu' bönni' usëda queë' Jesús gula'biguë'ë quez ga zoë', ate' gula'nábinë' Lë', ta'nnë':

—¿Bizx que na' biti' guca ubéajtu' netu' bö' xihui' na'?

20 Jesús rë' légaquië':

—Biti' guxzéqui'li' tu' cabí réajlë'ëli' Dios idú ládxi'li'. Le nácatë rea' libí'ili', sal-la' cuídí'sö naca yöl-la' réajlë' queéli' Dios, nácatë ca tu xisedo' mostaza, huáca guiéli' gu'ado' ni: “Gucuíta ni, en yöjsóa ní'ilö”, ate' la' icuítatë gu'ado' na'. Biti' bi zoa le cabí gaca gunli' channö réajlë'ëli' Dios idú ládxi'li'.

21 Tu bö' xihui' caní gácasö ubéajli' channö ulídzali'-në' Dios, en gunli' gubasa.

Riguíxjö'ë Jesús leyúbölö ca si' ilútië' Lë'

(Mr. 9:30-32; Lc. 9:43-45)

22 Tsanni ni' ta'dé' luyú Galilea, Jesús gudxë' yugu' bönni' usëda queë', rnnë':

—Zoa nu udödi neda', Bönni' Guljë' Bönachi, lu ná'agaca bönachi.

23 Ilútië' neda', pero cate' gaca tsonna dza Dios usubanë' neda'.

Ní'irö bulu'huí'innë' bönni' usëda queë'.

Jesús riguíxjaj lazë' que yudo'

24 Cate' bulu'dxinë' Jesús, en yugu' bönni' usëda queë' lu yödzö Capernaum, bila'dxinë' yugu' bönni' tu'quixjë' bönachi lázagaca que yudo' ga zoë' Pedro, ate' të' lë':

—¿Naru' cabí quizzaj lazë' que yudo' bönni' rusédinë' libí'ili'?

²⁵ Bubi'ë didza' Pedro, rnnë':

—Ön, huaguizxjë'.

Cate' buázië' Pedro lu yu'u, Jesús la' bulidztë' lë', en rë' lë':

—¿Nacxi rusaca' quiu', Simón? Bönni' ta'nná bë'ë luyú ni, ¿nupxi tu'quizzxjë' le riguizxaj laz, en lazzaj que yu? ¿Naru' tu'quizzxjë' bönachi uládz quégaquië' o bönachi izá'a?

²⁶ Bubi'ë didza' Pedro, rë' Lë':

—Bönachi izá'a tu'quizzxjë'.

Ní'irö Jesús rë' lë':

—Que lë ni na', biti' run bayudxi quizzaj laza' que yudo' tu' naca' Zxí'inë' Dios ca na' biti' bi ta'guízzaj nupa nácgaca bönachi uládz queë' bönni' na' ruquízzxjë'.

²⁷ Na'a, para cuntú nu gun leru', guyéaj ra' nísado', yözzalaj lu nisa le rizöninu'-ba' böla, ate' böla cueju'-ba' zí'alö, guzzí'i-ba'. Cate' isalju' ruá'aba', ni' idzölinu' tu dumí lásido'. Guzzí'i le, ate' gudízzaj laza', en lazu'.

18

¿Núzzilö gaca lo?

(Mr. 9:33-37; Lc. 9:46-48)

¹ La' dza ní'sö bila'dxinë' bönni' usëda queë' Jesús ga zoë', ate' gula'nábinë' Lë', ta'nnë':

—¿Núzzilë' bönni' ni gáquië' lo ga rinná bë'ë Dios yehua' yubá?

² Bulidzë'-bi' Jesús tubi' bi'i bönni'do', ate' buzóë'-bi' gatsaj láhui'lö ga na' nacu'ë.

³ Ní'irö rë' légaquië':

—Le nácatë rea' libí'ili', channö cabí huóacali' ca zeaj nácabí' bí'ido', bití' ca' tsú'uli' ga ni' rinná bē'ē Dios yehua' yubá.

⁴ Que lē ni na', núti'tēs nu gaca nōxaj ladxi', en huóaca ca nácabí' bí'ido' ni, nu ni gaca lo ga ni' rinná bē'ē Dios yehua' yubá.

⁵ Núti'tēs nu gun bal tubí' bí'ido' caní tu' néquibi' quia', neda' caz gun bal.

Le tun ga nu gun dul-la'

(Mr. 9:42-48; Lc. 17:1-2)

⁶ Gunnē' ca' Jesús:

—Nu gun ga gunbí' dul-la' tubí' bí'ido' caní réajlē'ēbi' quia', gácarö dxi'a queē' bönni' na' la'tu' ugalē'ē guiōj riyētuni yaga yenē', ate' tsöjsuladzu' cuinē' lu nísado'.

⁷ Bica' bayechi' bönachi yödzölió ni tun ga gun dul-la' luzé'eguequi. Nacuá'tica'sö le tun ga nu gun dul-la', pero bica' bayechi' nu run ga nu gun dul-la'.

⁸ Que lē ni na', channö gun no'o o ni'u ga gunu' dul-la', guchugu le, en gurú'una le. Gácarö dxi'a quiu' tsöjtsáziu' ga su' ibanu' bití' rizó'o o narugu ni'a no'o, en calēga nacuá' chopá no'o, en chopá ni'u ate' tsöjtsáziu' lu guí' gabila le catu caz ulu.

⁹ Channö gun guiōj lo' ga gunu' dul-la', guléaj le, en gurú'una le. Gácarö dxi'a quiu' tsöjtsáziu' ga su' ibanu', zoa tuz guiōj lo', en calēga nacuá' chopá guiōj lo', ate' tsöjtsáziu' lu guí' gabila.

Jesús rucúdzu'ē didza' que tu bö'cu' zxila' nanítiba'

(Lc. 15:3-7)

¹⁰ Gunnē' ca' Jesús:

—Guli'gún chi'i cuinli' para cabí uzóali'-bi' tsóla'alò tubi' bí'ido' caní. Neda' rea' libí'ili', gubáz lá'ayi tapa chi'ë lé'gacabi' nacuá'tica'së' lahuë' Xuza' zoë' yehua' yubá.

11 Bida' ni neda', Bönni' Guljé' Bönachi, para usöla' nu ni naniti.

12 '¿Nacxi rusáca'li' queëli'? Tu bönni', nacuá'aba' tu gayuá' bö'cu' zxila' queë', channö nítiba' tuba', ¿naru' cabí ucá'anë'-ba' tápalalaj yu' chënnaba' na', ate' tsejë' gapa naca lu guí'a, para tsöjtiljé'-ba' bö'cu' zxíla'do' na' nanítiba'?

13 Channö udzölinë'-ba', le nácatë rea' libí'ili', udzéjarönë' ni'a queéba' bö'cu' zxíla'do' na' ca gunë' quégacaba' ia'tápalalaj yu' chënnaba' ni' bití' gula'nítiba'.

14 Lësca' caní, Xúziru' Dios, zoë' yehua' yubá, bití' ré'ënë' nítibi' tubi' bí'ido' caní.

Ca ral-la' uniti loru' böchi' luzá'aru'
(Lc. 17:3)

15 Gunnë' ca' Jesús:

—Channö böchi' luzó'o guá' dö' quiu', guyéajtsöca', en yöjca'analenë' tsahui' la' libí'isili'. Channö uzé náguië' li', chibuguélu'u böchi' luzó'o.

16 Channö cabí uzé náguië' xtídzu'u, guchë'ë ia'túë' o ia'chopë' bönni' para urúaj li' xtídzu'u lógaquië' chopa tsonné' bönni', nupa gaca ilún ba nalí que xtídza'li'.

17 Channö cabí uzé náguië' xtídza'gaquië', gudxi ca' bönachi tu'dubi tu'sëdi queë' Dios, en channö cabí uzé náguië' xtídza'gaca bönachi na', ní'irö bönni' na' gáquië' quiu' ca tu bönni' bití' ré'ajlë'ë Dios, en ca tu bönni' ruquízxjé' uláz que yödzö zí'tu'.

18 'Le nácatë rea' libí'ili', yúgu'të le inná bë'ëli' lu yödzölió ni, naca le chigunná bë'ë Dios yehua' yubá, ate' yúgu'të le güí'ili' lataj lu yödzölió ni, naca le chibë'ë lataj Dios yehua' yubá.

19 'Lësca' caní rea' libí'ili', channö chópasili' gun tuz xtídza'li' lu yödzölió ni ca naca tu le inábili'-në' Dios, gunë' Xuz caza' Dios, zoë' yehua' yubá, lë na' rinábili'-në'.

20 Ga nacua' chopa tsonna nupa ni nudúbigaca quia' neda', zoa caza' neda' gatsaj láhui'lö ga na' nacu'ë.

21 Ní'irö gubígui'ë Pedro ga zoë' Jesús, en gunábinë' Lë', rnnë':

—Xan, ¿bál-laxitë luzuí ral-la' uniti lahua' böchi' luzá'a, nu na' ruá' dö' quia'? ¿Naru' gadxi luzuí?

22 Jesús rë' lë':

—Neda' rea' li', calëgasö gadxi luzuí, pero idú tsónnalalaj yu' chi cuía le naca gadxi luzuí.

Jesús rucúdzu'ë didza' que tu bönni' huen dxin biti' buniti lahuë' luzë'ë

23 Gunnë' ca' Jesús:

—Ia'stú, ca gun Nu na' rinná bë' yehua' yubá naca ca benë' tu bönni' rinná bë'ë. Gú'unnë' ucá'analënë' tsahui' yugu' bönni' huen dxin queë'.

24 Cate' gusí lahuë' rucá'analënë' légaquië' tsahui', dujuá'gaquië' ga zoë' tu bönni' ral-lë'ë queë' zián gayuá' dumí.

25 Tu' cabí guca quizxjë', gunná bë'ë xanë' idó'ogaquië' lë', en nigula queë', en yugu' bi'i queë', en yúgu'të le dë queë', ate' ní'irö gazxaj le ral-lë'ë queë' xanë' na'.

26 Ní'irö bönni' huen dxin na' buzóa zxibë' lahuë' xanë', en gunábinë' lë', rnnë': "Xan, ben zxön ládXu'u neda'. Huaguizxaj caza' li' idutë'."

27 Ní'irö xanë' na' buéchi' ládXë'ë bönni' huen dxin queë' na', en buniti lahuë' lë' lë' na' ral-lë'ë queë', ate' busanë' lë'.

28 Cate' burúajë' bönni' huen dxin na', la' yöjtságatë' tu bönni' rúnlenë' lë' tsözxön dxin, ate' bönni' na' ral-lë'ë queë' láti'do'os dumí. Ní'irö guzxönë' lë', en guxzínnajë' yenë', ate' rë' lë': "Gudíxjatë lë' na' ral-lu'u quia'."

29 Ní'irö luzë'ë na' buzóa zxibë' lahuë', en gunaba yechë'ë lahuë', rnnë': "Ben zxön ládXu'u neda'. Huaguizxaj caza' li' idutë'."

30 Biti' gú'unnë' bönni' huen dxin na', ate' yöjlu'ë lë' lidxi guíë dza quíxjarë' lë' na' ral-lë'ë queë'.

31 Cate' bila'lé'enë' lë' ni ia'zíca'rë' huen dxin, bulu'huí'inide'enë' ni'a queë', ate' yöjtíxjoi'iguequinë' xángaquië' yúgu'të lë' na' guca.

32 Ní'irö xángaquië' bulidzë' bönni' huen dxin na', ate' rë' lë': "Li', huen dxin catsahui'. Yúgu'të dumí na' gúl-lu'u quia' buniti lahua' li'. Busúlua' lë' na' gúl-lu'u quia' tu' gunaba yechu'u lahua'.

33 ¿Naru' cabí ral-la' huéchi' ládXu'u ca' luzó'o ca na' bena' neda', buéchi' ládxa'a li'?"

34 Ní'irö guléde'enë' xanë', en budödë' lë' lu ná'agaca nupa ulu'saca' zi' lë' dza quíxjarë' iduté le ral-lë'ë queë'.

35 Ní'irö rnnë' Jesús:

—Lësca' caní gunë' Xuza' zoë' yehua' yubá queë'li' channö cabí uniti loli' idú ládxi'li' yugu' böchi' luzá'ali'.

19

Nupa tu'lá'a yöl-la' nutsaga na'

(Mr. 10:1-12; Lc. 16:18)

¹ Cate' budxi bë'ë Jesús yugu' didza' ni, buzë'ë luyú Galilea, ate' bidxinë' luyú Judea le dë ia'tsölá'a yegu Jordán saca' ga rilén gubidza.

² Bönachi zián sôjácálen Jesús, ate' bunë' léguequi ni'.

³ Ní'irö bila'dxinë' bal-lë' bönni' yudo' fariseo ga zoë' Jesús para ila'zì' bë'ë Lë', ate' gula'nábinë' Lë', ta'nnë':

—¿Naru' dë lataj bönni' nutsaga në'ë usanë' nigula queë' tu' nözi bíti'tës bi raza?

⁴ Bubi'ë didza' Jesús, rë' légaquië':

—¿Naru' cabí nulábanili' le nazúaj lu guichi lá'ayi ca benë' Dios bönachi cate' si' benë' yödzölió? Bönni', en nigula benë' légaquië'.

⁵ Caní gunné' Dios: “Que lë ni na', ral-la' usanë' tu bönni' xuz xinë'ë, ate' tsaz tsöjsóalenë'-nu nigula queë', ate' iropë' na' ulu'huöáquië' tuz bönachi.”

⁶ Caní naca, bíti'rö nácaqaquië' chopë' pero tuz bönachi chinuhuöáquië'. Que lë ni na', bitì' ral-la' ulu'lë'ë bönni' nupa na' benë' Dios tuz.

⁷ Ní'irö bönni' yudo' na' gula'nábinë' Jesús, ta'nnë':

—¿Bizx que na' gunná bé'enë' Moisés légaquië' le ru'í' lataj nu bönni' unödzjë' tu guichi queënu nigula queë' le rnna nulá'a yöl-la' nutsaga na', ate' usanë'-nu nigula queë' na'?

⁸ Jesús rë' légaquië':

—Caní benë' Moisés tu' nazidi icja ládxi'do'oli'. Bennë' libí'ili' lataj usanli'-nu nigula queëli', pero cate' gusí lo guta' gurö'ö yödzölió, bitì' guca caní.

9 Neda' rea' libí'ili', channö tu bönni' usanë'-nu nigula queë', en biti' gudálennu bönni' yúbölö, ate' utsaga ná'alenë'-nu nigula yúbölö, gunë' dul-la' le riguitsaj xibá que yöl-la' nutsaga ná'. Lësca' caní, channö nu bönni' utsaga ná'alenë'-nu nigula ná', nusanë'-nu bönni' queënu, gunë' dul-la' le riguitsaj xibá que yöl-la' nutsaga ná'.

10 Ní'irö yugu' bönni' usëda queë' Jesús gulë' Lë', ta'nnë':

—Channö caní naca queë' tu bönni' zóalenë'-nu nigula queë', gácarö dxí'a queë' la'tu' cabí utsaga caz në'ë, ugá'anë' tuzë'.

11 Bubi'ë didza' Jesús, rë' légaquië':

—Biti' gaca ila'zí' lu ná'agaca yúgu'të bönachi didza' ni, pero núpasö na' Dios ruzéajni'inë' léguequi.

12 Nacu'ë bönni' biti' tu'tsaga ná'alengaquië' nigula tu' cabí ná'cagaquië' idú bönni' biguiú', tu' gulaljë' ca', ate' ia'zíca'rë' bönni' biti' tu'tsaga ná'alengaquië' nigula tu' bulu'zaga' bönachi xinözgaquië', ate' ia'zíca'rë' bönni' biti' tu'tsaga ná'alengaquië' nigula para gaca ilunë' xichinë' Dios, Nu rinná bë' yehua' yubá. Nu sequi' si' lu në'e didza' ni ral-la' si' lu në'e le.

Jesús rulidza tsáhuë'ë-bi' yugu' bí'ido'

(Mr. 10:13-16; Lc. 18:15-17)

13 Ní'irö yugu' xuz xiná'agacabi' bí'ido' dujuá'agaquië'-bi' ga zoë' Jesús para ixóa në'ë lé'gacabi', en ulidzë' Dios ni'a quégacabi', ate' bönni' usëda queë' bulu'zágui'ë xinözgaquië'.

14 Ní'irö Jesús rë' légaquië', rnnë':

—Guli'güi'bi' yugu' bí'ido' lataj ila'dxinbi' ga zoa', en biti' uzága'li' xinözgacabi', tu' ila'zí' lataj

nupa nácagaca ca yugu' bí'ido' caní ga ni' rinná bē'ē
Dios yehua' yubá.

¹⁵ Jesús guxóa nē'ē lé'gacabi', ate' ní'irō buzē'ē ni'.

*Tu bönni' unná bē' cuidi' dē yöl-la' tsahui' queē'
(Mr. 10:17-31; Lc. 18:18-30)*

¹⁶ Tu bönni' ni zoē' iz cuidi' queē' buduyúē' Jesús,
en rē' Lē':

—Bönni' Usedi idú tsahui'. ¿Bizxi le naca tsahui'
ral-la' guna' para gata' yöl-la' na'bán idú quia'?

¹⁷ Bubi'ē didza' Jesús, rē' lē':

—¿Naru' nōztsenu' lē' na' rnno' quia', rnno' naca'
idú tsahui'? Cuntu nu bönni' náquiē' idú tsahui'.
Tuzē' Dios náquiē' idú tsahui'. Channō rē'ēnu' gata'
yöl-la' na'bán idú quiu', ben ca rinná bē' xibá queē'
Dios.

¹⁸ Ní'irō bönni' na' rē' Jesús, rnnē':

—¿Bí'xilō xibá na'?

Jesús rē' lē':

—Xibá na' gunná bē'ē Moisés:

Biti' gútiu' bönachi.

Biti' gunu' dul-la' le riguitsaj xibá que yöl-la' nut-
saga na'.

Biti' cuanu'.

Biti' innió' que böchi' luzó'o le cabí nácate.

¹⁹ Ben bal xuz xinó'o.

Bidxí'i böchi' luzó'o ca nadxí'i cuinu'.

²⁰ Bönni' na' ni zoē' iz cuidi' queē' gudxē' Jesús,
rnnē':

—Yúgu'tē lē' ni runa' ga gudela' naca' bí'ido'.
¿Naru' zoa ia'tú le ral-la' guna'?

²¹ Jesús rē' lē':

—Channō rē'ēnu' gacu' tsahui', guyéaj, yōjēti'
le dē quiu', ate' dumí na' si'u, bunödzej qué'gaca

bönachi yechi'. Caní gata' yöl-la' tsahui' quiu' ni' yehua' yubá. Ní'irö gudá, gudá' neda'.

22 Cate' bönni' na' ni zoë' iz cuidi' queë' biyönnë' didza' ni, söhuöjë' ruhu'innë' tu' dëda' yöl-la' tsahui' queë'.

23 Ní'irö Jesús gudxë' yugu' bönni' usëda queë', rnnë':

—Le nácatë rea' libí'ili', böniga naca tsázië' nu bönni' dë yöl-la' tsahui' queë' ga rinná bë'ë Dios yehua' yubá.

24 Ia'stú rea' libí'ili', nácarö böniga tsázië' tu bönni' dë yöl-la' tsahui' queë' ga ni' rinná bë'ë Dios ca tödiba' böa' lu nagui yötsi'.

25 Cate' bila'yönnë' yugu' bönni' usëda queë' didza' ni, bulu'bánninë, ta'nnë':

—¿Nuzxi caz gaca ulá, channö?

26 Jesús buyúë' légaquië', en rë' légaquië':

—Biti' gaca ilún bönachi lë ni, pero Dios huáca gunë' yúgu'të.

27 Ní'irö bubí'ë didza' Pedro, en rë' Jesús:

—Buyútsöca', netu' chibucá'anatu' yúgu'të, en zá'entu' Li'. ¿Bízxirö gata' queëtu'?

28 Jesús rë' légaquië':

—Le nácatë rea' libí'ili', dza ni' cate' ucubi yödzölió, ate' cö'a inná bë'a neda', Bönni' Guljë' Bönachi, ga ni' gácatëra' lo, lësca' libí'ili' zá'lenli' neda' na'a, cö'öli' chinnu lataj ga inná bë'ëli', en uchi'a usöröli' quégaca idxinnu cö'të yödzö quégaca zxi'ini xi'sóë' Israel.

29 Nu bönni' rucá'anë' lidxë', o yugu' böchë'ë, o yugu' zanë', o xuzë', o xinë'ë, o nigula queë', o yugu' zxi'inë', o yugu' xiyúë', para gunë' xichina',

bönni' ni si'ë ia'tú gáyua'tërö ca' queë', en gata' ca' yöl-la' na'bán idú queë'.

³⁰ Zián nupa nácgaca lo na'a, ulu'gá'ana cá'asö, ate' nupa nagá'anagaca cá'asö na'a, hualácagaca lo.

20

Rucúdzu'ë didza' Jesús ca tunë' bönni' huen dxin

¹ Gunnë' ca' Jesús:

—Ca gun Bönni' na' rinná bē'ë yehua' yubá naca ca benë' tu bönni' xan yu'u. Birúajë' zílado', yöjdiljë' yugu' bönni' ilunë' dxin ga naca lu xiyúë' ga na' nadúzgaca lubá uva.

² Cate' chibugá'analënë' tsahui' yugu' bönni' huen dxin na', quixxjë' légaquië' tu dumí lazxaj que tu dza, gusöl-lë'ë légaquië' ilunë' dxin ga naca lu xiyúë'.

³ Cate' burúajë' idú xsila, bilé'enë' ia'zícá'rë' bönni' nacuá'asë' ca' ga naca lu yé'ëyi.

⁴ Rë' légaquië': "Guli'tséaj ca' libí'ili' ga naca lu xiyúá', ate' quixxja' libí'ili' le naca tsahui'." La' yöjácátë' ca' légaquië'.

⁵ Burúajë' bönni' xan yu'u na' leyúbölö idú huagubidza, enca' idú xihuö udzö', en la' tuz ca benë', gusöl-lë'ë yugu' bönni' yöjxáquië' lu xiyúë'.

⁶ Burúajë' ca' cate' ni' zoa ia'látí'do'os gubidza, en yöjxáquië' ia'zícá'rë' bönni' nacuá'asë' ca' ni', ate' rë' légaquië': "¿Bizx que zóatsali' ni cá'asö idú dza, bití' bi dxin runli'?"

⁷ Yugu' bönni' na' tē' lē', ta'nnë': "Cuntu nu benna xichintu'." Ní'irö rë' légaquië': "Guli'tséaj ca' libí'ili' ga naca lu xiyúá', ate' quixxja' libí'ili' le naca tsahui'."

8 Cate' chizóa gal-la, bönni' xan yu na' rë' bönni' yu'u lu në'ë yugu' huen dxin na', rnnë': "Bulidza yugu' bönni' huen dxin na', ate' gu'u láxjagaquië'. Quizxju' zí'alö yugu' bönni' na' bila'dxinë' yöjsetë. Udxí na' quizxju' yugu' bönni' na' bila'dxinë' zí'atëlö."

9 Ní'irö bila'dxinë' bönni' yöjéngaquië' dxin cate' ní' zoa ia'láti'do'os gubidza, en gula'zi'ë tu tuhuéajë' dumí lazxaj que tu dza.

10 Cate' bila'dxinë' bönni' yöjéngaquië' dxin zí'atëlö, guléquinë' huazí'gaquië' ia'lati', pero lësca' gula'zi'ë tu tuhuéajë' dumí lazxaj que tu dza.

11 Cate' gula'zi'ë le, gula'nnédë'ë queë' bönni' xan yu'u na',

12 ta'nnë': "Yugu' bönni' ni bila'dxinë' ga yöjsetë, tu chí'isö gulunë' dxin, en tuz ca gudíxjatsö' légaquië' ca netu', ate' netu' ni bentu' dxin idú dza, en gúguida'atu' gubidza."

13 Bubi'ë didza' xan yu na', en rë' tuë': "Böcha'a, biti' bi runa' quiu' le cabí naca tsahui'. ¿Naru' cabí bugá'ana tsáhuiru' sí'u tu dumí lazxaj que tu dza?"

14 Guzxí' lazxju', en böaj lidxu'. Neda' rë'ënda' quizxja' bönni' ni yöjenë' dxin ga yöjsetë la' leze ca na' riguíxja' lí'.

15 ¿Naru' cabí dë lu na'a guna' ca rë'ënda' len le nequi quia'? ¿Naru' ruzxé'etsenu'-në' luzó'o tu' rúnnada'a queë'?"

16 Caní naca, bal-lë' bönni', tu'cá'ana bönachi légaquië' cá'asö, ilácagaquië' lo, ate' ia'zíca'rë' bönni', nácagaquië' lo na'a, ulu'gá'anë' cá'asö. Zían nupa nulidza', pero nabábasö nupa narögaca.

Riguíxjö'ë Jesús leyúbölö ca si' ilútië' Lë'
(Mr. 10:32-34; Lc. 18:31-34)

17 Cate' ni' yu'ë Jesús nōza, sa'yéajë' Jerusalén, guchë'ë quez idxínnutë' bönni' usëda queë', en rë' légaquië':

18 —Buli'yútsöca', ribenru' zéajru' Jerusalén, ate' ni' soa nu udödi neda', Bönni' Guljë' Bönachi, lu ná'agaquië' bixúz unná bë', en lu ná'agaquië' bönni' yudo' usëdi, ate' ila'chúguië' quia' gátia'.

19 Ulu'dödë' neda' lu ná'agaquië' bönni' zi'tu' para ulu'titjë' neda'. Ila'guinë' neda', en ulu'dë'ë neda' lë'e yaga cruz, pero cate' gaca tsonna dza, Dios usubanë' neda' lu yöl-la' guti.

Le gunábanu xiná'agaquië' Jacobo, en Juan
(Mr. 10:35-45)

20 Ní'irö bidxinnu xiná'agaquië' Jacobo, en Juan, yugu' zxi'inë' Zebedeo, ga zoë' Jesús, dzágagaquië'-nu chopë' ni, ate' buzóa zxi'binu lahuë' Jesús, en gunábinu Lë' tu le uzá' ladxë'ë queënu.

21 Jesús gunábinë'-nu, rnnë':

—¿Bizxi rë'ënu'?

Rënu Lë':

—Gunná bë' cö'öbi' tubi' zxi'ina' ni cuita lë'u ibëla, en ia'tubi' cö'öbi' cuita lë'u yögöla ga ni' inná bë'u.

22 Bubi'ë didza' Jesús, rë' légaquië':

—Biti' nözili' le rinábalí'. ¿Naru' huáca guá' ilenli' le qui'i saca' neda', en idílali' nisa ca idila' neda' nisa, gátia'?

Të' Lë':

—Huácatu'.

23 Ní'irö Jesús rë' légaquië':

—Le nácatë le ral-la' qui'i saca'a neda', gaca ca' queëli', en le ral-la' idila' neda' nisa, gátia', idílali' ca' nisa libí'ili', pero que có'öli' cuita lë'a ibëla o cuita lë'a yögöla, bití' dë lu na'a nu gu'a que, pero gata' quégaca nupa ní' chinupë'ë Xuza' quéguequi.

²⁴ Cate' ia'chíë' bönni' usëda queë' Jesús bila'yönnë' lë ni, gula'lenë'.

²⁵ Ní'irö Jesús bulidzë' légaquië', rnnë':

—Nözquézili' ca tunë' yugu' bönni' ta'nná bé'enë' bönachi izá'a, ridödité' bë' ta'nná bé'enë' légaquië', ate' nupa ní' nácagacarö lo ta'nná be'e la' luzë'eguequisö.

²⁶ Bití' gaca caní queëli'. Núti'tëslöli' libí'ili' nu rë'ëni gaca zxön ga zóali', nu ni ral-la' gun dxin que ia'zíca'röli'.

²⁷ Lëasca' caní, núti'tëslöli' libí'ili' nu guë'ëni gaca lo, ral-la' gaca ca tu bönni' nadó'o que ia'zíca'röli'.

²⁸ Lëasca' neda', Bönni' Guljë' Bönachi, bida' ni, calëga para nu gun xichina', pero para guna' xichíngaca bönachi, en udöda' yöl-la' na'bán quia', le quízxjada' ní'a quégaca bönachi zían para ulu'lágaca.

*Ruúnë' Jesús chopë' bönni' nachul-la lógaquië'
(Mr. 10:46-52; Lc. 18:35-43)*

²⁹ Cate' ní' tu'rúajë' yödzö Jericó, bönachi zían söjácalen Jesús.

³⁰ Nacu'ë chopë' bönni' nachul-la lógaquië' ní', rögauquië' ra' nöza. Cate' bila'yönnë' ridödë' Jesús ní', gulu'ë zidzaj didza', ta'nnë':

—Xan, zxí'ini xi'sóë' David, buéchi' ladxi' netu'.

³¹ Bönachi zían nacua' ní' gulë' légaquië' ila'cu'ë dxisö, pero zídzejrö gulu'ë didza', ta'nnë':

—Xan, zxí'ini xi'sóë' David, buéchi' ladxi' netu'.

³² Ní'irö guzë' ribözë' Jesús, en bulidzë' légaquië',
ate' gunábinë' légaquië', rnnë':

—¿Bizxi ré'ënili' guna' queëli'?

³³ Të' Jesús:

—Xan, ré'ënitü' gunu' ga huöálaj guiöj lotu'.

³⁴ Ní'irö Jesús buéchi' ládxë'ë légaquië', ate'
gudanë' guiöj lógaquië'. La' böáljatëgaca guiöj
lógaquië', ate' yöjácalenë' Jesús.

21

*Ridxinë' Jesús yödzö Jerusalén len yöl-la' ba zxön
(Mr. 11:1-11; Lc. 19:28-40; Jn. 12:12-19)*

¹ Cate' bila'dxíngalë' yödzö Jerusalén, en ni'
nacu'ë ga dë yödzö Betfagé ga na' zoa Guí'a Yaga
Olivo, ní'irö gusöl-lë'ë Jesús chopë' bönni' usëda
queë',

² ate' ré' légaquië':

—Guli'tséajtsöca' yödzödo' ni' ca dödilö ga ni'
zóaru', ate' la' tsöjxáca'tëli'-ba' tuba' burro guná'
nága'ba', ate' dzaga lëba' tuba' burro biguiú'do'.
Guli'tsöjsedxi-ba', en ichë'ëli'-ba' quia' ni.

³ Channö nu bi guié libí'ili', guli'guié nu na':
“Xanru' riquinnë'-ba'.” Ní'irö isöl-lë'ë légacaba'
quia'.

⁴ Caní guca para gaca lë na' buzúajë' lu guichi
bönni' bë'ë didza' uláz queë' Dios, gunnë':

⁵ Guli'guié nupa nacuá' yödzö Siön,

Buli'yútsöca', zë'ë Bönni' inná bé'enë' libí'ili'.

Lu yöl-la' nöxaj ladxi' queë' dxíë'-ba' tuba' burro.

Dxíë' cúdzü'ba' búrrodo' nácaba' zxí'iniba' böa'
ruá'aba' yua'.

⁶ Ní'irö bönni' usëda queë' yöjáquië' ni', ate' gulunë' ca na' gunná bé'enë' Jesús légaquië'.

⁷ Gula'ché'ë-ba' burro guná' na', en burro biguiú'do' na', ate' bulu'dxié' cúdzu'gacaba' yugu' lari' guitsa' quégaquië', ate' gudxié' Jesús lahui' lari' na'.

⁸ Nacuá' ca' bönachi zián ni', ate' gula'chilaj yugu' lari' ta'xóa cúdzu'guequi la' nöza. Ia'zícá'rë' bulu'chibë' zin le bulu'zxóë' ga naca la' nöza.

⁹ Gulu'i zidzaj didza' bönachi na' nanörugaca, en nupa na' söjácálen Jesús, ta'nná:

—¡Yöl-la' ba Lë', zxi'ini xi'sóë' David! ¡Bica' ba nu ni za' ni'a que Lë' Xanru'! ¡Yöl-la' ba Dios!

¹⁰ Cate' guyázië' Jesús yödzo Jerusalén, bulu'dzatsa yúgu'të bönachi lu yödzo na', ate' zián nupa gulë' luzé'eguequi, ta'nná:

—¿Nuzxi caz bönni' ni'?

¹¹ Ia'bal-la bönachi ni' ta'nná:

—Nu ni Jesús, bönni' ru'ë didza' uláz queë' Dios, ate' naca ladzë' Nazaret luyú Galilea.

Jesús rulatjë' lö'a yudo'

(Mr. 11:15-19; Lc. 19:45-48; Jn. 2:13-22)

¹² Cate' guyázië' Jesús lö'a yudo' queë' Dios, bulágui'ë ní'ilö yúgu'të nupa tuti' to'o ga naca lö'a yudo' na'. Burixë' ca' yugu' blaga quégaquië' bönni' tu'tsë'ë dumí yödzo zi'tu', en yugu' le ta'bö'i nupa tuti' gu'dodo'.

¹³ Rë' légaquië':

—Nazúaj lu guichi lá'ayi le rnna: “Lidxa' si'i le, yu'u ga nu ulidza Dios”, pero libí'ili' chinunli' lataj ni ca naca yu'u lídxigaca gubán.

14 Cate' ni' zoë' Jesús chila yudo', bal-lë' bönni' nachul-la lógaquië', en bönni' biti' raca ila'zë'ë bila'dxinë' ga na' zoë', ate' Lë' bunë' légaquië'.

15 Gula'lenë' yugu' bixúz unná bë', en bönni' yudo' tu'sédinë' cate' bila'lé'enë' yugu' yöl-la' huáca ni runë' Jesús, en bila'yönnë' tu'ibi' bí'ido' zidzaj didza' ga naca chila yudo', ta'nnabi':

—¿Bica' ba Lë', zxl'ini xi'sóë' David!

16 Ní'irö të' Jesús:

—¿Naru' cabí riyönnu' ca ta'nnabi' bi'i ni?

Bubi'ë didza' Jesús, rnnë':

—Ön, riyönda'. ¿Naru' catu caz nulábanili' le nazúaj lu guichi lá'ayi caní caz ral-la' gaca? Caní rnnna: “Li' benu' ga yugu' bi'i cuidi', en yugu' bí'ido' ni' tádx'i'bi' gulúl-labi' yöl-la' ba le naca idú.”

17 Ní'irö Jesús buca'anë' légaquië', ate' burúajë' Jerusalén. Guyijë' yödzö Betania ga ni' bugá'anë' idú yëla.

Jesús rulidza zi'ë yaga higo

(Mr. 11:12-14, 20-26)

18 Cate' za' rení', ate' ni' söhuöjë' Jesús Jerusalén, ridunë'.

19 Bilé'enë' tu yaga higo rö' gal-la' cuite nöza, ate' gubígui'ë ga na' rö', pero biti' bi bidzölinë' lu yaga na'. Xilágui'sö dxía. Ní'irö Jesús gudxë' le:

—Bíti'rö cuía le ribía quiu'.

La' gubídxitë yaga higo na'.

20 Cate' bila'lé'enë' bönni' usëda queë' lë ni, bulu'bábinë', ate' gula'nábinë' Jesús, ta'nnë':

—¿Nacxi caz guca, gubídxitë yaga ni?

21 Bubi'ë didza' Jesús, rë' légaquië':

—Le nácatë rea' libí'ili', channö tséajlë'ëli' Dios, en biti' gaca chopa ládxi'li', calégasö huáca gunli' ca na' bena' que yaga ni, pero channö guiéli' guí'a ni: Gucuíta, en yöjsóa lu nísado', gaca ca na' innali'.

²² Lësca' caní, yúgu'të le inábali' cate' ulídzali'në' Dios, channö huayéjlë'ëli' gunnë' Dios queéli', huazí'ili' lë na' inábali'.

*Yöl-la' unná bë' dë lu në'ë Jesús
(Mr. 11:27-33; Lc. 20:1-8)*

²³ Ní'irö guyázië' Jesús chila yudo', ate' tsanni ni rusédinë' bönachi nacuá' ni', bila'dxinë' yugu' bixúz unná bë' len bönni' gula tu'zëajni'inë' ga zoë', ate' gula'nábinë' Jesús, ta'nnë':

—¿Bizxi yöl-la' unná bë' dë lu no'o, runtso' yugu' lë ni? ¿Nuzxi budödi lu no'o yöl-la' unná bë' ni?

²⁴ Bubi'ë didza' Jesús, rë' légaquië':

—Lësca' neda' inábatsöqui'da' libí'ili' tu didza'. Channö quíxjöi'ili' neda' ca naca, neda' ca' guía' libí'ili' bizxi yöl-la' unná bë' dë lu na'a runa' caní.

²⁵ ¿Nuzxi caz gusöl-la' Juan para buquülë' bönachi nisa? ¿Naru' Dios gusöl-lë'ë lë', o gula'söl-lë'ë yugu' bönni' lë'?

Ní'irö gula'sí lógaquië' bönni' yudo' na' ta'nnë' la' légacasë':

—Channö innaru': Dios gusöl-lë'ë lë', la' guiëtë' rë'u: “¿Bizx que biti' guyéajlë'ëli' lë'?”

²⁶ Na'a, channö innaru': Gula'söl-lë'ë yugu' bönni' lë', rádxiru' le ilún bönachi lu yödzö tu' ta'yéajlë'ë yúgu'të' Juan na' bë'ë didza' uláz queë' Dios.

²⁷ Que lë ni na' bulu'bi'ë didza', të' Jesús:

—Biti' nöztu'.

Jesús rë' légaquië':

—Neda' ca', biti' guía' libí'ili' bizxi yöl-la' unná bē
dē lu na'a runa' lē ni.

*Rucúdzu'ē didza' Jesús ca gulunbi' chópabi'
zx'inē' tu bönni'*

²⁸ Ní'irō Jesús gudxē' yugu' bönni' yudo' na':

—¿Nacxi rusáca'li' queēli'? Guzōē' tu bönni'
nacuá'abi' chópabi' bi'i bönni' queē', ate' yōjōdxē'-
bi' tubi' bi'i queē' na', gunné': "Zxí'ina', guyéaj na'a
tsōjenu' dxin ga naca luyú quia' ga rō'gaca lubá
uva."

²⁹ Bubí'ibi' didza' bi'i na', gúdxibi'-nē': "Biti'
rē'ēnda' tseja'." Gudōdi ni' bubí'i lādxi'bi', ate'
yōjenbi' dxin.

³⁰ Ní'irō bönni' na' yōjōdxē'-bi' ia'tubi' bi'i queē'
na', en la' tuz ca gunné', ate' bubí'ibi' didza' bi'i ni,
gúdxibi'-nē': "Huaca, Dad. Uyéaja'." Biti' guyéajbi'
bi'i ni.

³¹ ¿Núzxilōbi' bi'i chopa ni benbi' le guyaza
lādxē'ē xúzibi'?

Bulu'bi'ē didza', tē' Jesús:

—Bi'i zí'alō na'.

Ní'irō Jesús rē' légaquiē':

—Le nácatē rea' libí'ili', ila'nōruē' bönni' uquízxaj
tuá' dō', en yugu' nigula udá dzaga ca libí'ili', ate'
ila'yáziē' ga ni' rinná bē'ē Dios.

³² Caní gaca, tu' bidē' Juan, bönni' buquilē'
bōnachi nisa, ga zóali', en busédinē' libí'ili' le naca
tsahui' ca ral-la' gunli', ate' libí'ili' biti' guyéajlē'ēli'
lē', pero yugu' bönni' uquízxaj, en yugu' nigula udá
dzaga gula'yéajlē'ē lē'. Sal-la' bilé'eli' lē' ni, biti'
bubí'i lādxi'li' para tséajlē'ēli' lē'.

Rucúdzu'ë didza' Jesús ca béngaquië' bönni' huen dxin bitì nácaqaquië' tsahui'

(Mr. 12:1-12; Lc. 20:9-19)

³³ Gunnë' ca' Jesús:

—Buli'zë nágali' ia'tú le ucúdzu'a didza'. Guzóë' tu bönni' xan yu'u, ate' bönni' ni budë'ë yugu' lubá uva luyú queë'. Guléquië' lë'aj que, en guchö'önë' tu lerui guiöj ga isié' xisi uva na'. Benë' ca' tu yu'u xitsá' ga gaca nu uyú idútë luyú queë'. Ní'irö budödë' luyú na' lu ná'agaquië' bönni' huen dxin, para ila'zi'ë quégaquië' gatsaj huéaj, ate' sa'yéajë' yödzö zi'tu'.

³⁴ 'Cate' chibidxín dza ulu'chibë' yugu' lubá uva na', gusöl-lë'ë bönni' xan luyú na' bal-lë' ni'a në'ë ga na' nacu'ë bönni' huen dxin ni' para ulu'zi'ë lu ná'agaquië' uláz queë'.

³⁵ Ní'irö gula'zönë' bönni' huen dxin na' yugu' ni'a në'ë na'. Gulunë' huë' tuë', en ia'tué' bëtigaquië' lë', en ia'tué' bulu'ladxë' lë' guiöj.

³⁶ Leyúbölö bönni' xan luyú na' gusöl-lë'ë ca' ia'zícá'rë' ni'a në'ë, ate' guláquië' ziántërë' ca nupa na' gusöl-lë'ë zí'alö, ate' la' tuz ca gulunë' bönni' huen dxin ni' quégaquië'.

³⁷ 'Ga yöjsete, gusöl-lë'ë ca' zxí'inë' ga na' nacu'ë. Guzá' ládxë'ë, rnnë': Hualunë' bal bi'i quia'.

³⁸ Cate' yugu' bönni' huen dxin na' bila'lé'enë'-bi' zxí'inë', la' gula'nnatë' la' légacasë': “Bi'i ni guequi queëbi' luyú ni. Guli'dá, gútiru'-bi', ate' le ral-la' guequi queëbi' guequi queéru'.”

³⁹ Ní'irö gula'zönë'-bi', ate' bulu'béajë'-bi' ní'ilö luyú ga na' rö'gaca lubá uva, ate' bëtigaquië'-bi' ni'.

⁴⁰ Ní'irö Jesús gunábinë' légaquië', gunnë':

—Cate' udxinë' bönni' xan luyú na', ¿nacxi gunë' quégaquië' bönni' huen dxin ni'?

⁴¹ Bulu'bi'ë didza' bönni' yudo' na', tē' Jesús:

—Usunítië' bönni' tuá' dö' na', ate' luyú queë' na' udödë' lu ná'agaquië' ia'zíca'rë' bönni' huen dxin, bönni' ilu'ë lë' uláz queë' cate' idxín dza ulu'chibë' le.

⁴² Ní'irö Jesús gudxë' légaquië':

—¿Naru' catu caz nulábanili' lë na' nazúaj lu guichi lá'ayi ca naca lë ni? Caní rna:

Guiöj na' gula'ró'unë' bönni' tu'cu'ë zö'ö,

la' guiöj ná'asö chinaca guiöj len zö'ö.

Lë cazë' Xanru' benë' ga naca caní,

ate' naca tu le run ga rubániru'.

⁴³ Que lë ni na' rea' libí'ili', xilátjali' ga na' rinná bë'ë Dios idúa queëli', en gata' quégaca bönachi ilún ca ral-la' gun nu nadeli' lataj ni'.

⁴⁴ Nu tsöjchegu' lu guiöj ni, la' cuinsi quitsaj, ate' channö guiöj ni tseajbaga' bönni' na', uzxuzxaj lë'.

⁴⁵ Cate' yugu' bixúz unná bë', en yugu' bönni' yudo' fariseo bila'yönnë' lë na' bucúdzü'ë didza' Jesús, téquibe'enë' bë'ë Jesús didza' ca naca quégaquië'.

⁴⁶ Gula'zóa gula'bö'ë ila'zönë' Jesús, pero guládxinë' bi ilún bönachi zían nacuá' ni' tu' ta'yéajlë' náquië' Jesús bönni' ru'ë didza' uláz queë' Dios.

22

Rucúdzü'ë didza' Jesús ca naca que laní que yöl-la' rutsaga na'

¹ Jesús bë'lenë' légaquië' didza' leyúbölö, ate' bucúdzü'ë didza', rnnë':

2 —Ca gaca quégaca nupa ila'yaza ga rinná bè'ë Dios yehua' yubá naca ca guca quégaca nupa bulidzè' tu bönni' rinná bè'ë cate' benè' laní que dza utsaga ná'abi' bi'i bönni' queë'.

3 Gusöl-lè'ë ni'a nè'ë tsöjxí'gaquiè' yugu' bönni' chinulidzè' para guídagaquiè' laní queëbi', pero biti' gulè'ënè' guídagaquiè'.

4 Ní'irö gusöl-lè'ë ia'zica'rè' ni'a nè'ë, en gudxè' légaquiè': "Guli'tsöjödixitsöca' nupa na' chinulidza', na' guiéli' légaquiè': Buli'yútsöca', chinupá'a la' huagu. Chibétia'-ba' yugu' xpèdxa', en yugu' böa' bédxi renni' quia'. Yúgu'tè chinupá'a. Guli'dá, sóaru' laní queëbi' bi'i bönni' quia' utsaga ná'abi'."

5 Yugu' bönni' na' yöjlídzagaquiè' biti' gulunè' légaquiè' bal, ate' yöjáquiè' que queégaquiè'. Tuè yöjenè' dxin, en ia'túe' guyijè' tsöjö'u tsöjèti'è.

6 Ia'zica'rè' gula'zönè' yugu' ni'a nè'ë na', ate' gulu'è dö' quégaquiè', en bétgaquiè' légaquiè'.

7 Cate' bönni' na' rinná bè'ë biyönnè' lè ni, gulénè', en gusöl-lè'ë yugu' bönni' queë' röjáquiè' gudil-la, ate' bétigaquiè' yugu' bönni' hueti bönachi na', en bulu'quélé'ë guí ládzaquiè'.

8 Ní'irö bönni' na' rinná bè'ë gudxè' yugu' ni'a nè'ë, gunnè': "Le nácatè chinupá'a que laní na', pero yugu' bönni' bulidza' biti' guláquiè' lesaca' guídagaquiè' laní quia'.

9 Guli'tséajtsöca' gapa naca la' nöza, en buli'lidza yúgu'tè nupa tsöjxáca'li' ni' para guídagaca laní queëbi' bi'i bönni' quia' utsaga ná'abi'."

10 Ní'irö bila'rúajè' ni'a nè'ë na', söjáquiè' gapa naca la' nöza, ate' bulu'tubè' yúgu'tè nupa yöjxáca'gaquiè', yugu' bönni' dxi'a, en yugu' bönni'

tuá' dö', ate' ga na' raca laní bilíró bönachi.

¹¹ 'Cate' guyázië' bönni' na' rinná bē'ë para uyüë' nupa ni' nudúbigaca, bilé'enë' tu bönni' bití' nácuë' lari' tsahui' le bunödzejë' quégaquië' bönni' nacu'ë laní na'.

¹² Ní'irö gudxë' bönni' na': "Bönni'do', ¿zóatso' ni, en bití' nacu' lari' tsahui' bunödza' quégaca nupa nacua' laní?" Bönni' na' busayaj ru'ë.

¹³ Ní'irö bönni' na' rinná bē'ë gudxë' nupa na' tun xichinë', gunné': "Guli'guga' ni'a nē'ë bönni' ni. Guli'tsöjchú'un-në' ní'ilö ga na' rö'ö chul-la. Ní' cödxë', en utíl-la láyë'ë, lu yöl-la' ruhu'ini queë'."

¹⁴ Ní'irö Jesús gudxë' légaquië':

—Zian nupa nulidza', pero nabábasö nupa ila'rögaca.

Jesús ru'ë didza' ca naca le riguízxaj lázaru'

(Mr. 12:13-17; Lc. 20:20-26)

¹⁵ Ní'irö yugu' bönni' yudo' fariseo na' bulu'zë'ë ni', ate' gulún xtídza'gaquië' ilunë' ga bi innë' Jesús para gaca ulu'zéguië' Lë' didza'.

¹⁶ Para ilunë' caní, gula'söl-lë'ë bal-lë' bönni' dá'gaquië' légaquië', len bönni' dá'gaquië' Herodes, ga zoë' Jesús, nupa na' gulë' Jesús:

—Bönni' Usedi, nöztu' Li' ru'u didza' cátëze naca, en naca idütë' lí ca rusédinu' ca naca queë' Dios, en bití' ru'í' ládXu'u le ta'nná quiu' bönachi, tu' cabí' ruchi'a rusöröu' bönachi ca naca le ta'nnasö bönachi na'.

¹⁷ Gudíxjöi'i netu'. ¿Nacxi runi lí? ¿Naru' run bayudxi, o bití' run bayudxi quízxaj laztu' queë' César, bönni' yödzö zi'tu' na' rinná bé'enë' rë'u?

¹⁸ Réquibe'enë' Jesús té'ënnë' ulu'béajë' Lë' didza', ate' gudxë' légaquië':

—Libi'ili', bönni' rulu'isö tsahui' cuinli', ¿bizx que ru'ili' didza' le ruzóa neda' ra' guí'a?

¹⁹ Buli'luí'i neda' dumí le riguízaj lázali'.

Ní'irö bulu'luí'inë' Lë' tu dumí que yödzö Roma.

²⁰ Jesús gunábinë' légaquië', rnnë':

—¿Nuzxi lahui da' ni, en nuzxi le nazúaj lë'e dumí ni?

²¹ Të' Lë':

—Queë' César na'.

Ní'irö Jesús gudxë' légaquië':

—Guli'guízajë' César le nequi queë' César, ate' Dios le nequi queë' Dios.

²² Cate' bila'yönnë' lë ni, bulu'bánninë' ca naca didza' tsahui' bubí'ë Jesús, ate' bulu'cá'anë' Lë', söhuőajtëgaquië'.

*Ta'nabi yúdxinë' Jesús ca ulu'bán nupa chinátigaca
(Mr. 12:18-27; Lc. 20:27-40)*

²³ La' dza ná'asö yugu' bönni' yudo' saduceo, bönni' na' ta'nnë' bití' ulu'bán nupa chinátigaca, bila'dxinë' ga zoë' Jesús, ate' gula'nábinë' Lë',

²⁴ ta'nnë':

—Bönni' Usedi, Moisés gunné': “Channö gátië' tu bönni' zóanu nigula queë', en cuntú nu bi'i zóabi' queë', ní'irö bi'i böché'ë bönni' na' ral-la' utsaga ná'alēnbi'-nu nigula uzēbi' queë', para cabí' iníti dí'a dza queë' bönni' böchi'bi' na'.”

²⁵ Gula'cuá'abi' gadxi bi'i bönni' ga zóatu', naca böchi'gacabi'. Bi'i zí'alö na' butsaga ná'alēnbi'-nu nigula, ate' gútitēbi'. Tu' cuntú nu bi'i queēbi' zóabi', bi'i buropi na' butsaga ná'alēnbi'-nu nigula uzēbi' queēbi' bi'i böchi'bi' na'.

26 Lësca' caní guca queëbi' bi'i buropi na', enca' queëbi' bi'i bunní, en la' tuz ca guca quégacabi' igádxitëbi', gulátibi' yúgu'tëbi'.

27 Ga búdxitë gútinu ca' nigula na'.

28 Cate' idxín dza ulu'bán nupa chinátigaca, ¿núzxilögacabi' bi'i gadxi ni' guéquinu nigula na' queëbi', tu' bulu'tsaga ná'alenbi'-nu yúgu'tëbi' nigula na'?

29 Ní'irö bubí'ë didza' Jesús, ate' rë' légaquië':

—Nachíxili' libí'ili' tu' cabí réajni'ili' le nazúaj lu guichi lá'ayi, en tu' cabí núnbë'ëli' yöl-la' huáca queë' Dios.

30 Cate' idxín dza ulu'bán nupa chinátigaca, bíti'rö gaca yöl-la' rizóalen nigula, en bití' ulu'tsaga ná'agaquië', pero gáçagaquië' ca nácagaquië' gubáz lá'ayi queë' Dios nacué' yehua' yubá.

31 Ca na' ral-la' ulu'bán nupa chinátigaca, ¿naru' cabí nulábanili' lë na' gudxi cazë' Dios libí'ili'?

32 Caní gunné': "Neda' naca' Dios queë' Abraham, en Dios queë' Isaac, en Dios queë' Jacob." Dios na' bití' náquië' Dios quégaca nupa nátigaca tsaz, pero náquië' Dios quégaquië' bönni' ni nabánagaquië' sal-la' gulátie'.

33 Cate' bila'yöni bönachí nacué' ni' didza' ni, bulu'bani ca naca lë na' rusédinë' Jesús léguequi.

Xibá queë' Dios le naca lo

(Mr. 12:28-34)

34 Cate' guléquibe'enë' bönni' yudo' fariseo ca benë' Jesús, busayjë' ruá'agaquië' bönni' yudo' saduço, ní'irö bulu'dubë' yúgu'të'.

35 Tuë' bönni' nútsë'ë ládjagaquië', en nazëdë' xibá queë' Moisés, gú'unnë' si' bë'ë Jesús.

36 Que lë ni na' gunábinë' Jesús, rnnë':

—Bönni' Usedi, ¿bízxilö xibá queë' Dios naca lo?

37 Jesús rë' lë':

—Idxi'inu' Xanu' Dios idú ládxi'u, en idú icja ládxi'do'o, enca' len idú yöl-la' réajni'i quiu'.

38 Xibá ni naca lo, en nazáca'tërö.

39 Xibá na' naca buropi, la' ca nácatë, en caní rna: "Idxi'inu' böchi' luzó'o ca nadxi'i cuinu'."

40 Chopa xibá ni nácgaca ga röjlöz yúgu'të le rinná bë' xibá queë' Dios, en yúgu'të le bulu'sédinë' bönni' gulu'ë didza' uláz queë' Dios.

¿Nuzxi zxi'ini náquië' Cristo?

(Mr. 12:35-37; Lc. 20:41-44)

41 Tsanni ni' nacu'ë tsözxön bönni' yudo' fariseo na', Jesús gunábinë' légaquië',

42 rnnë':

—¿Nacxi rusáca'li' queëli' queë' Bönni' na' lë' Cristo? ¿Nuzxi zxi'ini náquië'?

Bulu'bi'ë didza', ta'nnë':

—Zxi'ini xi'sóë' David náquië'.

43 Ní'irö Jesús rë' légaquië':

—¿Bizx que na' lë' cazë' David bulidzë' Lë', gunné': "Xana"? Caní gunné' cate' ni' bë'ë didza' uláz queë' Dios Bö' Lá'ayi, gunné':

44 Xanru' Dios gudxë' Xana':

"Gurö'ö cuita lë'a ibëla, cate' gunra' ga ulu'zechu zxi'bigaca Lo' nupa tequi Li' zi'."

45 Channö David na' gunné' queë' náquië' Xanë', ¿nacxi caz naca, rnnali' náquië' zxi'ini xi'sóë' David na'?

46 Cuntu nu guca ubí'i didza', ate' ga gusí lo dza na', cúnturö nu burugui bi inábini Lë'.

23

Jesús ruzégui'ë yugu' bönni' yudo' didza'
(Mr. 12:38-40; Lc. 11:37-54; 20:45-47)

¹ Ní'irö Jesús bé'lenë' bönnachi nacuá' ni' len yugu' bönni' usëdi queë' didza'.

² Rë' légaquië':

–Yugu' bönni' yudo' fariseo, en yugu' bönni' yudo' usedi nuhuöázagaquië' xilatjë' Moisés, en tu'sëdinë' bönnachi.

³ Que lë ni na', guli'gún yúgu'të le ilë' libí'ili', pero biti' gunli' libí'ili' ca na' tunë' légaquië', tu' tu le ta'nnë', en ia'tú le tunë'.

⁴ Le ta'nná bé'enë' bönnachi naca ca tu yua' zi'i le cabí sequi' nu guá', ate' tu'gu'ë le ya'zxicjagaca bönnachi, pero légaquië' biti' té'ënnë' ulu'tenë' le, calëga len tuze xibõn ná'agaquië'.

⁵ Yúgu'të le tunë', tunë' para ila'lé'e bönnachi légaquië', tu' tunë' zxön le túgui'ë yen ná'agaquië', en ra' xigágaquië' ga na' nuzúajgaquië' tu le nazúaj lu guichi lá'ayi, en tu'tunnë' luzxi lari' nácugaquië'.

⁶ Té'ënnë' ila'bö'ë ga naca lataj lo ga na' tu'dubë' tahuë', enca' ga na' naca lataj lo lu yu'u ga tu'dubë' tu'sëdë' queë' Dios.

⁷ Lësca' caní, té'ënnë' ulu'gapa bönnachi légaquië' didza' ba zxön gapa naca lógaca bönnachi, en té'ënnë' ilë bönnachi légaquië': “Padiux, bönni' usedi.”

⁸ Pero libí'ili', biti' ral-la' gunli' ga nu guië libí'ili': Bönni' Usedi, tu' zoa tuz Nu naca Bönni' Usedi queëli', neda', Cristo, ate' yúgu'tëli' nácali' böchi'li' tuli' ia'tuli'.

⁹ Cuntu nu guiëli' luyú ni, biti' innali': Xuz, tu' zoa tuz Nu naca Xúzili', zoë' yehua' yubá.

10 Biti' gunli' ga nu guié libí'ili': Xan, tu' zoa tuz Nu naca Xanli', neda', Cristo.

11 Nu nutsa' ládjali' nu run xichinli' ia'zíca'röli', nu ni na' gácarö lo ga zóali'.

12 Channö nu uzóa cuini lataj lo, cá'asö ugá'ana nu na', pero nu naca nöxaj ladxi', gaca lo.

13 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Ruzága'li' nöza sójácálen bönachi para ila'dxín ga ni' rinná bē'ē Dios yehua' yubá. La' libí'isili' biti' sequi' tsú'uli', en biti' ru'ili' lataj ila'yú'u nupa tē'ēni ila'yú'u.

14 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Rugúali' yugu' lídxigacanu nigula uzēbido', en para ulu'isö tsahui' cuinli', xidzé rulídzali'-nē' Dios. Que lē ni na', zítērö irugu queēli' qu'i sáca'li'.

15 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Ridödili' idú lu nísado', en idú yödzölió ni para gunli' ga tseaj ládxē'ē tu bönni' Dios tsözxón len libí'ili', en cate' chiguzxéqui'li'-nē', runli' ga nabága'rē' xíguia' ca libí'ili', ate' tsöjtsu'ē lu guí gabila.

16 'Bica' bayechi' libí'ili'. Nachul-la loli', ate' rē'ēnili' ulu'ili' nöza bönachi. Caní naca queēli' tu' rnnali': "Channö bi rizí' lu nē'ē tu bönni' ni'a que yudo', biti' run bayudxi, pero channö runē' le ni'a que oro dzö'ö yudo', bayudxi gun."

17 Libí'ili', bönni' lo chul-la, en tu' caréajni'i. ¿Bízxilö nácarö lo? ¿Naru' oro na', o yudo' le run lá'ayi oro na'?

18 Lësca' caní rnnali': "Channö nu bönni' gunë' le ni'a que bucugu lá'ayi, biti' gun bayudxi, pero channö gunë' le ni'a que gun zxoa lahui, bayudxi gun."

19 Libí'ili', nazídili', en nachul-la loli'. ¿Bízxilö nácarö lo? ¿Naru' gun zxoa láhuisö, o bucugu lá'ayi na' run lá'ayi gun na'?

20 Que lë ni na', channö nu bönni' runë' le ni'a que bucugu lá'ayi, runë' le ni'a que le, enca' ni'a que yúgu'të le zxóagaca láhuisö.

21 Lësca' caní, channö nu bönni' runë' le ni'a que yudo', runë' le ni'a que le, enca' ni'a queë' Dios, nun cazë' xilatjë' ni'.

22 Lësca' caní, channö nu bönni' runë' le ni'a que yehua' yubá, runë' le ni'a que lataj ga rö'ë rinná bë'ë Dios, enca' ni'a que Lë cazë' Dios rö'ë ni'.

23 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' ruluí'isö tsahui' cuinli'. Caní naca queëli' tu' riguízxjali' que yudo' tu cö' huéaj tu' chí cö' le rizi'ili' que xöhuéaj, en que guixi' anís, en que comino la' huagu, pero rucá'anali' le nácarö lo le rinná bë' xibá queë' Dios, tu' cabí runli' le naca tsahui', en biti' ruhuéchi' ládxi'li' luzá'ali', en biti' réajlë'ëli'-në' Dios. Yugu' lë ni run bayudxi gunli', en lës biti' ucá'anali' ia'zica'rö lë na' runli', le riguízxjali' que yudo'.

24 Libí'ili', nachul-la loli', en ré'ënili' ulu'ili' nöza bönachi. Ca na' runli' naca ca rudödili' bödzádzado' le ré'jali', rubéajgacali'-ba' bö'iyudo', pero ré'jali'-ba' böa' ta'bië'-ba' bönni'.

25 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' ruluí'isö tsahui' cuinli'. Nácali' ca zxíga'do' ré'jali', en yö'öna ráhuili'.

Riguíbili' le nuá' cuita lë'e, pero lu icja ládxi'do'oli' nalí yugu' le ribanli', en yugu' le ruá' dö' runli'.

²⁶ Libí'ili', bönni' yudo' fariseo lo chul-la. Zí'alö guli'quibi le nuá' lu zxíga'do', en lu yö'öna, lë na' sa'yéaj gácali' tsahui' lu icja ládxi'do'oli', para gácali' ca' tsahui' cuita lë'ëli'.

²⁷ 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Caní naca queëli' tu' nácali' ca yugu' yeru ba quégaca nupa chinátigaca, le nácgaca chiguíchido'os cuita lë'e, en le nácatë lachi nalá'gaca, pero nalí'gaca dxita quégaca nupa chinátigaca, enca' yúgu'të le siguti.

²⁸ Lësca' caní nácali' libí'ili'. Le nácatë láhuisö rulu'i cuinli' tsahui' lógaca bönachi, pero lu icja ládxi'do'oli' nalili' yugu' le rulu'isö tsahui' cuini, en le ruá' dö' runli'.

²⁹ 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Ruchísali' biquitaj que ba gapa nagáchi'gaquië' bönni' gulu'ë didza' uláz queë' Dios, en ruí'ili' biquitaj gapa nagáchi'gaca bönachi tsahui'.

³⁰ Lësca' caní rnnali': "La'tu' zóatu' dza ni'te cate' gula'cu'ë xuz xtó'otu', biti' guntu' légaquië' tsözxön cate' gulútië' yugu' bönni' gulu'ë didza' uláz queë' Dios."

³¹ Tu' rnnali' caní, la' libí'isili' runli' ba nalí nácali' zxí'ini xi'sóagaca nupa ni' bétigaca yugu' bönni' gulu'ë didza' uláz queë' Dios.

³² Caní naca, rusubaga' cuinli' xíguia' na' gula'báguië' xuz xtó'oli'.

³³ 'Libí'ili' na', nácali' ca yugu' bëla sínia', en di'a dza quégacaba' bëla sínia'. ¿Nacxi caz uláli' lu le

usaca' zi libí'ili' lu guí' gabila?

³⁴ Que lë ni na', neda' isöl-la'a queëli' yugu' bönni' ilu'ë didza' uláz queë' Dios, enca' yugu' bönni' ta'yéajni'inë', en yugu' bönni' usedi. Yugu' bönni' ni, bal-lë' gútili'-në', en ia'zica'rë' udá'ali' lë'e yaga cruz, en ia'zica'rë' quinli' gapa naca lu yu'u ga rudúbili' rusédali' queë' Dios, ate' ulágalí' légaquië' tu ia'tú yödzö.

³⁵ Caní gaca, ibága'li' libí'ili' xíguia' que idútë rön quégaquië' bönni' tsahui' le gulalaj luyú, ga gudela' nu bëti Abel, bönni' tsahui', ga ridxintë nupa bëtigaca Zacarías, zxí'inë' Berequías, bönni' na' bëtili'-në' gatsaj láhui'lö ga dë yudo', en ga dë bucugu lá'ayi ga na' tu'zégui'ë' böa' bëdxido' lahuë' Dios.

³⁶ Le nácatë rea' libí'ili', yúgu'të lë ni ila'baga' bönachi nacúa' dza ni zóaru' na'a.

*Jesús ribödxë' ni'a que yödzö Jerusalén
(Lc. 13:34-35)*

³⁷ Lësca' caní gunnë' Jesús:

—Jerusalén, Jerusalén, libí'ili' na' rútigacali'-në' bönni' tu'ë didza' uláz queë' Dios, en ruládxí'gacali' guiöj nupa nasöl-lë'ë Dios. Zían luzuí gú'unida' utuba' libí'ili' quia', ca runba' yöjede, rutúbiba' bórado' queëba' zcan xíliba', pero biti' gú'unili'.

³⁸ Buli'yútsöca', cá'asö ugá'ana yu'u lídxili'.

³⁹ Caní gaca, tu' rea' libí'ili', na'a isí lo biti' ulé'eli' neda' cate' innáröli': “Lá'ayi náquië' Bönni' na' zë'ë uláz queë' Xanru'.”

24

Rigúxjō'ë Jesús ca si' ulu'quínnajë' yudo'

(Mr. 13:1-2; Lc. 21:5-6)

¹ Birúajë' Jesús chila yudo', en tsanni ni' rizë'ë ni', gula'bígui'ë bönni' usëda queë' ga na' zoë', ate' bulu'luí'inë' Lë' ca nátagaca zö'ö nagú'ugaca lë'a yudo'.

² Bubi'ë didza' Jesús, ate' rë' légaquië':

—¿Rilé'etseli' yúgu'të lë ni? Le nácatë rea' libí'ili', bití' ca' ugá'ana guiöj nabaga' luzë'e ni, le cabí iguínnaj.

Le ilaca bë' chizóa idxín dza údxi que yödzölió

(Mr. 13:3-23; Lc. 21:7-24; 17:22-24)

³ Cate' ni' rö'ë Jesús ga naca lu Guí'a Yaga Olivo, bila'dxinë' bönni' usëda queë' ga na' zoë' queëzë', en të' Lë':

—Gudíxjöi'i netu', ¿bátaxi ilaca lë ni, en bizxi gaca bë' dza huödu', en dza údxi que yödzölió ni?

⁴ Ní'irö bubi'ë didza' Jesús, ate' rë' légaquië':

—Buli'yú para cabí nu si' ye'e libí'ili',

⁵ tu' zá'gaquië' zían bönni' légaquië' ca lea' neda'. Ila'nnë' nátagaquië' Cristo, en ila'zí' ye'enë' bönachi zían.

⁶ Huayönili' raca gudil-la, en le ruí'i didza' que gudil-la, pero bití' cö'öli' böniga, tu' ral-la' ilaca yúgu'të lë ni, pero cabí ridxini dza údxi cate' ilácarö lë ni.

⁷ Til-la tu yödzö len ia'tú yödzö, ate' tu ga nu rinná bë' len ia'tú ga nu rinná bë'. Ilatsaj yödzöhuë' zxön, en gaca gubín, ate' zían lataj tödi budó' xzu'.

⁸ Yúgu'të lë ni nátagaca le isí lógaca yugu' le ila'guí'i ila'zaca' bönachi.

⁹ Ní'irö ulu'dödi bönachi libí'ili' lu na' nu usaca' zi' libí'ili'. Yúgu'të bönachi ulu'dí'i libí'ili' tu' dá'ali' neda', en ilútië' bál-lali' libí'ili'.

¹⁰ Cate' gaca caní, gaca chopa ládxi'gaca zián bönachi, en ulu'cá'ana neda', ate' udödi tu ia'tú luzé'e, en tu ia'tú udí'i luzé'e.

¹¹ Ní'irö ulu'luí'i lógaquië' zián bönni' ta'zì yë'ë. Ulu'luí'i cuíngaquië' ca yugu' bönni' tu'ë didza' uláz queë' Dios, en ila'zì yé'enë' bönachi zián.

¹² Iluá'ada' dö' bönachi, ate' que lë ni na' bíti'rö ila'dxí'i böchi' luzé'eguequi.

¹³ Nu guequi tsaz queë' Dios ga idxintë dza údxi, nu ni ulá.

¹⁴ Idú yödzülió gaca libán que didza' dxi'a ca rinná'bë'ë Dios para gaca ba nalí que lógaca yúgu'të bönachi izá'a, ate' ní'irö idxín dza údxi.

¹⁵⁻¹⁶ Nu ulaba lë ni ral-la' uzéajni'i ladxi'. Gunnë' Daniel, bönni' bë'ë didza' uláz queë' Dios, gunné': "Tsaza le rudí'inë' Dios lataj lá'ayi queë' Dios, lë na' rusuniti." Cate' ilé'eli' gaca caní, ní'irö nuli' zóali' luyú Judea ral-la' tsöjzxúnajli' saca' guí'ado'.

¹⁷ Nu dxía ícjo'olö bití' gal-la' huötaj tsöjzxí' bi dë que lu yu'u, pero ral-la' izxúnajtë.

¹⁸ Nu zoa la' guixi', bití' gal-la' huőaj tsöjzxí' lari' que.

¹⁹ Bica' bayechi' yugu' nigula si' ulu'zóanu bí'ido' quégacanu, enca' nigula ni' tu'gádxi'nu-bi' bí'ido' quégacanu cate' idxín dza ni'.

²⁰ Buli'lidzë' Dios inábili'-në' cabí idxín dza ni' izxúnajli' cate' raca beo' ziaga o cate' naca dza lá'ayi,

²¹ tu' ila'guí'i ila'záca'tërö bönachi dza ni' ca gula'guí'i gula'záca' bönachi dza ni'te cate' si' guta'

gurö'ö yödzölió, ga ridxintë na'a dza, en calëga dza zá'gaca bití' ila'guí'i ila'zaca' caní.

²² Cate' idxín dza ni', channö Dios bití' cuéqui lahuë' quégaquië', cuntú nu ulá, pero cuéqui lahuë' quégaquië' dza ni', en gácalenë' nupa gurö cazë' Lë'.

²³ 'Ní'irö bití' tséajlë'ëli' channö nu idxín queëli', en guíë libí'ili': "Buli'yútsöca', ni zoë' Cristo", o inná: "Ní' zoë'."

²⁴ Ulu'luí'i lógaquië' zían bönni' ta'zí' yëë, en ila'nnë' nácagaquië' Cristo, o ila'nnë' tu'ë didza' uláz queë' Dios. Ilunë' le ilaca bë', en le ilún ga ulu'bani bönachi, ate' ila'zí' yé'enë' nupa gurö cazë' Dios channö huala'zéqui'në'.

²⁵ Buli'yútsöca', chigudxi caza' libí'ili' yúgu'të lë ni zí'atëlö ca si' ilaca.

²⁶ Que lë ni na', bití' irúajli' channö ila'dxín queëli' nupa ilë libí'ili': "Buli'yútsöca', ni' zoë' Cristo lu lataj cá'asö." Lësca' caní, bití' tséajlë'ëli' channö ila'nná: "Buli'yútsöca', lu yu'u zoë'."

²⁷ Ca na' raca cate' rëpi yösa ga rilén gubidza, en ruzení' ga ribía gubidza, lësca' caní gaca cate' huöda' neda', Bönni' Guljë' Bönachi.

²⁸ Ilácatë caní, ca na' ta'nná bönachi: "Gátitës ga dë tu le nati, ni' ulu'dubi cázaba' bíchulab."

*Ca gaca cate' huödë' Bönni' Guljë' Bönachi
(Mr. 13:24-37; Lc. 21:25-33; 17:26-30, 34-36)*

²⁹ Gunnë' ca' Jesús:

—Tödi yugu' dza ni' cate' ila'guí'i ila'zaca' bönachi caní, ichul-la gubidza, ate' beo' bití' gunna bení' que. Ila'guínnajba' böläj lúzxiba, ate' ila'zxízi le nalá'gaca naca tsutsu lúzxiba.

³⁰ Ní'irö ilá' lahui lúzxiba le gaca bē' huöda' neda', Bönni' Guljē' Bönachi, ate' ila'bödxí yechi' yúgu'tē bönachi yödžölió ni, cate' ila'lé'e neda', Bönni' Guljē' Bönachi, suzá'a lu böaj lúzxiba, dē lu na'a yöl-la' unná bē', en yöl-la' huáca zxön.

³¹ Ní'irö isöl-la'gaca'-nē' gubáz lá'ayi quia'. Ulu'cödxē' zidzaj lúzuba' böa' guixi', ate' ulu'tubē' nupa naböa' quia', nacuá' idapa la'atē yödžölió, en yúgu'tē lataj zzan lúzxiba.

³² 'Buli'zėjni'i ládxi'li' le rusedi libí'ili' le raca que yaga higo. Cate' ta'lén ni'a nē'e yúludo', en chirubía xilagui' yúludo', inözili' chizóa idxín cusubá.

³³ Lēšca' caní, cate' ilé'eli' taca yúgu'tē lē ni, inözili' chizóa idxín dza údxi na', en chiridzaga lahui.

³⁴ Le nácatē rea' libí'ili', yúgu'tē lē ni ilaca zí'atēlö ca ilátigaca bönachi nacuá' dza ni'.

³⁵ Huadödi quégaca lúzxiba, en luyú ni, pero yugu' xtídza'a bití' ila'dödi cá'asö.

³⁶ 'Cate' idxín dza ni' cuntú nu nözi. Bití' nözguequinē' gubáz lá'ayi queē' Dios nacu'ē yehua' yubá, en bití' nözda' neda', Zxí'inē' Dios, pero tuzē' Dios Xuz nözinē'.

³⁷ 'Ca na' guca dza cate' ni' zoē' Noé, lēšca' caní gaca cate' huöda' neda', Bönni' Guljē' Bönachi.

³⁸ Yugu' dza ni' zí'atēlö ca si' idxín nisa guiöj le busuniti yödžölió, gulē'aj gulahuē', bulu'tsaga ná'agaquiē', en bulu'dödē' zxi'inigaquiē' lu yöl-la' rutsaga na' ga bidxintē dza guyáziē' Noé lē'e barco zxön ni' benē',

³⁹ en bití' guléquibe'enē' cate' bidxintē nisa guiöj le busuniti yödžölió, ate' gula'nítiē' yúgu'tē'. Lēšca'

caní gaca cate' si' huöda' neda', Bönni' Guljē Bönachi, cuntu nu guéquibe'e.

⁴⁰ Dza huöda' ila'cu'ë chopē' bönni' la' guixi'. Tuē uchē'a-nē' quia', ate' ia'tué' ucá'ana'-nē'.

⁴¹ Ila'cuá'anu chópanu nigula nacuá'anu huētu. Tunu uchē'a-nu quia', ate' ia'tunu ucá'ana'-nu.

⁴² 'Buli'subán ládxi'li' tu' cabí nözili' bizxi dza huöda' neda', Xanli'.

⁴³ Na'a, guli'tséajni'i lē ni. La'tu' nözinē' xan yu'u bizxi dza guídē' gubán, huanē'ē yēla, en bití' gu'ē lataj nu quidaj zō'ö para cuan le dzō'ö lidxē'.

⁴⁴ Que lē ni na', buli'subán ládxi'li' ca' libí'ili', tu' huöda' neda', Bönni' Guljē' Bönachi, tu dza bití' nuzóa icjali'.

Bönni' huen dxin tsahui', en bönni' huen dxin bití' náquiē' tsahui'

(Lc. 12:41-48)

⁴⁵ Gunnē' ca' Jesús:

—¿Nuzxi caz bönni' huen dxin náquiē' tsahui', en réajni'inē', bönni' huen dxin na', xanē' cu'ë lu nē'ë bönachi nacuá' lidxē' para gu'ë le ilágugaca cate' idxín dza?

⁴⁶ Bica' ba bönni' huen dxin na' náquiē' tsahui', bönni' na', cate' udxinē' xanē', uduxáquiē' lē' caní runē' le nudödē' xanē' lu nē'ë.

⁴⁷ Le nácatē' rea' libí'ili', yúgu'tē le dē queē' xanē', udödē' lu nē'ë bönni' huen dxin na' runē' caní.

⁴⁸ Channö huöáquiē' bönni' huen dxin queē' huiá' dö', en sa' ládxi'ë, innē': “Huadzenē' xana', en bití' huödatiē'”.

⁴⁹ en channö isí lahuē' gundē' zi' bönni' túnlenē' lē' tsözxön dxin, en isí lahuē' ca' guí'aj gágulenē' nupa ta'zudxi,

50 ní'irö huödë' xanë' bönni' huen dxin na' tu dza cate' biti' zoë' ribözë', o tu yëla biti' réquinë'.

51 Ní'irö xanë' na' usaca' zí'dë'ë bönni' huen dxin na', en gunë' ga gaca queë' ca na' ral-la' gaca quégaca nupa tu'lu'isö tsahui' cuínguequi. Ní'irö cödxí yechë'ë, en gagu zxea láyë'ë.

25

Rucúdzü'ë didza' Jesús ca naca quégacabi' chibi' bi'i nigula ra'bando'

1 Gunnë' ca' Jesús:

—Ca gaca quégaca nupa ila'yaza ga rinná bë'ë Dios yehua' yubá naca ca guca quégacabi' chibi' bi'i nigula ra'bando'. Gula'zí'ibi' le nuá'gaca guí' quégacabi', ate' bila'rúajbi' tsöjtságagacabi' bönni' ut-saga në'ë.

2 Gáyu'bi' nácgacabi' bi'i biti' ta'yéajni'ibi' ate' ia'gáyu'bi' nasína'gacabi'.

3 Yugu' bi'i nigula biti' ta'yéajni'ibi' na' gula'zí'ibi' le nuá'gaca guí' quégacabi' pero biti' guluá'abi' ia'lati' za régui.

4 Yugu' bi'i sina' na' guluá'abi' za régui lu böga'do' quégacabi' len le nuá'gaca guí' quégacabi'.

5 Tu' gudzenë' bönni' utsaga në'ë, gudödi yëla lógacabi', en gulásitëbi'.

6 Cate' bidxín idú guluhuëla, biyön chi'i nu rinnë zidzaj, rnna: “¡Chizë'ë bönni' utsaga në'ë! ¡Guli'rúaj tsöjtságali'-në'!”

7 Ní'irö gula'yásabi' yúgu'tëbi' bi'i nigula na', ate' bulu'pá'abi' le nuá'gaca guí' quégacabi'.

8 Gulu'ibi' didza' bi'i biti' ta'yéajni'ibi' na', en gulëbi' yugu' bi'i sina' na': “Guli'gunna queëtu'

láti'do' za régui queéli' tu' tu'úlu le nuá'gaca guí queétu' ni."

⁹ Bulu'bí'ibi' didza' bi'i sina' na', gula'nnabi': "Biti' gaca, tu' cabí bi ugá'ana queétu', en queéli'." Guli'tséajtsöca' ga ridó'o za régui, tsöj'ö'uli' queéli'."

¹⁰ Tsanni ni' söjácabi' söjxí'gacabi' le, bidxinë bönni' utsaga në'ë. Yugu' bi'i na' nacuá'abi' sina', en ta'bözabi' lë' gula'yú'ulentëbi' lë' ga na' raca laní que utsaga na', ate' la' guyáyajtë yu'u.

¹¹ Gudödi ni' ia'zíca'röbi' bi'i nigula ra'bando' na' bila'dxinbi' ni', ate' bulu'lídzabi'-në', en gula'nnabi': "Xan, Xan, gusalaj queétu'."

¹² Lë' bubi'ë didza', rnnë': "Le nácatë rea' libí'ili', bití' nözda' gazxi libí'ili'."

¹³ Ní'irö Jesús gudxë' légaquië':

—Buli'subán ládxi'li', tu' cabí nözili' bizxi dza o bizxi yëla huöda' neda', Bönni' Guljë' Bönachi.

Rucúdzu'ë didza' Jesús ca naca que dumí zaca'

¹⁴ Gunnë' ca' Jesús:

—Ca gun Nu na' rinná bë' yehua' yubá naca ca benë' tu bönni', chizóa tsejë' zi'tu'. Bulidzë' yugu' bönni' huen dxin queë' en gulu'ë yugu' le dë queë' lu ná'agaquië'.

¹⁵ Tuë' bönni' huen dxin na', gulu'ë gayu' dumí nazaca' lu në'ë, ate' ia'túë' gulu'ë chopá dumí nazaca' lu në'ë. Ia'túë' gulu'ë tu dumí nazaca' lu në'ë. Tu tuë' gulu'ë lu në'ë tsca huéaj le ila'zéqui'në'. Ní'irö la' guzá'atë' ga naca zi'tu'.

¹⁶ Guyijë' bönni' huen dxin na' guzxi'ë gayu' dumí nazaca' na', en yöjtíljalenë' le ia'gayu' dumí nazaca'.

17 Lësca' caní, bönni' na' guzxi'ë chopa dumí na', yöjtíljalenë' le ia' chopa ca'.

18 Bönni' na' guzxi'ë tu dumí guyijë', en yöjchö'önë' lu yu, ate' bucáchë'ë dumí queë' xanë' lu yu ni'.

19 'Cate' chigudzé, budxinë' xángaquië' bönni' huen dxin na', ate' bucá'analenë' légaquië' tsahui'.

20 Ga gusí lo bidxintë' bönni' na' guzxi'ë gayu' dumí nazaca' na', en sunu'ë ia' gayu' dumí ca', ate' rë' xanë': "Xan, gayu' dumí gulú'u lu na'a. Ni dë ia' gayu' dumí ca' yöjtíljalena' le."

21 Xanë' na' rë' lë': "Naca dxi'a. Nacu' huen dxin tsahui'. Tsáhui'do' benu' cate' ni dë lu no'o láti'do'os. Na'a yénni'tërö cu'a lu no'o. Guyaza ga zoa', udzéalenu' neda'."

22 Gudödi ni' bidxinë' ca' bönni' huen dxin na' guzxi'ë chopa dumí nazaca', ate' rnnë': "Xan, chopa dumí gulú'u lu na'a. Ni dë ia' chopa dumí ca' yöjtíljalena' le."

23 Ní'irö xanë' na' rë' lë': "Naca dxi'a. Nacu' huen dxin tsahui'. Tsáhui'do' benu' cate' ni dë lu no'o láti'do'os. Na'a, yénni'tërö cu'a lu no'o. Guyaza ga zoa', udzéalenu' neda'."

24 Ní'irö cate' bidxinë' bönni' huen dxin na' guzxi'ë tu dumí nazaca' na', rnnë': "Xan, nözda' nacu' bönni' bizxaj, tu' rulapu' ga biti' guzu', en rutubu' ga biti' guchilju'.

25 Que lë ni na' gúdxida' li', ate' guyija', yöj cácha'a dumí quiu' lu yu. Ni dë na'a le nequi quiu'."

26 Ní'irö bubi'ë didza' xanë', en rë' lë': "Nacu' huen dxin biti' naca tsahui', en xöhuëdi. Nöz quézinu' rulapa' ga biti' guza', en rutuba' ga biti' guchilja'.

27 Que lë ni na', gácarö dxi'a quiu' la'tu' bunödzu' dumí quia' lu ná'agaquië' bönni' ulu'gunë' le dxin, ila'guíljalënë' le ia'lati', para cate' huöda' neda', uzi'a le nequi quia' len icja ca'."

28 Ní'irö xanë' na' gudxë' nupa nacuá' ni': "Guli'cúa dumí na' dë lu në'ë bönni' ni, en guli'cú'u le lu në'ë bönni' na' dë queë' chi dumí."

29 Núti'tës nu rugún tsahui' dxin le dë queë', zoa nu unödzej queë' ia'lati', ate' gáta'da' queë', pero nu na' biti' rugún tsahui' dxin le dë lu në'e, la's dui le dë queë' idúa.

30 Na'a, bönni' huen dxin biti' naca tsahui' ni, guli'tsöjchú'una-në' ní'ilö ga naca chul-la. Ni' cödxí yéché'ë, en gagu zxea láyë'ë.

Cristo uchi'a usöröë' quégaca bönachi

31 Gunnë' ca' Jesús:

—Cate' ni' huöda' neda', Bönni' Guljë' Bönachi, idinná bë'a, ate' dzágagaquië' neda' yúgu'të gubáz lá'ayi quia', ní'irö cö'a lataj tsahui' quia', ga na' uchi'a usöröa' quégaca bönachi.

32 Ulu'dubi dërö lahua' neda' bönachi yödzölió ni, ate' ucu'a léguequi tsölá'a huéaj ca runë' bönni' uyú bö'cu' zxila', rucu'ë-ba' tsölá'a huéajba' yugu' chivo, en yugu' bö'cu' zxila'.

33 Yugu' bö'cu' zxila' na' ucu'ë-ba' cuita lë'ë ibëla, ate' yugu' chivo na' ucu'ë-ba' cuita lë'ë yögöla.

34 Ní'irö, neda', bönni' unná bë', guía' nupa nacuá' cuita lë'a ibëla, innía': "Guli'dá ga zoa', libí'ili' bubéajë' Xuza' libí'ili' quez queë'. Nequi queëli' lataj ga na' rinná bë'ë, lë na' bupë'ë queëli' dza ni'te cate' ni' benë' yödzölió.

³⁵ Caní nequi queëli' tu' guduna', ate' bénnali' le gudahua'. Gubidxa' nisa, ate' bénnali' le gu'a. Guca' ca tu bönni' ridá zi'tu', ate' gulú'uli' neda' lídxili'.

³⁶ Biyadzaj le gácua', ate' bugáculi' neda' le ráculi'. Güí'ida', ate' buduyúli' neda'. Guyu'a lidxi guié, ate' buduyúli' neda'."

³⁷ Ní'irö ulu'bi'ë didza' bönni' tsahui' na', ilë neda': "Xan, ¿bátaxi bilé'etu' Li' gudunu', ate' bugágutu' Li'? ¿Bátaxi gubidxu', ate' bénnatu' le gu'u?"

³⁸ ¿Bátaxi bilé'etu' Li' gudó' zi'tu', ate' gulú'utu' Li' lídxitu'? ¿Bátaxi biyadzaj le gacu', ate' bugácutu' Li' le rácutu'?"

³⁹ ¿Bátaxi bilé'etu' Li' güí'inu', o guyú'u lidxi guié, ate' buduyútu' Li'?"

⁴⁰ Ubi'a didza' neda', bönni' unná bë', ate' guía' légaquië: "Le nácatë rea' libí'ili', tu' benli' caní queë' nu bönni' böcha'ado' ni, sal-la' náquië' bönni' cá'asö, quia' neda' caz benli' ca'."

⁴¹ 'Ní'irö guía' nupa nacua' cuita lë'a yögöla, innía': "Guli'cuíta ga zoa', libí'ili' na' nabága'li' xíguia', tsöjtsázali' lu guí' na' bití' ulu, lë na' bupë'ë Dios ní'a que tu' xihui', en quéguequi gubáz dá'gaca le.

⁴² Caní gaca queëli' tu' guduna', ate' bití' bénnali' le gahua'. Gubidxa' nisa, ate' bití' bénnali' le guí'ja'.

⁴³ Guca' ca bönni' ridë' zi'tu', ate' bití' gulú'uli' neda' lídxili'. Biyadzaj le gácua', ate' bití' bugáculi' neda' le ráculi'. Güí'ida', enca' guyu'a lidxi guié, ate' bití' buduyúli' neda'."

⁴⁴ Ní'irö ila'nná ca' nupa na', ilë neda': "Xan, ¿bátaxi bilé'etu' Li' gudunu', o gubidxu', o gucu' ca

bönni' ridé' zi'tu', o biyadzaj le gacu', o güí'inu', o guyú'u lidxi guíë, ate' bití' gúcalentu' Lí?"

⁴⁵ Ní'irö ubi'a didza' neda', bönni' unná bē', guía' légaquië': "Le nácatë rea' libí'ili', tu' cabí bi benlí' que tu nu nutsa' ladaj nupa nacuá' ni, sal-la' naca cá'asö nu na', bití' bi benlí' quia' neda'."

⁴⁶ Ní'irö bönachi tuá' dö' na' la' tsöjtsázagacatë ga ni' ila'guí'i ila'záca'tica'sö, pero bönachi tsahui' ni' gata' yöl-la' na'bán idú quéguequi.

26

Tun xtídza'gaquië' bönni' yudo' ila'zönë' Jesús
(Mr. 14:1-2; Lc. 22:1-2; Jn. 11:45-53)

¹ Cate' budxi bē'ë Jesús yugu' didza' ni, gudxë' yugu' bönni' usëda queë',

² rnnë':

—Nöz quézili' ia'chopa dza idxín Laní Pascua, ate' dza na' neda', Bönni' Guljé' Bönachi, ulu'dödë' neda' lu ná'agaca nupa ulu'dá' neda' lë'e yaga cruz.

³ Ní'irö bila'dxinë' yugu' bixúz unná bē' len yugu' bönni' yudo' usedi, en bönni' gula tu'zéajni'inë' bönachi judío, ate' bulu'dubë' ga naca lö'a lidxi bixúz lo, lë' Caifás.

⁴ Ni' gulún xtídza'gaquië' ila'zönë' Jesús, lu yöl-la' rizi' yë' quégaquië', para ilútië' Lë'.

⁵ Ta'nnë':

—Bití' gunru' lë ni dza laní, para cabí ila'dzatsa bönachi.

Tu nigula rigú'unu le rilá' zxixi icjé' Jesús
(Mr. 14:3-9; Jn. 12:1-8)

⁶ Cate' ni' zoë' Jesús lu yödzö Betania lu yu'u lidxë' Simón, bönni' na' güí'inë' huë' nudzu' ruzödi,

⁷ bidxinnu cúdzu'lë' Jesús tu nigula, nuá'anu tu böga'do' néquini guiöj nazaca', en yudzu tu le rilá' zxixi le nazáca'da', ate' gulú'unu le icjë' Jesús cate' ni' rö'ë rahuë'.

⁸ Cate' bila'lë'enë' bönni' usëda queë' Jesús lë ni, gula'lenë', ta'nnë':

—¿Bizx que réqui ditaj lë ni?

⁹ Guca nu guti' lë ni, en si' dumí zían para gácalenru' yugu' bönachi yechi'.

¹⁰ Cate' biyönnë' Jesús lë ni, rë' légaquië':

—¿Bizx que rnnëli' queënu nigula ni? Tsahui' naca le bennu quia'.

¹¹ Yugu' bönachi yechi' ila'cuá'lentica'sö libí'ili', pero neda' bití' ugá'analentica'sa' libí'ili'.

¹² Le bennu nigula ni, gulú'unu neda' le rilá' zxixi ni, naca le rupá'anu neda' para dza igácha'a yeru ba.

¹³ Le nácatë rea' libí'ili', gátí'tës luyú yödzölió ga gaca libán que didza' dxi'a ni, lësca' ila'guixjö' bönachi le bennu nigula ni quia' para nu tsöjné lënu.

Rizí' lu në'ë Judas udödë' Jesús lu ná'agaquië' bönni' unná'bë'

(Mr. 14:10-11; Lc. 22:3-6)

¹⁴ Ní'irö guyijë' Judas Iscariote ga na' nacu'ë bixúz unná'bë'. Náquië' bönni' dzáguië' chínnuë' na' dá'gaquië' Jesús,

¹⁵ ate' gudxë' légaquië':

—¿Bizxi gúnnali' quia' channö neda' udöda'-në' Jesús lu ná'ali'?

Bulu'gá'analenë' lë' tsahui' ilu'ë lë' chi uruá' dumí plata.

16 Ní'irö gusí lahuë' Judas na' risí ribö'ë udödë' Jesús lu ná'agaquië'.

Le ráguru' le rusá' ládxi'ru' ca gútië' Xanru'

(Mr. 14:12-25; Lc. 22:7-23; Jn. 13:21-30; 1Co. 11:23-26)

17 Cate' naca dza risí lo laní quégaquië' bönni' judío cate' tahuë' yöta xtila le cabí nazí'í cúa zi que, gula'bígui'ë bönni' usëda queë' Jesús ga zoë', en tē' Lē':

—¿Gazxi rē'ënu' tsöjpá'atu' queëru' para gáguru'-ba' bö'cu' zxíla'do' dzö' Laní Pascua?

18 Jesús rē' légaquië':

—Guli'tséajtsöca' yödzö ni' ga na' zoë' tu bönni', en guli'guíë': "Bönni' rusédinë' netu' rnnë': Chizá' gala' dza quia'. Lu yu'u lidxu' gágulengaca'-në' bönni' usëda quia' bö'cu' zxíla'do' dzö' Laní Pascua."

19 Ní'irö gulunë' bönni' usëda queë' ca na' gunná bé'enë' Jesús légaquië', ate' bulu'pë'ë le ilahuë' dzö' Laní Pascua.

20 Cate' chigudzö' dza na', Jesús gurö'lenë' idxínnutë' bönni' usëda queë' tahuë'.

21 Tsanni ni' tahuë', Jesús rē' légaquië':

—Le nácatë rea' libí'ili', tu nu nutsa' ladjali' ni udödi neda'.

22 Ní'irö bulu'huí'ini ládxi'gaquië', en gula'nábinë' Jesús tu tuë', ta'nnë':

—Xan, ¿naru' neda'?

23 Bubi'ë didza' Jesús, rnnë':

—Bönni' ni runë' në'ë tsözxön len na'a lu yö'öna, bönni' ni udödë' neda'.

24 Le nácatë neda', Bönni' Guljë' Bönachi, uyija' ga gátia' ca na' nazúaj lu guichi lá'ayi ca ral-la' gaca

quia', pero bica' bayechi' nu na' udödi neda' gátia'.
Gácarö dxi'a queë' bönni' na' la' cabí guljè'.

²⁵ Ní'irö bubí'ë didza' Judas, bönni' na' udödë'
Jesús, rnnë':

—Bönni' Usedi, ¿naru' neda'?

Jesús rë' lë':

—Ön, li' na'.

²⁶ Tsanni ni' tahuë', gudélë'ë Jesús yöta xtila, en
gudxë' Dios: "Xclenu'." Ní'irö buzzuzxjè' le, en
bunödzjè' quégaquië' bönni' usëda queë', rnnë':

—Guli'sí', guli'gagu. Lë ni le naca caza'. Ca bena'
que yöta xtila ni ruluí'i ca gaca que le naca caza'.

²⁷ Gudélë'ë ca' tu zxíga'do', en gudxë' Dios:
"Xclenu'." Ní'irö bunödzjè' ca' quégaquië', rnnë':

—Guli'gui'aj yúgu'tëli'.

²⁸ Lë ni ruluí'i ca naca xichöna' le run tsutsu
didza' cubi rucá'ana tsahui'. Xichöna' na' ilalaj ni'a
quégaca bönachi zían para gaca uniti lahuë' Dios
yugu' dul-la' nabága'gaquië'.

²⁹ Rea' ca' libí'ili', bíti'rö guí'ja' xisi le ribía lubá
uva ni cate' idxinrö dza ni' guí'jalena' libí'ili' tu le
cubi ga ni' rinná bë'ë Xuza'.

Jesús rnnë' innë' Pedro biti' núnbë'ë Lë'

(Mr. 14:26-31; Lc. 22:31-34; Jn. 13:36-38)

³⁰ Cate' budxi gulúl-lë' yöl-la' ba queë' Dios,
yöjáquië' lu Guí'a Yaga Olivo.

³¹ Ní'irö Jesús rë' légaquië':

—Yúgu'tëli' gaca chopa ládxi'li', en ucá'anali'
neda' na'a dzö'ni, tu' nazúaj lu guichi lá'ayi ca gaca
quia', le rnna: "Guna' ga gátie' Bönni' Uyú Bö'cu'
Zxila', ate' ilásilasiba' bö'cu' zxila' na'."

³² Cate' ubana' lu yöl-la' guti, ní'irö tséaja' tsöjnörua' loli' saca' luyú Galilea.

³³ Ní'irö bubi'ë didza' Pedro, en rë' Jesús:

—Sala' ilaca chopa ládxi'gaquië', en ulu'cá'anë' yúgu'të' Li', neda' biti' gaca chopa ládxa'a, biti' ucá'ana' Li'.

³⁴ Jesús gudxë' lë':

—Le nácatë rea' li', na'a dzö' ni, cate' si' cödxilöba' böra, li' innó' tsonna luzuí' biti' núnbë'u neda'.

³⁵ Ní'irö Pedro gudxë' Jesús:

—Sal-la' gátilentea' Li', biti' ca' innía' biti' núnbë'a Li'.

Lësca' caní gula'nnë' yúgu'të bönni' usëda queë'.

Jesús rulidzë' Dios la' yëla Getsemani'

(Mr. 14:32-42; Lc. 22:39-46)

³⁶ Ní'irö Jesús bidxínlenë' légaquië' la' yëla Getsemani', ate' gudxë' yugu' bönni' usëda queë' na', rnnë':

—Guli'cö'tsöca' ni tsanni tséaja' ia'lati' ní'ilö, tsöjlidza'-në' Dios.

³⁷ Jesús guchë'ë Pedro len iropë' zxi'inë' Zebedeo, ate' gusí lahuë' ruhuí'innë', en risëbi ládxe'ë.

³⁸ Ní'irö Jesús gudxë' légaquië':

—Ruhuí'ini ládxa'a, en huáti caza' lu yöl-la' risëbi ladxi'. Guli'gá'ana ni, en guli'ná' yëla tsözxön len neda'.

³⁹ Gudödë' Jesús ia'látido' ní'ilö, ate' ni' biyéchuë'. Busudxín lahuë' lu yu, en bulidzë' Dios, gunnë':

—Xuza', channö huáca, ben ga biti' gun bayudxi qui'i saca'a lë ni, calëga ca rë'ënda' neda', pero ca rë'ënu' Li' gunu'.

⁴⁰ Cate' budxinë' Jesús ga na' nacu'ë bönni' usëda queë', yöjxáquië' légaquië' tasië', ate' rë' Pedro:

—¿Naru' cabí gúcatsö iná'alenu' neda' tsözxön yëla tu chí'ido'?

⁴¹ Guli'ná' yëla, en buli'lidzë' Dios inábili'-në' gácalenë' libí'ili', para cabí gü'ili' Satanás tu' xihui' lataj si' bë' libí'ili' le xihui'. Bö' naca cázali' nasína'tica'sö, pero lu yöl-la' bönáchisö queëli' nacuí'di'li'.

⁴² Ní'irö guyijë' Jesús le buropi luzuí, en bulidzë' Dios, rnnë':

—Xuz, channö cabí gaca gunu' ga biti' qui'i saca'a lë ni, ben ca raza ládXu'u Li'.

⁴³ Cate' böajë', leyúbölö buduxaquië' légaquië' tasië' tu' nadödirö yëla guiöj lógaquië'.

⁴⁴ Ní'irö bucá'anë' Jesús légaquië', ate' guyijë' leyúbölö, en bulidzë' Dios le bunni luzuí, ate' tuz ca gunné' zí'alö rnnë'.

⁴⁵ Leyúbölö böajë' ga na' nacu'ë bönni' usëda queë', en rë' légaquië':

—¿Rásitsali' na'a, en ruzi'tsö ládxi'li'? Buli'yútsöca', chibudzaga lo. Neda', Bönni' Guljë' Bönachi, chinadóda' lu ná'agaquië' bönni' dul-la'.

⁴⁶ ¡Guli'chasa, uyéajru! Buli'yútsöca', bönni' na' rudödë' neda' chibidxinë' ni.

Ta'chë'ë Jesús nadzunë'

(Mr. 14:43-50; Lc. 22:47-53; Jn. 18:2-11)

⁴⁷ Tsanni ni' ru'ë Jesús didza' ni, Judas, bönni' nabábalenë' idxínnutë' na', la' bidxintë' ni', ate' dzágagaquië' bönni' zían lë', nuá'agaquië' guíë' tuchi', en yugu' yágado'. Yugu' bixúz unná bë', en bönni' gula tu'zëajni'inë' bönachi judío nasöl-la'gaquië' légaquië'.

⁴⁸ Judas, bönni' na' rudödë' Jesús, chibuluí'inë légaquië' tu le gunë' le gaca bë' nu naca Jesús, gunné':

—Bönni' na' utsaga lahua'-në', Lë' na' Jesús. Guli'sönë'.

⁴⁹ Ní'irö gubígui'ë Judas ga na' zoë' Jesús, rnnë':

—Padiux, Bönni' Usedi.

Ní'irö la' busudxín lotë' Lë'.

⁵⁰ Jesús rë' lë':

—Böcha'a, ¿bizxi huen zo'o ni?

Ní'irö gula'biguë'ë bönni' na', ate' gula'zönë' Jesús.

⁵¹ Tuë' bönni' dzáguië' Jesús gulecjë' guíë tuchi' queë', en benë' huë', guchúguië' guídi náguië' bönni' huen dxin queë' bixúz lo.

⁵² Jesús gudxë' lë':

—Bugú' guíë tuchi' quiu' lidxi. Yúgu'të nupa tu'dí'ini guíë tuchi', lu guíë tuchi' ilátigaca.

⁵³ ¿Naru' cabí'nózinu' huáca ulidza' Xuza', ate' Lë' la' isól-la'të' zióntërö ca chinnu cö' gubáz lá'ayi le naca zión gáyu'ë tu cö' huéaj?

⁵⁴ Channö guna' caní, ¿nacxi gaca udxín le nazúaj lu guichi lá'ayi, le rnna caní ral-la' gaca quia'?

⁵⁵ Ní'irö Jesús gudxë' yugu' bönni' ni':

—¿Birúajtsali' nuá'ali' guíë tuchi', en yágado' para sönli' neda' ca runli' rizönli'-në' gubán? Yugu' dza gurö'a loli' ga naca lu chila yudo', en busédigacada' bönachi, pero biti' guzxönli' neda'.

⁵⁶ Raca caní yúgu'të lë ni para udxín le nazúaj lu guichi lá'ayi, ca na' gula'nnë' bönni' gulu'ë didza' uláz queë' Dios.

Ní'irö yúgu'të bönni' usëda queë' Jesús bulu'cá'anë' Lë', en bulu'zxúnnajë' ni'.

Ridxinë Jesús lógaquië' bönni' yudo'
 (Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Ní'irö yugu' bönni' na' zöngaquië' Jesús gula'ché'ë Lë', ate' bila'dxinë' lahuë' Caifás, bixúz lo, ga ni' nudúbigaquië' ca' yugu' bönni' yudo' usedi len bönni' gula tu'zéajni'inë'.

⁵⁸ Pedro söjnahué' Jesús zi'tu' zí'tu'sö, en bidxinë' ga naca lö'a lidxi bixúz lo na', para ilé'enë' nacxi utságuië' Jesús.

⁵⁹ Yugu' bixúz unná bë' len bönni' gula tu'zéajni'inë', en bönni' yudo' tu'chi'a tu'söröë', bulu'guiljë' nu uzegui Jesús didza' sal-la' si' yë'ë bönni' na', para gaca ila'chúguië' queë' gátië'.

⁶⁰ Cuntu nu bila'dzölinë' sal-la' bila'dxinë' bönni' zían, en gula'nnë' queë' le cabí nácatë. Ga búdxitë bila'dxinë' chopë' bönni', ate' lu yöl-la' rizí' yë' quégaquië' gula'nnë' queë',

⁶¹ ta'nnë':

—Bönni' ni gunné': “Huaca uquínna' yudo' queë' Dios, ate' uchisa' le ia'tsonna dzasö.”

⁶² Ní'irö guzuínë' bixúz lo na', en rë' Jesús:

—¿Naru' cabí rubí'tso' didza'? ¿Bizxi caz lë ni ta'nnë' bönni' ni quiu'?

⁶³ Jesús bití' bi gunné'. Ní'irö bixúz lo gudxë' Lë':

—Ni'a queë' Xanru' Dios ban rinná bé'eda' Li quíxjö'u le nácatë. Gudíxjö'i' netu' channö nacu' Li Cristo, Zxí'inë' Dios.

⁶⁴ Jesús rë' lë':

—Ca na' rno' naca'. Le nácatë rea' libí'ili', ilé'eli' neda', Bönni' Guljë' Bönachi, rö'a cuita lë'ë ibëla Dios, ga ni' dë lu na'a yöl-la' unná bë', ate' guída' lu böaj lúzxiba, en idxina' ga zóali'.

⁶⁵ Ní'irö lu yöl-la' rilé queë' guchözë' bixúz lo lari' nácuë', rnnë':

—¡Gunnë' zi'ë bönni' ni queë' Dios! ¿Núzxirö naquíniru' nu innë' queë' bönni' ni? Chibiyön quézili' didza' zi' bë'ë queë' Dios.

⁶⁶ ¿Nacxi rusáca'li' queë'li'?

Bulu'bi'ë didza', gula'nnë':

—Nabáguë'ë xíguia' gátië'.

⁶⁷ Ní'irö bulu'chejë' zxöna' lahuë' Jesús, en gulu'ë dö' queë'. Gula'gápë'ë ru'ë Jesús ia'zica're',

⁶⁸ en të' Lë':

—¿Nácatso' Li' Cristo? Gunnëya'atsöca' na'a, ¿nuzxi na' gudapa' Li'?

Pedro rnnë': "Biti' núnbë'a-në' Jesús"

(Mr. 14:66-72; Lc. 22:56-62; Jn. 18:15-18, 25-27)

⁶⁹ Tsanni ni' gulaca lë na', rö'ë Pedro lö'alö, ate' bidxinu tunu nigula huen dxin ga na' zoë', ate' rnnanu:

—Lësca' li' gudálenu' Jesús, bönni' Galilea na'.

⁷⁰ Gudá'baguë'ë Pedro lógaca bönachi nacua' ni', rnnë':

—Biti' nözda' nuzxi que na' ru'u didza'.

⁷¹ Cate' birúajë' Pedro ga nu riyaza lö'a, bilé'enu-në' ia'tunu nigula, ate' gúdxinu nupa nacua' ni':

—Bönni' ni gudálenë' ca' Jesús, bönni' Nazaret na'.

⁷² Leyúbölö gudá'baguë'ë Pedro, en buzötjë' Dios, rnnë':

—Biti' ca' núnbë'a-në' bönni' ni.

⁷³ Iá'láti'do'os gudzé, gula'biga' nupa nacua' ni' ga na' zoë' Pedro, en të' lë':

—Le nácatë li' nunu' ca' tsözxön légaquië' tu' naca bë'u yöl-la' ru'isö quiu' didza'.

⁷⁴ Ní'irö gusí lahuë' Pedro rudxía dö' cuinë', en ruzötjé' Dios, rnné':

—Biti' ca' núnbë'a-në' bönni' ni.

La' ná'asö gurödxitëba' böra.

⁷⁵ Ní'irö yöjnenë' Pedro didza' gudxë' Jesús lë', gunné': Cate' si' cödxilöba' böra, tsonna luzuí chigunnó' biti' núnbë'u neda', ate' burúajé' Pedro ni', en gurödxí yéchi'dë'ë.

27

Tu'dödë' Jesús lu në'ë Pilato

(Mr. 15:1; Lc. 23:1-2; Jn. 18:28-32)

¹ Cate' za' rení' dza na', gulún xtídza'gaquië' yúgu'të bixúz unná bë' len bönni' gula tu'zéajni'inë' bönni' judío para ilútië' Jesús.

² Gula'ché'ë Jesús náguë'ë, ate' bulu'dödë' Lë' lu në'ë Poncio Pilato, bönni' rinná bë'ë uláz que yödzo Roma.

Ratië' Judas

³ Cate' chinözinë' Judas, bönni' na' budödë' Jesús lu ná'agaquië' bönni' yudo', narugu queë' Jesús gátië', buí'innë', ate' yöju'ë chi uruá' dumí plata na' lu ná'agaquië' bixúz unná bë', en yugu' bönni' gula na'.

⁴ Rë' légaquië':

—Bena' dul-la' tu' budöda'-në' bönni' tsahui' gátië'.

Ní'irö të' lë':

—Biti' gun lë ni ga cö'ötu' böniga. Le ben cazu' li na'.

⁵ Ní'irö gurú'unë' Judas yugu' dumí plata na' ga naca chila yudo', ate' buzë'ë ni', en yöjsí yenë'.

⁶ Bulu'zi'ë bixúz unná bē' yugu' dumí plata na', ta'nně':

—Biti' sa'yéaj cú'uru' dumí ni ga rigú'uru' dumí que yudo', tu' naca lazxjě' tu bönni' ratiě' bönachi.

⁷ Ní'irö gulún xtídza'gaquiě', ate' gulá'uině' dumí na' tu la' yěla queě' tu bönni' huen rö'ö para gaca ga ila'gáchě'ë bönni' zi'tu'.

⁸ Que lē ni na', ga ridxintē na'a dza nazí'i le lataj na', La' Yěla Rön.

⁹ Caní guca ca na' gunně' Jeremías, bönni' bē'ë didza' uláz queě' Dios, gunně': "Gula'guélé'ë chi uruá' dumí plata na', tsca le gula'zéqui'ně' bönni' Israel Lē',

¹⁰ ate' dumí na' gulá'uině' la' yěla queě' tu bönni' huen rö'ö. Lē ni bulu'íně' Xana' neda'."

Ridxině' Jesús lahuě' Pilato

(Mr. 15:2-5; Lc. 23:3-5; Jn. 18:33-38)

¹¹ Cate' bulu'sudxině' Jesús lahuě' Pilato, bönni' na' rinná bē'ë uláz que yödz Roma, bönni' ni gunábině' Jesús, rē' Lē':

—¿Nacu' Li' Bönni' inná bé'eně' bönachi judío?

Jesús rē' lē':

—Ca nácasö rnno'.

¹² Cate' yugu' bixúz unná bē' len bönni' gula tu'zéajni'ině' bulu'zégui'ě Jesús didza', biti' bi didza' bubí'ě Jesús.

¹³ Ní'irö Pilato rē' Jesús:

—¿Naru' cabí riyöntsenu' cate' xö le ta'nně' quiu'?

¹⁴ Jesús biti' bi didza' bubí'ë. Caní guca, bubábině' bönni' unná bē' na'.

Rirugu queě' Jesús gátiě'

(Mr. 15:6-20; Lc. 23:13-25; Jn. 18:38-19:16)

15 Cate' naca dza Laní Pascua na', dë caz tu le runë' Pilato, bönni' unná bē' na', ca ta'naba bönachi rusanë' tuë' bönni' yu'ë lidxi guié, núti'tës nu té'ëni usanë'.

16 Dza na' tu bönni' nabáguë'ë xíguia', lë' Barrabás, yu'ë lidxi guié ni'.

17 Cate' bulu'dubi bönachi zían ni', Pilato gunábinë' légaquië', rnnë': —¿Nuzxi ré'ënili' usana' queëli? ¿Naru' Barrabás o Jesús, Bönni' na' lë' Cristo?

18 Caní gunnë' Pilato tu' réquibe'enë' bulu'dödë' bönni' yudo' Jesús lu nē'ë tu' tu'zxe'enë' Lë'.

19 Tsanni ni' rō'ë Pilato ga na' ruchi'a rusöröë', nigula queë' gusöl-la'nu nu tsöjödxi lë', rna:

—Biti' bi gunu' queë' bönni' tsahui' ni, tu' gúdxide'eda' guduyëla lu yëla bëchigal tu' nözinë' Lë'.

20 Yugu' bixúz unná bē' len bönni' gula tu'zéajni'inë' gula'gú'u yöl-lë'ë bönachi zían na' para ila'nabi Pilato usanë' Barrabás na', ate' gútië' Jesús.

21 Leyúbölö bë'ë didza' bönni' unná bē' na', ré' légaquië':

—¿Núzxilë' chopë' ni ré'ënili' usana'-në' queëli? Gula'nnë':

—Barrabás.

22 Ní'irö Pilato gunábinë' légaquië', rnnë':

—¿Nacxi guna' queë' Jesús, bönni' na' lë' Cristo?

Yúgu'të' ta'nnë':

—¡Budë'ë lë'e yaga cruz!

23 Ní'irö bönni' unná bē' na' ré' légaquië':

—¿Bizxi dö' benë'?

Zídzajrö gulu'ë didza', ta'nnë':

—¡Budë'ë lë'e yaga cruz!

24 Cate' réquibe'enë' Pilato biti' birúaj xtídzë'ë, pero gula'dzátsarö bönachi, ní'irö gudélë'ë nisa, en gudibi në'ë lógaquië', rnnë':

—Biti' bi xíguia' nabága'a neda' tu' nözi yöl-la' guti queë' bönni' tsahui' ni. Le gun cázali' libí'ili' lë ni.

25 Bulu'bí'i didza' yúgu'të bönachi ni', ta'nná:

—¡Yöl-la' guti queë' bönni' ni ibága'tu' netu', en ila'baga' ca' zxí'initu'!

26 Ca' guca, Pilato busanë' Barrabás na' lu ná'agaquië'. Ní'irö gunná bé'enë' bönni' röjáquië' gudil-la ila'guinë' Jesús, ate' gudödi ni' budödë' Lë' lu ná'agaquië' para ulu'dë'ë Lë' lë'e yaga cruz.

27 Yugu' bönni' röjáquië' gudil-la nacu'ë lu në'ë bönni' unná bë' na' gula'chë'ë Jesús lu yu'u yúlahui' nazí'i le pretorio, ate' ni' bulu'tubë' yúgu'të bönni' röjáquië' gudil-la nacu'ë ni' ga na' zoë' Jesús.

28 Ní'irö gula'lecjë' lari' nácuë' Jesús, en bulu'gácuë' Lë' tu lari' xiná chul-la, ca rácugaca nupa ta'nná bë'.

29 Bulu'dxíë' icjë' tu le néquini ni'a në'e yaga yötsi' le naca ca le dxia icjë' bönni' rinná bë'ë, en bulu'zocé' tu guído' lu në'ë ibëla le rulufí'i ca tu yaga que bönni' yúlahui'. Ní'irö bulu'zóa zxibë' lahuë', en bulu'titjë' Lë', ta'nnë':

—¡Bica' ba Li', rinná bé'enu' bönachi judío!

30 Ní'irö bulu'chejë' Lë' zxöna', ate' bulu'guélë'ë gui na', en gula'guinë' icjë'.

31 Gudödi bulu'titjë' Jesús, gula'lecjë' lari' na' nácuë', ate' bulu'gácuë' Lë' lari' que cazë'. Ní'irö gula'chë'ë Lë' para tsöjdá'agaquië' Lë' lë'e yaga cruz.

Tu'dě'ě Jesús lě'e yaga cruz
(Mr. 15:21-32; Lc. 23:26-43; Jn. 19:17-27)

³² Cate' ni' bila'rúajě' bönni' na', yöjxáca'gaquiě' Simón, tu bönni' Cirene, ate' guluně' ga bi'ě yaga cruz queě' Jesús.

³³ Cate' bila'dxině' lataj nazí'i le Gólgota, le rnna lu didza' xidza', Lataj Que Böga' Ícjaru',

³⁴ bulu'gui'jě' Jesús nupi zi nutsí'i zxícala'aba' böa' guixi'. Cate' buxi' ru'ě Jesús, biti' gú'unně' guí'jě'.

³⁵ Cate' chinudá'agaquiě' Lě' lě'e yaga cruz, gula'guisiě' lari' nácuě', en bulu'quitjě' lahui le gaca bě' núzxilě' guequi queě'. Caní guca, budxín lě na' gunně' bönni' bě'ě didza' uláz queě' Dios, gunně': "Gula'guisiě' lari' nácuá', en bulu'quitjě' lahui le gaca bě'."

³⁶ Ní'irö gula'bö'ě ni', tu'yúě' Jesús.

³⁷ Lěsca' bulu'zöě' lě'e yaga cruz ícjalě' Jesús tu didza' le riguixjö' le nabáguě'ě le rnna caní: "Bönni' ni Jesús, Bönni' rinná bé'eně' bönachi judío."

³⁸ Ga ni' dě'ě Jesús, bulu'dě'ě ca' lě'egaca yaga cruz chopě' bönni' gubán. Tuě' bulu'dě'ě cuita lě'ě iběla, en ia'túě' na' cuita lě'ě yögöla.

³⁹ Gula'dödě' ni' yugu' bönni' bulu'lidza zi'ě Jesús, en bulu'tá ícjagaquiě', tu'titjě' Lě',

⁴⁰ ta'nně':

—¡Ön, Li' na' uquínnaju' yudo', ate' tsonna dzasö ca' uchísatso' le! ¡Busölá cuinu' na'a channö nacu' Li' Zxí'ině' Dios! ¡Bötjatsöca' lě'e yaga cruz na'!

⁴¹ Lěsca' caní bulu'titjě' Lě' yugu' bixúz unná bě' len yugu' bönni' yudo' usedi, en yugu' bönni' yudo' fariseo, len bönni' gula tu'zėjni'ině', ta'nně':

42 –Yugu' nu yúbölö busölë' bönni' ni, pero biti' gaca usölá cuinë'. Channö náquië' Bönni' inná bé'enë' bönachi Israel, huötjatsöquië' na'a lë'e yaga cruz, ate' tséajlë'ëru' Lë'.

43 Lë' buzxöni ládxe'ë Dios. Dios usölá cazë' Lë' na'a channö raza ládxe'ë Lë', tu' gunnë': "Zxí'inë' Dios naca'."

44 Lësca' caní yugu' bönni' gubán na' dá'gaquië' lë'egaca yaga cruz ga ni' dë'ë Jesús bulu'lidza zi'ë Lë'.

Ratië' Jesús

(Mr. 15:33-41; Lc. 23:44-49; Jn. 19:28-30)

45 Cate' bidxín huagubidza, guchul-la idütë yödzölió ga bidxintë idú ridödi xihuó.

46 Idú ridödi xihuó na', bë'ë zidzaj didza' Jesús, rnnë':

–Elí, Elí, ¿lama sabactani?

Didza' ni rnná lu didza' xidza': "Dios quia', Dios quia', ¿bix que nubéaj ládxe'u neda?"

47 Cate' nupa nacua' ni' bila'yöni didza' ni, ta'nná:

–Bönni' ni rulidzë' Elías, bönni' ni' bë'ë didza' uláz queë' Dios.

48 La' guxíti'të' tuë' bönni' nútsë'ë ladjagaquië', en gudélë'ë tu le bululu rixxupi nisa, ate' buxúpinë' le nupi zi, en buzóë' le tu lu gui, ate' butságüië' le ru'ë Jesús para xupë'.

49 Ní'irö ia'zíca'rë' bönni' ni' ta'nnë':

–¡Gulözagarö! ¡Uyútsöca'ru' channö huidë' Elías usölë' Lë'!

50 Leyúbölö gurödxí'ë zidzaj Jesús, ate' burúajtë bö' naca cazë', gútitë'.

51 La' ná'asö biröza'të lari' nal-la' lu yudo', birúaj choplö, le gudela' icjlö ga bidxintë xiní'i. Ní'irö gudödi budó' xzu', en gula'lá'a guiöj.

52 Gula'yalaj yeru ba quégaca nupa chinátigaca, nupa ni' gula'yéajlé' Dios, ate' bulu'bán bönachi na'.

53 Gudödi bubanë' Jesús, bulu'rúajë' bönni' na' yeru ba quégaquië', en gula'yázië' yödzö lá'ayi Jerusalén, ga ni' bila'lé'e bönachi zían légaquië'.

54 Ní'irö gúdxinë' bönni' na' rinná bé'enë' bönni' röjáquië' gudil-la, enca' yugu' bönni' röjáquië' gudil-la nacuá'lenë' lë' tu'yúë' Jesús, ate' gunné':

—Le nácatë bönni' ni gúquië' Zxí'inë' Dios.

55 Zí'tu'sö gula'cuá'anu nigula zían tu'yunu Jesús, nigula na' gula'dálennu Jesús cate' ni' buzë'ë luyú Galilea, ate' gulunnu xichinë', gula'gú'unu le gulahuë'.

56 Lësca' María Magdalena, en María, xiná'agaquië' Jacobo, en José, nútsa'gacanu ladjagacanu, ate' zóanu ca' ni' xiná'agaquië' yugu' zxí'inë' Zebedeo.

*Ta'gu'ë Jesús yeru ba le nadaj lë'e guí'a guiöj
(Mr. 15:42-47; Lc. 23:50-56; Jn. 19:38-42)*

57 Cate' chiridzö' dza na', bidxinë' José, bönni' Arimatea, tu bönni' rilé'enë' yöl-la' tsahui' queë', en dë'ë ca' Jesús.

58 Bönni' ni yöjyüë' Pilato, en gunabë' lataj u'ë Jesús. Ní'irö Pilato gunná bë'ë ulu'nödzjë' queë' Jesús.

59 Guzxi'ë José Lë', en buchölinë' Lë' tu lari' nazaca'.

60 Ní'irö gulu'ë Lë' lu yeru ba cubi quee' le naguidjë' lë'e gu'a guiöj. Budë'ë tu guiöj blaga zxön ga nu riyaza yeru ba na', ate' söhuöjë'.

61 Gula'cuá'anu María Magdalena, en ia'tunu María ni', rö'gacanu ra' yeru ba na'.

*Yugu' bönni' röjáquië' gudil-la tapa chi'ë ba queë'
Jesús*

62 Cate' za' rení' ia'tú dza, gudödi bulu'pë'ë que dza lá'ayi quégaquië' bönni' judío, bulu'dubë' yugu' bixúz unná bë', en yugu' bönni' yudo' fariseo ga zoë' Pilato.

63 Të' Pilato:

—Bönni', röjnetu' bi gunnë' bönni' rizí' yë'ë na', cate' ni' zoë' nabanë', gunnë': “Cate' gaca tsonna dza ubana' lu yöl-la' guti.”

64 Que lë' ni na' gunná be'e nupa ilún chi'i ba ni' ga idxintë dza bunny, para cabí ídigaquië' bönni' usëda queë' chi'i dzö'ölö, en ulu'béajë' Lë'. Ní'irö ilë' bönachi: “Bubanë' Jesús lu yöl-la' guti.” Channö caní gaca, didza' cabí nácatë ni ilu'ë gúntërö huiá' dö' ca ben didza' cabí nácatë na' gulu'ë zí'alö.

65 Pilato gudxë' légaquië':

—Ni nacu'ë bönni' röjáquië' gudil-la. Guli'ché'ë queë'li'. Guli'tséaj, guli'gún chi'i yeru ba na' tsca séqui'li' gunli'.

66 Ní'irö yöjáquië' ni', en bulu'sayjë' dxi'a yeru ba na', en bulu'dë'ë lë'e guiöj na' tu le gaca bë' channö isalaj, ate' bulu'cá'anë' ni' bönni' röjáquië' gudil-la ilún chi'ë le.

28

Rubanë' Jesús lu yöl-la' guti

(Mr. 16:1-8; Lc. 24:1-12; Jn. 20:1-10)

¹ Cate' chigudödi dza lá'ayi quégaquië' bönni' judío, en chizá' rení' dza domingo, yöjyúgacanu María Magdalena en ia'tunu María na' yeru ba queë' Jesús.

² Tsálido'os gudödi budó' zxu'. Caní guca, tu' böjtjè' tuë' gubáz lá'ayi queë' Xanru' narúajè' yehua' yubá. Bidxinë' ra' yeru ba na', ate' gudüë' guiöj blaga zxön na', en gurö'ë lu guiöj na'.

³ Nalá' lahui gubáz lá'ayi na' ca yösa bení', ate' zxíla'do'os naca lari' nácuë'.

⁴ Cate' yugu' bönni' na' röjáquië' gudil-la tapa chi'ë yeru ba na' bila'lé'enë' lë', guládxinë', en gula'zxízië'. Gula'dzö'ë lu yu, en guláquië' ca bönni' nati caz.

⁵ Ní'irö' gubáz lá'ayi na' gudxë' yugu' nigula na', rnnë':

—Biti' gádxili'. Nözda' ruguíljali'-në' Jesús, bönni' na' bulu'dë'ë lë'e yaga cruz.

⁶ Biti' zoë' ni tu' chibubanë' ca na' chigunná cazë' Lë'. Guli'dá, uyuli' ga ni' gutë' Xanru'.

⁷ Guli'tséaj na'a, guli'tsöjödxi yugu' bönni' usëda queë' chibubanë' Jesús lu yöl-la' guti, ate' na'a Lë' cazë' inöruë' loli' saca' luyú Galilea. Ni' ulé'eli'-në'. Chigudxa' libí'ili' le gulu'ë Dios lu na'a.

⁸ Ní'irö' la' bulu'zá'tënu ra' yeru ba na', tádxinu, en tu'dzéjanu, ate' carelö söjácanu söjtíxjöi'iguequinu yugu' bönni' usëda queë'.

⁹ Tsanni ni' söjácanu, Jesús yöjtságuië' légacanu, ate' rë' légacanu:

—Padiux.

Ní'irö gula'bíga'nu ga zoë' Jesús, en bulu'nída'nu ni'ë. Gula'yéaj ládxi'gacanu Lë'.

¹⁰ Ní'irö Jesús rë' légacanu:

—Biti' gádxili'. Guli'tséaj, guli'tsöjtíxjö'i yugu' böcha'a tsöjáquië' saca' luyú Galilea, ate' ni' ulu'lé'enë' neda'.

Le gula'guíxjö'ë yugu' bönni' röjáquië' gudil-la

¹¹ Tsanni ni' söjácanu nigula na', yugu' bönni' na' röjáquië' gudil-la gulún chi'ë yeru ba na' bulu'dxinë' lu yödzo ni', ate' gula'guíxjö'inë' yugu' bixúz unná bë' yúgu'të lë na' gulaca.

¹² Cate' chibulu'tübë' yugu' bönni' gula tu'zéajni'inë', gulún xtídza'gaquië'. Ní'irö bulu'nödzjë' dumí zían quégaquië' bönni' na' röjáquië' gudil-la.

¹³ Të' légaquië':

—Caní innali': "Bila'dxinë' bönni' usëda queë' chi'i dzó'ölö, en bulu'béajë' Lë' tsanni ni' rásitu'."

¹⁴ Channö huayönnë' bönni' rinná bë'ë lë ni, netu' uzéajni'itu' lë', en guntu' ga bití' bi gunë' queëli'.

¹⁵ Ní'irö yugu' bönni' röjáquië' gudil-la na' gula'zi'ë dumí na' ate' yöjéngaquië' ca na' chinazédagaquië'. Caní guca, tu'zé' bönni' judío didza' ni ga ridxintë na'a dza.

Jesús risöl-lë'ë yugu' bönni' gubáz queë'

(Mr. 16:14-18; Lc. 24:36-49; Jn. 20:19-23)

¹⁶ Ní'irö idxinéajtë' bönni' usëda queë' Jesús yöjáquië' luyú Galilea, ate' bila'dxinë' lu guí'ado' na' chibulu'ínë' Jesús légaquië'.

¹⁷ Cate' bulu'lé'enë' Jesús, gula'yéaj ládxi'gaquië' Lë', pero bal-lë' gulaca chopa ládxi'gaquië'.

18 Ní'irö gubígui'ë Jesús ga na' nacu'ë, en rë légaquië':

—Dios chinudödë' lu na'a yúgu'të yöl-la' unná bë' yehua' yubá, en luyú ni.

19 Que lë ni na', guli'tséaj, guli'tsöjsëdi yúgu'të bönachi idútë yödzölió. Buli'quíla légaquië' nisa, ugunli' dxin Lë' Dios Xuz, en Lë' Dios Zxí'ini, en Lë' Dios Bö' Lá'ayi.

20 Guli'sëdi légaquië' ilunë' yúgu'të lë na' gunná bé'eda' libí'ili'. Buli'yútsöca', neda' caz zóalena' libí'ili' yúgu'të dza ga idxinrö dza údxi que yödzölió. Ca' gaca.

Didza' cubi rucá'ana tsahui'
**New Testament in Zapotec, Rincón (MX:zar:Zapotec,
Rincón)**

copyright © 2009 Wycliffe Bible Translators, Inc.

Language: Zapotec, Rincón

Translation by: Wycliffe Bible Translators, Inc.

Zapotec, Rincón

zar

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Rincón

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022

58bf86df-ae22-508c-81dc-936dbf138c25